

ИСТИҚЛОЛ ФИДОЙИЛАРИ

ХОЛИДА АҲРОРОВА



**ИЗЛАРИНИ
ИЗЛАЙМАН**

**«ШАРҚ» НАШРИЁТ-МАМЛАКЕТ
КОНЦЕРНИ БОШ ТАҲРИРИЯТИ
ТОШКЕНТ – 1998**

Ахророва Холида

Изларини излайман.— Т.: Шарқ,
1998.— 176 б.— (Истиқлол фидойилари).

Таниқли адиба Холида Ахророванинг ушбу китобига қизил империянинг 30-йиллардаги разил сиёсати курбони бўлган халқимизнинг стук фарзандлари, маърифатпарнар зиёлилар — Сайд Ахрорий, Мунавварқори Абдурашидов, Салимхон Тиллахонов, Омонулла Нусратуллаев, Мариям Султонмуродова, Собира Холдорова ва Саттор Жабборларнинг аянчли қисмати тўғрисидаги тарихий лавҳалари жамланган.

Миллатпарнар аждодларни хотирлаш — хайрли иш. Зоро, миллат эрки, ватан истиқтоли йўлида қурбон бўлган оталаримиз хотирасини эъзозлаш, уларнинг руҳи покларини табаррук билиб ардоқлаш, бугунги мустақилликнинг қадрига стиш, миллий гуруримизни тиклаш халқимиз шаън-шавкатининг устувор бўлиши учун асосий омилдир.

Қўлингиздаги бу китоб кенг ўкувчилар оммасига мўлжалланган.

63.3(5Ў)+63.3(2)616

© «Шарқ» нашриёт-матбаа
концерни
Бош таҳририяти,
1998

Йигирма беш ёшидан то
ҳаётининг охирига қадар — ўт-
тиз саккиз йил мобайнида умр
йўлдошининг фожиали қисма-
тидан бехабар ўтган муштипа-
рим онагинам Вазирахон Саида-
ли қизининг порлоқ хотирасига
багишлайман.

БЕДАРАК ЙЎҚОЛГАН

Эсимни таниганимдан бери отамни из-
лайман. 1930 йил нояброда ишга кетганича
қайтмай, бедарак кетган отам Сайд Аҳорий
хаёли умр бўйи ҳамроҳ бўлди менга. Дадам ким
эди-ю, нима ишлар қилган? Аждодларим ким-
лар? Бу саволларга топган жавобим узук-юлук
— суриштирадиган ҳеч ким йўқ. Орадан эса
ярим асрдан ортиқ вақт ўтиб кетган. Ёши улуғ,
ниманидир билиши мумкин бўлган қон-қарин-
дошлар оламдан ўтиб кетишган. Олдинроқ эса
ёш бўлганмиз, ўттиз учинчи йилдаги очарчи-
лик, қирқинчи йиллардаги уруш — бу ҳақда
ўйлашнинг ўзи ўринсиз ва бефойда эди. Ке-
йин... Кейин ўттиз еттинчи йиллардаги қирғин
барот... Эллигинчи йилларга келиб мамлакати-
мизда шахсга сифиниш шу даражага етган эди-
ки, аждодларни суриштириш у ёқда турсин,
бир бурда нонингни тинчгина ошаб юрганинг-
ни ўзини баҳт деб билардинг...

Йиллар ўтгани билан соғинч ошса ошдики,
камаймади. Ва тўсатдан... отамни топдим. Тўғ-
рироғи, отам дарагини топдим.

Мустақиллик шарофати билан Жумҳурият
хужжатгоҳларида назаримиздан нарида бўлган
хужжатларни ўрганиш имкони туғилди.

Қўлингиздаги ушбу рисола — педагог, журналист, шоир ва дипломат САИД АҲРО-РИЙНИНГ фожиали тақдири ҳақидаги ҳужжатли қиссадир.

1

Менинг пешонамга бундайин шўр иш тақдири азалда битилганми билмадим. Агар шундай бўлақолса, нега энди, ҳали ёруғ олам бетини кўрмай қилган-қилмаган қайси гуноҳларим учун Аллоҳ мени бу жазога лойиқ топди экан? Ота деган буюк баҳтдан мосуволик азоби ҳали гўдаклигимданоқ ўксик қалбимни қиймалаб келган бир дарддир. Бутун умрга татугилик қийноқ...

Қўшни болалар оқшом палла — оталари ишдан қайтар чоқларда: «Ада!», «Дадажон!» — деб отаи бузрукворлари истиқболига талпинганларида ўзимни қўярга жой тополмай қолардим. Югуриб-елиб ўйнаб юрган еримда бирдан ҳомуш тортардим ва бўйнимни эгиб олганимча ҳовлимизга кириб кетардим. Ичин-ташин ва яна майдони билан кимсасиз ҳувиллаган ҳайхотдек ҳовли. Шом чўккан... Коронгулик бостириб келаётибди. Ҳамма ёқ жим-жит — ютиб юбораман дейди... Қайтиб кўчага чиқаман. «Ҳовузбօғ» маҳалласининг жин кўчаларидан бири. Ҳадрадан Чорсу тарафга кетаверишда ўнгдаги баланд тепага жойлашган бу маҳаллада бир кўча қариндош-уруглар яшаймиз. Ҳаммалари онамнинг оналари — бувим Ойтўрахон отин авлодлари. Қай ҳовлига кириб борсанг: «Кел бу ёққа» деб ичкарига чорлайди, олдингга бир коса иссифини қўяди. Лекин бола онгинг билан ҳам ҳеч кимга сигинди бўлгинг келмайди. Оталик тўқислардан кўра етимнинг кўнгли нозикроқ. Қариндошларнинг ўзаро сўзлашатуриб, овозла-

рини пастлатиб: «Яхшиям онаси билан қолди бу тўрт гўдак. Оналик етим гул етим» деганларида жон-жонимдан ўтиб кетганини ёлғиз ўзимгина билардим.

Кўчада ўғил болалар гира-ширада ҳамон тўп тепишаётчи. Бизнинг маҳаллага ёндош маҳаллада «Спартак» стадиони равнақ топаётган ва-қатлар, қўшнимиз Ориф ямоқчиникига бир футболчи ижарага қўчиб келган бўлиб, маҳаллада ўғилдир-қиздир барча болалар аралаш футбол ўйнайди. Мана ҳамон кўча чангитиб тўп тепиб юрган болаларни оналари бир-бир кечки овқатга чақириб олади. Ёлғиз менигина ҳеч ким чақирмайди. Негаки, бувим, тоғаларим ва иним Кенгашхон «Катта Қозиробод»даги боғимизга қўчиб кетишган. Акам Аҳмадхон болалар ўйида тарбияланияптилар. Иним Эркинхон онам Вазирахон билан боғчада. Ойимлар «Дегрез» маҳалласидаги Тоштрамга қарашли боғчада (ҳозирги ЦИРК биноси ўрнида) мураббия бўлиб хизмат қиласидилар. Тўрт етимчани оқ ювиб тараш жуда мушкул бўлса керакки, икки сменада ишлайдилар — эрта кетадилар, кеч қайтадилар. Унгача мен кўча эшик остонасига чўкканимча, кесакига суюниб ойимлар келадиган тарафга мўлтираб ўтираман.

Бу орада ҳамма болалар: «уй-уйига — туҳфа тўйига» дебчувиллашганича тарқалишади-ке-тишади. Энди кўча ҳам ҳовлимиздек ва менинг қалбимдек ҳувиллаб қолди. Мен ҳамон кўзларимни йўлга тикканча ўтираман. Кўз ўнгимда Самарқандда яшаган чоқларимиз гавдаланади. Қандай дориломон кунлар эди-я. Дадам менга этакларига тўр тутилган жажжи-жажжи кўйлакчалар, ленталар, хил-хил шириналар кўтариб кириб қелардилар мана шундай оқшом паллаларда. Онам доимо уйда — тилаган тилагимиз тилимиздан учиши билан муҳайё бўладиган замонлар. Қайга кетди у кунлар? Қайга кетди,

қайга йўқолди менинг дадам?.. Дадамга нима бўлган ўзи?...

— Даданг командировкага кетганлар... — дейдилар ойимлар.

«Командировка шунча узоқ бўладими?» — ўйлайман доим.

Кўча эшик кесакисига суюнганча ухлаб қоламан...

— Вой, мен ўлмасам, чарчаб ухлаб қолибди-я, шўрлик, — онамнинг йифламсираб гапирганлари қулоғимга чалинади. Кейин мени даст кўтариб, бағриларига босганча уйга олиб кирадилар — кичкинагина каравотимга ётқизадилар. Кўз очишга ҳолим етмайди, уйқу элитади. Уйқу аралаш онамнинг: «Бояқиши, овқатланмай ухлаб қолди-я» деганларини эшитаман. Уйқу элитиб кетаётибиҳамки, бошимда ўша кундузги ўйлар: «Дадам қачон келаркинлар?» Бу ўйхаёлларнинг давоми туш тариқасида туни билан бошимдан чиқмайди ва мени бутун умр таъқиб этувчи бир дардга айланади.

Кейинчалик, бешинчи синфда ўқиб юрган чоғимдан бошлаб дадамни излашга тушганман.

Отамнинг бедарак йўқолганларидан хабар топган рус тили ва адабиёти ўқитувчимиз Валентина Васильевна Захарова менга дадамни излашда ёрдамлашмоқчи бўлди. Ўқитувчимиз мен билан бошлашиб идорама-идора, ҳужжатгоҳма-ҳужжатгоҳ юрган — ҳеч нима чиқараолмаган. Кейинроқ эса, тўрт етимга нафақа ундириш хусусида ўзи зир юргурган, лекин бу масалада ҳам ҳеч иш чиқараолмаган. Хуллас, дадам изларини топмаганимиз. Мен ҳамма вақт бир нарсага ҳайрон бўлардим. Бир одам эрта билан ишга кетиб, бедарак йўқолса — ўлиги ҳам, тириги ҳам топилмаса. Ҳамма, ҳеч нарса билмайман, деб ўтираверса — шундай бўлиши мумкинми?



Саид Аҳрорий.

Қалбимдагӣ бундай саволларга сира жавоб топаолмаганман. Ииллар ўтиб меҳнат фаолиятимни бошлаган чоғимда ижтимоий чиқишимни ёзиш керак бўлганда менга: «Отам ўлган» деб ёзгин дея маслаҳат беришган. Лекин бунга қўлим бормаган, бутун умр «Дадам бедарак йўқолган» деб ёзиб келганман. Яхшиям шундай қилган эканман — эндиликда дадам руҳи олдида юзим ёруғ...

Отасиз ўсиб отамнинг кимлигини билармидим?

Онам Вазирахондан эшитиб билганларим: дадам Муҳаммад Саид Аҳрорийнинг оталари — бобом Абдурашидхўжа Аҳрор хўжандлик бўлиб, таҳминан минг саккиз юз саксонинчи йилларда бўлса керак (анигини билмаймиз) Ҳажга кет-

ганлар ва Ҳаждан қайтишда Туркияда яшаб қолганлар. Дадам Истамбулда гимназияда ва ҳарбий мактабда таҳсил кўрганлар. Биринчи жаҳон урушида иштирок этганлар, жароҳатланганлар ва асирга олиниб, Сибирга (Красноярскка) сургун қилинганлар. 1918-йилда сургундан қочиб, Туркистонга — Тошкентга келганлар. Бу ерда «Ватан» номли мактаб очганлар. «Изчилар тўдаси» деган уюшма ташкил этганлар. 1919-йилда Ҳовузбоғ маҳаллалик Абдураҳмон эшоннинг (онамнинг кейинги оталари) Вазирахон исмли қиёси топилмайдиган гўзал қизига — менинг онамга уйланганлар.

Бундан ташқари мен отамнинг Бухоро инқилоби иштирокчиси эканликларини, Бухоро Шўролар Жумҳуриятининг Озарбайжон Шўролар Жумҳуриятидаги муҳтор элчиси бўлганликларини, педагог, журналист, шоир ва драматург бўлганликларини билардим. 1933-йилдаги оғир очарчилик йиллари, 1937-даҳшатли қатағонлик йилларидан омон олиб чиққан бир неча сурат, «Қизил аскар» номли олти пардали драмалари ва икки шеър дафтарини кўз қорачиғимдек асрарб келганман. «Қизил аскар» драмаси 1929-йилларда Самарқанд шаҳрида Ҳамза номидаги драма театрида саҳналаштирилган ва мен спектаклнинг афишасини ҳамда «Аланга»дами ёки бошқа ойномадами бу спектакль ҳақидаги тақризни ўқиганман. Дадамнинг уйимизда сақланниб келаётган сувратларидан, қўлларида таҳсил олган талабалар ва дадам таниган кишиларнинг ҳикояларидан кўз ўнгимда ҳамиша иқтидорли, ўқтам инсон, чеҳрасидан тортиб кийимиғача чиройли зиёли гавдаланаарди. Онамнинг дадам ҳақидаги ҳикояларини болаликда, ҳар оқшом, эртак тинглагандек эшишиб ётишни севардим, кейинчалик вояга етганимда эса онам билан отамнинг бор-йўғи ўн йиллик мазмунли ва

мехр-оқибатли ҳаёти тафсилотларини тинглаганимда, шундайин маданиятли одам билан умр гузаронлик қилиш насиб этганига ҳавасим келарди онамга... Лекин дадамдан сўнг йигирма беш ёшида бева қолган онагинам тўрт етимни оёққа кўйгунча суроби тўғри бўлди. Аввал эридан тирик жудо бўлиб, истеъдоли рассом бўлиб камол топган тўнгич ўғли Аҳмадхон Аҳроров Ленинград остонасида ҳалок бўлиб, ўғли Кенгашхоннинг бевақт вафоти туфайли куя-куя кул бўлди...

«Вазирахонга қийин бўлди... — дейишарди маҳалламизнинг қариялари. — Худо ўзи қийин демаса, бандасининг қўлидан ҳеч иш келмас экан...»

Бу сўзларни эшитардиму, маъносини тушунмасдим. Йигирма беш ёшида бева қолиш тўрт етимга ҳам ота, ҳам она бўлиш машаққати нималигини ёшинг улгаймай тасаввур қилолмас экансан. Тасаввур қилганингдан кейин эса унинг дардига шериклик болаликни ҳам ўғирлаб, бола ёшингда катта қилиб, катталар ташвишила яшар экансан.

Шу йўсин йиллар ўтаверди... Лекин дадамдан дарак бўлмади...

2

Бошига ёқсан қорни ҳар ким ўзи курайди, деган гап қанчалар ҳақ экан. Муҳаммад Саид Аҳрорий 1930 йил ноябрь ойида уйдан чиқиб кетганча бедарак йўқолди. Лекин инсон игна эмаски, похол ичига тушгандек беиз йўқолсакетса... «Аммо, — ўйлардим мен. — Саид Аҳрорий фақат жумҳуриятимиздагина эмас, балки Иттиifoққа машҳур арбоблар билан ёнма-ён хизмат қилган бўлса-ю, ҳеч ким ҳеч нарса билмаса...»

Ёшлигимда онам Вазирахондан: «Файзулла Хўжаев ҳам ҳеч нима билмайдими?» — деб сўраганим ёдимда. — «Ахир Бухорода, Самарқандда бирга ишлашган-ку!...»

«Даданг бедарак йўқолганларидан кейин Самарқанддан Тошкентга бувингниги кўчиб келдик. Пойтахт ҳам Самарқанддан Тошкентга кўчиб келган эди. Файзулла Хўжаевнинг идорасига бориб, ишга келишини кутиб турдим. У машинада келиб қолди. Мени кўргач, ҳол-аҳвол сўради — оилавий бориш-келишимиз бор эди, анчагина қадрдон эдик. Мени бошлаб кабинетига олиб кирди. Дадангни суриштиридим, «Саидни изляяпмиз. Топамиз. Топмай қўймаймиз» — деган жавоб олдим...» Уни излашдими излашмадими бизга қоронғу. Хуллас Саид Аҳорорий олтмиш йил бадалида бедарак кетди.

«Хуллас Саид Аҳорорийнинг ҳибсга олингани нима учун сир тутилди? Нега?» — деган ўй ҳануз менга тинчлик бермайди...

3

Агар тасодифнинг шакли шамойили бўлса эди, унга ҳайкал қўймоқ керак эди. Яхши ҳам тасодиф бор. Бу тасодиф туфайли олтмиш йил деганда дадамдан дарак топдим. «Родина» ойномасининг 1989-йил ўн биринчи сонида тарих фанлари доктори Фарҳод Косимов билан фалсафа фанлари номзоди Баҳодир Эргашевнинг мақоласини тасодифан ўқидим. Мен бу ойномага обуна эмас эдим. Ўқимаслигим ҳам мумкин эди. Ўқимасам яна ўша-ўша фафлатда юраверар эдим. Мақола Бухоро инқилобига доирлиги учун ҳам ўқидим. Негаки, дадам тақдири шу инқилоб билан туаш. Ва... Бирдан... дадам ҳақидаги иккى оғиз сўзга дуч келдим. Бу икки оғиз сўз юрагимни алғов-далғов қилди. «Ўзбекистон Жумху-

риятининг биринчи раиси бўлган Ҳўжаевдан ташқари 1920-йил сентябрдаги инқилобга алоқадор бўлган кўплаб кишилар Сталин даври қатли омига гирифтор этилди, турмага ташланди, лагерларга сургун этилди. Улар орасида Бухоро Компартиясининг биринчи раиси Нажиб Ҳусаинов, 1923-йилда худди шу лавозимда ишлаган Абдулло Раҳимбоев, Ўзбекистоннинг биринчи Молия Халқ комиссари Қори Йўлдош Пўлатов, профессорлар Абдурауф Фитрат, Мусо Саинжонов ва Аббос Алиев, ўша даврнинг таниқли адабиёт намояндалари Саид Аҳрорий ва Аҳмаджон Абдусаидов (Ҳамдий), Ўзбекистоннинг таниқли партия ва Совет ходимларидан Абдураҳим Юсуф-зода, Раҳматулла Музаффаров, Отакўжа Пўлатхўжаев ва кўплаб бошқа ўртоқлар бор эди»...

Тонггача мижжа қоқмадим ва ариза ёзиб, Жумҳурият Давлат Ҳавфсизлик Қўмитасига элтдим... бироқ, бирон хабар топишимга ишончим йўқ эди.

Ҳа деганда жавоб келавермагач ариза йўллаганим идорага бордим. Ичкаридан бир киши чиқиб, ўзини Вадим Александрович Зубанов деб таништирди, алоҳида бир хонага бошлаб кирди, қўлимга бир суврат (дадамнинг ҳибсга олинган пайтидаги суврати) ва бир варақ қофоз тутқазди. Мана ўша қофоз: тепасига Ўзбекистон ССР Давлат Герби туширилган бир варақ оқ қофоз бетида ЎзССР Давлат Ҳавфсизлиги Қўмитаси, 1990 йилнинг 11 апрели № 10/3090 деган ёзув.

«Ҳурматли Ҳолида Саидовна!

Сизнинг отангиз Саид Абдурашидович Аҳрорий, 1895 йилда Туркияда туғилган, қамалгунга қадар Самарқанд Молия-иқтисод техникиумида ўқитувчилик қилган, 1930 йилнинг 12 ноябрида ҳибсга олинган.

СССР Бирлашган Давлат Сиёсий Бошқармаси Коллегияси Саид Абдурашидович Ахрорийни РСФСР Жиноят Мажмуасининг 58—4 моддаси билан (Советларга қарши ташвиқот ва тарғибот учун) олий жазога — отувга ҳукм этганд. Ҳукм 1931 йилнинг 25 апрелида Москва шаҳрида ижро этилган. Дафн этилган жойи но маълум.

Ўзбекистон ССР Олий Судининг 1957 йил 5 сентябриданги 216/Н ажрими билан СССР Бирлашган Бош Сиёсий Бошқармаси Коллегиясининг 1931 йил 25 апрелидаги Саид Абдурашидович Ахрорийга доир иши тўхтатилиб, унинг пок номи ўлимидан сўнг тикланди...»

Қўлимга теккан жавобдан мен отам ҳақида шу чоққача сира ҳам билмаган кўп маълумотлардан хабар топдим: отамнинг қаерда ва қачон туғилганликларини, қаерда ва ким бўлиб хизмат қилганликларини, ким тарафдан ва қандай жазога маҳкум этилганликларини, отиб юборилганликларини, 1957 йилда иши қайта кўрилиб оқланганликларини билдим.

Олтмиш йил бедаракликдан сўнг отам ҳақида топган илк аниқ маълумот эди бу. Диққатимни бир сана ўзига тортди. Саид Ахрорий 1931 йилнинг 25 апрелида отувга ҳукм этилган ва худди шу куни ҳукм ижро этилган... Нега бунча шошмоқлик керак экан? Ўн гулидан бири очилмай туриб бир инсоннинг умрини қирқмоққа бунчалар шошмоқлик кимга керак эди ва нега?

1990 йил апрели эди. Кўчага чиқдим. Табиат айнан менинг қалбимдаги тўфонни ўзида акс эттиргандек эди... Қуёш чараклаб турар ва шаррос ёмғир ёғарди. Кўзимдан қуилиб келаётган ёшни артиб улгурмасдим. Ўттиз олти ёшида кафансиз ва жанозасиз кетган отамга биринчи бор куйиниб йиғлашим эди...

Бошим ғовлаб, нима қиларимни, қаерга бо-ришимни билмай собиқ Ленинград ва Ленин кўчалари туташган чорраҳада талмовсираб турардим.

Шу чоқ кимнингдир:

— Тинчликми ўзи? Йиғлаяпсанми? — деганини эшитдим.

Ёнимда, «Саодат» ойномаси редакциясида ўттиз йил бирга хизмат қилган ҳамкасабам сураткаш мухбир Борис Мизрохин турарди. Бўлган воқеани эшитгач, ўзига хос бир тарзда мени юпатган бўлди:

— Ҳалиям бўлса, баҳтли экансан, Холида. Яхшиям отанг етти йил олдин қамалган экан. Агар 1937 йилда олинган бўлса борми, Ҳабибулло Қодировнинг куни бошингга тушарди. Сениям бадарға қилишарди. Худога шукур қил...

Айнан шу кундан бошлаб дадам изларини излашга тушдим ва аввало Ўзбекистон ССР Олий Суди Раиси имзо чеккан Сайд Абдурашидович Аҳрорийнинг оқланганлиги ҳақидаги маълумотномани олдим.

Маълумотномани рус тилидан ўзбек тилига таржима қилиб айнан келтираман:

СПРАВКА

29.05.90 № 216-Н-57

Ўзбекистон ССР Олий Суди жиноий ишлар суд коллегиясининг 1957 йил 5 сентябрдаги ажримиға кўра СССР Бирлашган Бош Сиёсий Бошқармаси Коллегиясининг 1931 йил 25 апрелидаги 1895 йилда туғилган Сайд Абдурашидович Аҳрорийга доир қарори бекор қилинади ва иш Ўзбекистон ССР ЖПКсининг 2-моддаси эслатмасига асосан тўхтатилади, яъни оқданади.

Қамалгунга қадар Аҳорий С. А. Самарқанд молия-иқтисод техникумидар дарс берган. Справка тегишли ташкилотларга тақдим этиш учун берилди.

Ўзбекистон Олий Суди

Раиси

(Б. Маликов)

Шундай қилиб, олтмиш йил муқаддам ўтиз беш ёшдаги навқирон отамни бағримиздан юлиб олдилар-да, олтмиш йилдан сўнг, отиб юборилганлиги ҳақидаги совуқ бир хабар ёзилган бир парча қоғозни кўлимизга тутқаздилар.

4

Каттакон емак столининг бир бошида ўтирибман. Қаршимда дадамнинг суврати. Эгниларида боғичли кўйлак устидан пиджак. Москва-да «Бутирка» турмасининг Шарқ бўлимида қамоқда ётганларида олинган бўлиши керак. Ўша Ўзбекистон Давлат Хавфсизлиги Қўмитасида қўлимга тутқазилган суврат бу. Дадамнинг сочлари қириб ташланган. Мен дадамнинг олтмиш йилдан ортиқ сақлаганим сувратлари ичидан сочсиз тушган сувратини кўрмаганман. Ҳамма сувратларида майин, хурмо ранг соchlарини бир ёнга ётқизиб тараган, хушбичим либосларда тушганлар. Аммо бу сувратдаги нигоҳлари ҳар қараганимда юрагимни эзади. Бу нигоҳда қандайдир бир ички дард, ноумидлик муҳрланган. Кимни эслатади? Кимнинг нигоҳини эслатади?! Ҳа, ҳа, эсладим. Абдулла Қодирийнинг ҳибсда олинган сувратидаги боқишилар ҳам худди шундай аламли эмасмиди? Давлат Сиёсий Бошқармаси деб аталмиш идора катта гуноҳга тақаб қамоқ азобига соглан кимсанинг нигоҳи

14

бошқача бўлиши ҳам мумкин эмас. Бу сувратга тикилганимча дадам ҳақида ўйлай бошлайман. Дадамни биламанми ўзи?! Нималарни хотирлайман? Хотираларим 1930 йилга, яъни дадам боши узра қора булутлар тўпланаётган даврга оид.

Биз у чоқлар Самарқандда яшардик. Кимниңгидир ташқари ҳовлисига. У ҳовлининг дарвозасига «4» рақами битилган тахтacha қоқилгани ёдимда қолган. Сабаби, гўдак ёшимдан анчамунча ҳарфлар ва рақамларни билардим. Негаки, лотинлаштиришга қаршилик кўрсатган зиёлиларнинг ўзи лотинлаштириш комиссияларига киритилган бўлиб, дадам ҳам унга аъзо бўлсалар керакки, картонларга туширилган лотин ҳарфлари уйимизда кўп. Мен уларни ўйнаб юриб ҳарф таниб қолган бўлишим керак. Кейинчалик мен у ҳовлини кўп изладим. Энди ўша манзилгоҳимизни биламан. Дадамга доир «иш»нинг 12 жилдидага, 280-саҳифада ОГПУнинг тергов анкетаси бор. 1931 йилнинг 14 феврали куни тўлдирилган ана шу анкетада дадамнинг манзилгоҳи: Самарқанд шаҳри Қаландархона даҳаси, Маҳдум Хоразмий маҳалласи, 4-ҳовли деб кўрсатилган. (Бу бизнинг Самарқанддаги энг сўнгги манзилгоҳимиз. Ундан илгари Верещагин кўчасидаги тўққизинчи ҳовлида ҳам яшаганмиз. Дадам бедарак йўқолганларида мана шу 4-ҳовлидан ишга чиқиб кетганлар).

Бостирмалик дарвозадан кирганда ҳовли тўрида (ўнг тарафдаги бостирма тўрида) ичкари ҳовлига кириладиган эшик. Ичкарида ҳовли эгаси яшайди. Биз ташқари ҳовлининг чап тарафида беш-олти зина билан чиқладиган олди пешайвон бир уй, бир даҳлизда турдимиш. Мен айвоннинг бир бурчагида қўғир-чоқ ўйнаб ўтирибман. Дадам костюм-шимда, қўлларини орқаларига қилиб, айвоннинг у

бошидан бу бошига бориб келиб турибдилар. Мен дадамга қарайман, дадам ҳам менга қараб қўядилар-да, яна ўша юришни давом эттирадилар...

Мана орадан олтмиш йил ўтиб, мен дадамга доир материаллар билан, замондошларнинг кўрсатмалари билан танишгандан кейин ўша чоқлар дадамга жуда қийин бўлганини тушунаман.

Дадам уйдалар... Балким бу, дадам 1929 йилнинг 28 декабрида ҳибсга олиниб, сўроқ қилиниб, 1930 йилнинг 10 марта чиқариб юборилган кунларидир? Вақтинчалик ҳибсга олинишининг сабабини мен энди биламан. (Буни дадам билмаганлар албатта.)

Сайд Аҳорийдан аввалроқ шоир Боту қамоқقا олинган. Маҳмуд Мақсадович Ходиев (Боту)га доир жиноий иш очилган бўлиб, у билан бирга яна 19 киши ҳибсга олинган эди. Шу иш бўйича 1930 йилнинг 6 ва 8 октябри, 4 ва 17 нояброда олиб борилган терговларида шоир Ботунинг, шунингдек бошқа кунларда Маннон Рамзи ва Носир Сайднинг кўрсатмаларида дадам ташкил этган «Изчиллар тўдаси» ҳақида, бу тўданинг ёшларни қуролли қўзғолонга тайёрлашга уринаётганлиги ҳақида фикрлари баён этилган. Яна бир жиноий иш бўйича ҳибсга олинган Исмоил Шерахмедов 1929 йилнинг 18 ноябри куни терговда дадамни тилга олади: «Мен 1920 йилгача «Изчиллар тўдаси»га аъзо бўлганман (бунинг раҳбари Сайд Аҳорий эди)».

«Изчиллар тўдаси» бу нима ўзи? Қандай тўда ёки уюшма?

Мен билишимча бу ёшлар уюшмаси — жумҳуриятимиздаги илк ёшлар уюшмаси. Ёш авлодни билимдон, илмдон қилиб тарбиялашни кўзда тутган уюшма. Ҳужжатлардан билишимча, 1918 йил февралида Красноярскдаги

тутқунгоҳдан қайтгач, тўғрироғи, қочиб Тошкентга келгач Саид Аҳорий Ўқчи маҳалласида (собиқ Ленин номидаги қизлар педагогика билим юрти жойлашган бинода) «Ватан» деган мактаб очади ва шу мактабда ёшлар гурухини ташкил этади. «Изчилар тўдаси» уюшмаси аъзолари, асосан, ўша ёшлардан иборат. Балким ҳибсга олинишининг сабабларидан бири шундан иборатdir. Негаки, эндиликда маълум бўлишича, кўпгина раҳбар ходимлар қатори давамнинг кетига ҳам хуфялар кўйилган. 1925—26 йилларга оид бир ишда хуфяларнинг қатор чақувлари бор. Бир хуфянинг хабар қилишича: «...13 февралда Раҳмат Рафиққа қўшни бўлиб Саид Аҳорий кўчиб келди» дейилади. Раҳмат Рафиқ номи менга таниш. Болалигимизда уйимизда тилга олиниб турадиган номлардан бўлиб, кейинчалик билишимча Раҳмат Рафиқ — Бухоро Коммунистик партияси ташкилотчиларидан бири бўлган. Бухоро Совет жумҳуриятида бир неча масъул лавозимларда ишлаган. Кейинчалик у ҳам ҳисбга олинган.

Шу ишнинг 237 саҳифасида яна шундай чақув бор: «Файзулла Хўжаев гуруҳига ўзбек адабиётчиларидан Фитрат, Саид Аҳорий ва бошқалар киради. У гуруҳ Тошкент гуруҳи билан, жумладан Мунавварқоричилар билан ихтилофда. Бунга Файзулла Хўжаев ва Турсунхўжаев, шунингдек, Фитрат ва Мунавварқори ўртасидағи ихтилоф сабаб...»

Мунавварқори пантуркизм гоясини қўллаб-куvvatлайди, Фитрат эса пан ўзбекизм тарафдори...

...Файзулла Хўжаевни қуршаган шахслар масаласига келсак, масалан, Фитрат, Саид Аҳорий, Бозорбоев, Абдураҳим, Аминов, Отоуллахўжаев ва турли тоифа Бухоро зиёлиларига келсак бу гуруҳ фақат миллатчилардан иборат, деган тасаввур ҳосил бўлади...»

Бу сатрларни ўқир эканман: «Ахир ҳозирги-на ўқиганларим 1926 йилларга доир воқеалардан иборат. Ҳали-ҳозир Файзулла Хўжаев Ўзбекистон Шўролар Жумҳурияти Халқ комиссарлари Кенгашининг биринчи Раиси лавозимида хизмат қилиб турибди. Бундан чиқди, ўша даврларданоқ ҳукумат раҳбарлари ва улар атрофидагиларнинг ҳар бир қадами синчиклаб кузатиб борилган бўлиб чиқади-ку... Бу нима? Ўша пайтлар Ўзбекистон раҳбарлари, илгор зиёлиларининг ҳар бир қадами нима учун назоратда?! Қўғирчоқ ҳукумат эдими у?.. Файзулла Хўжаев 1937 йилда ҳибсга олингани билан ҳали йигирманчи йилларданоқ унинг ва ҳамнафас кишиларининг пайига тушилган экан-да? Дадам Сайд Аҳорорий ҳам 1930 йилда ҳибсга олингани билан 1921 йиллардаёқ унинг ҳар бир қадами кузатиб борилган. 1925—1926 йилларда хуфялар дадамга тун ҳамроҳ, кун ҳамроҳ эканлар-ку. Балким булар, дадам энг яқин дўстим деб билган кишилардандир, ёки бўлмасам хонадонимизда яшаб, ошимизни ошаб, дадамнинг мададидан баҳраманд бўлиб юрган талабалардандир? Фикрлаб кўрсам уларни танигандай ҳам бўламан. Қандайдир олтинчи, еттинчи туйгулар ва мантиқ менга уларни рўпара қилиб туради. На чора, ҳар ким нима экса шуни ўради, ҳаволаси худога. Яратганинг ўзи жазосини берсин уларнинг — берган бўлса ҳам ажаб эмас.

1926 йилнинг 13 марта даги бир чақувда шундай деб ёзилади: «Раҳмат Рафиқнинг қўшниси Сайд Аҳорорий 13 март оқшоми оиласвий ҳаётининг етти йиллигини нишонлаб зиёфат берди. Раҳмат Рафиқнинг иккинчи қўшниси Муинжон Маҳзум Аминов Сайд Аҳорорийни тушликка таклиф этди ва у меҳмонларни бошлаб чиқди. Сайднинг меҳмонлари тошкентлик артистлар эди (артистлар 9 март куни Фитрат-

нинг «Ҳинд инқилобчилари» деган пъесасини кўйгандилар)…»

Бу ўринда дадам устидан бу чақувларни ёзиб юрганлардан «миннатдор» ҳам бўлиб қўяман. Рост-да, бу ахборотни улар ёзиб бермаса, ҳали дунёга келмасимдан аввал отамнинг нима қилиб юрганини мен қаёқдан билардим... Ахир мен отам ҳақидаги ҳар бир хабарни — у хоҳ ижобий бўлсин, хоҳ салбий, жавоҳир топиб олгандай қувониб қаршилайман. Олтмиш йиллик мавҳумлиқдан сўнг отам ҳақида топаётганим ҳар бир хабар мен учун азиз ва тансиқ.

1926 йилнинг 24 апрелида шундай хабар етказилади: «Ўн тўққизинчи апрель куни Мазҳар Бурхонов Хўжандга сафари арафасида миллатчи Сайд Аҳорийнинг уйига кирди. Бу вақт Сайднинг уйида унинг дўстларидан бири бор эди. Бурхонов Сайд Аҳорийдан, хўжандлик бўлгани учун, хўжандликларга хат ёзиб бериб, баъзи масалаларда ёрдам кўрсатишни сўради. Бурхонов Аҳорийнинг уйида бир ярим соат чамаси бўлди. Ўзаро суҳбат асносида Фитрат шахсига доир ва унинг Бокуга Туркология съездига боражаги хусусида сўзлашдилар...».

Бир хабарномани такрорламай ўтолмайман. Бу гуруҳбозликка доир: «Файзулла Хўжаев гуруҳига Узбекистоннинг адабиётчиларидан: Фитрат, Сайд Аҳорий ва бошқалар киради. Бу гуруҳ Тошкентлик зиёлилар билан Мунавварқори чилар билан ихтилофда...».

Агар бу ёзувларга ишонадиган бўлсак, афсус, гуруҳбозлик бор экан. Зиёлиларнинг бошини балки ўша гуруҳбозлик егандир? Файзулла Хўжаев гуруҳи. Акмал Икромов гуруҳи, бухороликлар, самарқандликлар, тошкентликлар гуруҳи... ва ҳоказолар... Яна шуниси ҳам борки, Сайд Аҳорийнинг тошкентликлар гуруҳи билан ихтилофда дейилади-ю, Мунавварқори гу-

руҳи билан бирга айбланади... Айбланадигина эмас, улар билан бирга — бир қарорга асосан ва бир кунда отиб юборилади... Мантиқ борми ўзи?

1926 йилнинг саккизинчи майидаги чақувда Саид Аҳорорий ҳақида шундай ёзилган: «У билан бўлган суҳбатлардан бирида Молия Халқ Комиссарлигидан баъзиларининг ўчакиши туфайли кетганини айтди. «Зарафшон» рўзномасига Хожи Мўмин Шукруллаев ва Мажидов тавсиясига кўра ўтган. Унинг матбуотда ишлашига ўртоқ Икромов ҳам монъелик кўрсатмади, Аҳороровни Икромов ўқитувчиси сифатида билади».

Дадам қораланган «Жиноятнома» йигирма жилдан иборат бўлиб, бу ишда мен Давлат Сиёсий Бошқармасини «Миллий иттиход», «Иттиходи тараққий», «Миллий истиқдол» каби уюшмалар, уларнинг аъзолари қизиқтирганлигини англайман. Шунингдек, Саид Аҳорорий ташкил этган «Изчилар тўдаси» ва ундан кейинроқ ташкил этилган «Тўдалар тўдаси», «Темур тўдаси» сингари ёшлар ташкилотлари ишини қаттиқ назорат қилганлар.

Олтинчи жилднинг 41 саҳифасида Лазиз Азиззоданинг кўрсатмаларига дуч келдим. 1930 йилнинг 27 июня куни у (бу вақтда отам ҳали озодликда юрган) шундай кўрсатма беради: «Изчилар тўдаси»га Фатхулла Умарий, Ақмал Икромов раҳбарлик қилган. Бу тўдани Саид Аҳорорий ташкил этган ва бош бўлган...».

Лазиз Азиззодани танирдим. Иш юзасидан кўришиб ҳам турардик. Ҳибсдан чиқиб келганларида, бу киши дадам билан бир даврда хизмат қилганлар, дадамни танисалар керак, деган умидда дадам ҳақида суруштирганман. Лекин у киши, дадамни яхши танишларини гапирдилару, бир жиноятнома бўйича ишлари бирга кўрилгани ҳақида индамадилар.

— «Саид Аҳорий зўр одам бўлган. Мен яхши танирдим, яхши билардим. Дадангиз ҳақида албатта катта мақола ёзаман... — деди у киши сўзига якун ясаб. Лекин ҳеч нарса ёзмасликларига ишончим комил эди. Негаки Саид Аҳорий ҳақида бир нарса ёзиш учун унинг тақдири нима бўлганини аввал билмоқ керак эди. Лекин олтмишинчи йиллар бўлсада, Саид Аҳорийнинг оқланганига уч йил бўлган бўлсада, бундан ҳали ҳеч ким хабардор эмас эди. Унинг фарзандлари бўлган бизлар эса дадамнинг оқлангани у ёқда турсин, ҳатто ўша ўтизинчи йилда ҳибсга олинганини ҳам билмас эдик. Мана қандай даврда яшадик...

Яна даҳшатлиси шундаки, ёлғиз Лазиззодагина эмас, бошқа бирга маҳкум этилганлар ҳам дадам ҳақида: «Иқтидорли одам, миллатпарвар одам эди» деган гапларни айтардию, лекин ҳеч бирлари, «1930 йилда бир жиноятнома бўйича жавобгарликка тортилганмиз» деган аниқ-таник сўзни айтмасди. Нега? Орадан 35—40 йил ўтгач ҳам гапираолмадилар-а.

Дадам Муҳаммад Саид Аҳорий ҳақида сўзларканман Мунавварқори Абдурашидовни эсламай ўтолмайман. Негаки дадам мана шу ажойиб маърифатпарвар инсон билан бир «иш» бўйича айблангандар.

Мунавварқори Абдурашидов 1929 йилда ҳибсга олинган бўлса, шу «Жиноятнома»нинг иккинчи жилди 324-саҳифасида, 1930 йилнинг 6 январида берган кўрсатмасида «Иттиҳоди тараққий»га қабул қилинган ёки қабул қилиниши лозим бўлган кимсаларни хотирлаб, шулар ичida Саид Аҳорий бўлиши мумкинлигини айтди. Бундан чиқди, ўша 1930 йилнинг февраль—март ойларида дадамнинг вақтинча ҳибсга олиниб, сўроқ қилиншининг сабаби шу бўлиши керак.

Шундан сўнг, 1930 йилнинг 9 апрелида шу иш бўйича тергов қилинган Салимхон Тиллахонов «Миллий иттиҳод» ташкилотига 1918—1919 йилда қабул қилинган кишиларни санаб ўтилганда Сайд Аҳорий номини тилга олади ва Сайд Аҳорий, Абду Ваҳоб Муродий, Р. Иноғомов, А. Икромовларни «Изчилар тўдаси» ташкилотчилари эканини айтди.

Терговчи Мұҳаммад Агидуллин (собиқ чор армияси поручиги) Салимхон Тиллахоновни қайт-қайта тергов қиласди. Учинчи жилднинг 99-саҳифасидаги «Миллий иттиҳод» аъзоларининг рўйхатини ёздириб олади ва тўқсон тўртингчи қилиб Сайд афанди Аҳорий кўрсатида.

1930 йилнинг июнида ўз қўли билан ёзган кўрсатмасида Лазиз Азиззода, мен билган аъзолар шулардан иборат эди, деб катта рўйхат беради ва эллик еттинчи қилиб Сайд Аҳорийни киритади. Лазиз Азиззода яна Сайд Аҳорий ҳақида сўзларкан уни «Изчилар тўдаси» ташкилотчиси деб кўрсатади.

Худди шу жилднинг 234-саҳифасида айбланувчи Фулом Икромов «Изчилар тўдаси» ҳақида сўзларкан шундай дейди: «Изчилар тўдаси» энг аввал ташкил этилган уюшмалардан. Уни турк офицери Сайд афанди ташкил этган. Лекин ўзи турк бўлмаса керак...».

Бу маълумот мен учун янгилик эмас. Ҳа, Сайд Аҳорий турк офицери, лекин асли хўжандлик ўзбеклардан. Буларни мен онамдан билганман.

Лекин отам ҳақида ҳеч қачон билмаганларимни ўн иккинчи жилдан топдим.

Бу 1931 йилнинг 14 февраляни куни тўлдирилган Бирлашган Бош Сиёсий Бошқарма — ОГПУнинг тергов протоколи.

Бу тергов анкетасидан мен дадамнинг —

Сайд Абдурашидович Ахрорийнинг отаси — бобом Абдурашидхўжанинг савдогар бўлганини, дадам 1895 йилда Туркияда туғилганини билдим (лекин қайси шаҳарда ёзилмаган). Мен учун катта янгилик — Туркиянинг Истамбул шаҳрида Акром деган амаким ва Асмо исмли аммам бўлганлигидан дарак топдим. Отам авлоди Истамбулда 1897 йилдан бошлаб яшаган экан. Дадам Истамбулда аввал гимназияни та- момлаган, сўнг икки йил мобайнода ҳарбий билим юртида ўқиган эканлар. 1918 йилда Туркистонга келганидан буёғига «Турк ўчоги» миллий уюшмаси ташкил этган. «Турк сўзи» рўзномасини чоп этган. Тошкентда «Турк изчилар тўдаси» ва «Ватан» мактабини ташкил этган.

Менинг бояқиши дадам, ўз она диёрида мусоғир бўлган отам, отагинам. Не-не машаққатларни кўрди бу ёш бошингиз... Шу ерга келганда болалигимдаги бир манзарани эслайман. Иссиқ кийинганимизга қараганда, айни ўша чоқдар, яъни 1930 йилнинг февраль ёки март ойлари бўлса керак. Онам билан Самарқанднинг тош кўчаларидан узоқ юриб бир жойга бордик. Кейин ним қоронғу бир хонага кирдик — деразаси бормиди, йўқмиди эсимда йўқ. Шип-шийдам хонада темир каравот турар, тўшак ўрнига тахта ташланган каравотга. Дадам шу каравотда тахта устида ўтирадилар. Катта бўлгач бу воқеани эслаб, онамдан сўраганимда, «Даданг қамалган эдилар, сен билан бирга ГПУга бориб кўриб келиб эдик» дедилар. Бундан чиқди бу ўша дадам боши узра қора булутлар пайдо бўлган кезлар. 1930 йилларда ёзилган мана бу сатрлар ҳам дадамнинг ўша кайфиятларидан далолат берарди:

Омон-омон доктор,
Ҳеч иложим йўқдир,

Мендайин бир бечора
Чорасиз дардга йўлиқдим,
Борми бунга бир чора?...

Ёки:

Далалар, қирлар,
Соғиндим сизни,
Кўркам ҳаётга
Элтувчи изни.
Усандим-бездим,
Тор кўчалардан,
Мотамли унсиз.
Кар кечалардан.
Қақшаган кўнглим —
Яйрамоқ истар,
Уфқимда доим
Бир шафақ истар...

(«Соғиниш» шеъридан. 26.01.30. Самарқанд).

Яна:

Далалар, қирлар,
Очинг бағрингизни!
Куйган лабимла —
Ўпай сағрингизни...
Мен қўйнингизда
Ўйнаб ўсгандим,
Эркин яшашни
Сиздан ўргандим.
Яшил сийналар,
Ҳисни қўзғотсин,
Тотли нағмалар —
Дилни ўйнатсин!

(«Очинг бағрингизни» шеъридан.
14.02.30. Самарқанд).

Бу шеърлар ўша ҳибсга олинган кезлар ёзилган бўлса керак.

Шундай қилиб, тергов қилиб 1930 йил марта ида чиқариб юборгач, шу йилнинг ноябрь ойида Саид Аҳорийни яна ҳибсга олибдилар экан.

Мунавварқори Абдурашидов билан биргалиқда бир иш юзасидан бир неча ўн киши ҳибсга олинган. Ишни ўрганган ҷоғимда бир нарсага ҳайрон қолдим. Ўша давр зиёлилари ўзбек халқининг норозилигини юрак-юракдан ҳис этишган — уларнинг ўзларини қалбида ҳам Совет ҳокимииятининг ўша давр сиёсатидан норозиликлар уйғонган — шундай бўлиши табиий эди.

Бутун Россия Марказий Ижроия Кўмитасининг Туркистон ишлари бўйича вакили Ф. Голошёкиннинг «Турк республика Марказий Ижроия Кўмитаси «Известия» рўзномаси мухбири билан бўлган суҳбатидаги қўйидаги сўзлари норозиликларнинг келиб чиқиш сабабларидан айримларини очиб беради: «Совет ҳокимияти байроғи остида ҳаммаёқда бедодлик ва шахсий манфаат йўлида ўз мавқеидан фойдаланишга интилиш ҳукм сурмоқда, бу эса овруполи аҳоли ичидаги имтиёзли гуруҳларни вужудга келтирди. Мусулмон оммасига муайян ишончсизлик бор. Мусулмонларга қўйи ирқ сифатида қарашлар, умумий номақбул сиёсат ва овруполиклар очиқдан очиқ олаётган имтиёзларнинг нақдлиги билан қўшилиб, юқори даражада танг шароитни юзага келтирди ва мусулмонлар оммасида норозилик уйғотди».

Норозилик келтириб чиқарадиган масалалар кўп эди. Бир хуфянинг 1926 йилнинг 17 марта даги чақуви ҳам бунга мисол бўлаолади:

«...Раҳмат Рафиқ гапини давом эттиаркан, пахта харид қилиш масаласида СССР Америка

билин шартнома тузганда бир пуд пахта учун олтин пул билан 14 сўм тўлагани ҳолда, Ўзбекистонга қофоз пул билан 3 сўм 50 тийин тўлашни кўзда тутади, дейди».

Хуллас, Туркистонда Совет ҳокимияти ўрнатилган кундан то ўша ўттизинчи йилларгача, асосан, бир қатор масалаларда норозиликлар пайдо бўлиб келган. Бундан Совет ҳокимиятининг Олий ташкилотлари хабардор бўлган. Ўша масалаларнинг айримлари қўйидагилардан иборат эди:

а) Партия диктатураси ва Туркистоннинг марказга сиёсий-иқтисодий қарамлиги келтириб чиқараётган норозиликлар;

б) Пахта экиладиган майдонларнинг кўпайтирилиши, ҳақнинг кам тўланишидан норозиликлар;

в) Россиянинг марказий районларидан аҳолининг кўчириб келтирилиши натижасида ерли аҳоли орасида ишсизликнинг кўпайиб боришидан норозиликлар;

г) давлат идораларида ерли миллат кишиларини жойлаштиришнинг имкони бўлмаётганлигидан норозиликлар (аҳолининг арз-додини тинглайдиган, тилини тушунадиган кишилар ишлашини исташади);

д) Туркистонни миллий жумҳуриятларга бўлиб ташлаш масаласидаги норозилик;

е) ўқиш ва ёзишни лотинлаштириш масаласидаги норозиликлар; ж) ер-сув ислоҳотида йўл қўйилган катта хатолар ва яна бошқа қатор масалалар юзасидан норозиликлар...

Бу масалалар ҳақида ўйларканман, ахир ўша пайтда кўтарилиган бу муаммолар, орадан олтмиш йил ўтиб ҳам ўша-ўша муаммолигича турипти-я дейман ўзимга. Нега энди зиёлиларнинг — халқ вакилларининг талаблари инобат-

га олинмаган?! Ўша муаммолар ўша чоқлардаёқ тўғри ҳал қилинганда пахта яккаҳокимлиги бизни бунчалар хонавайрон қилмаган бўлармиди, демография туфайли Россиянинг қишлоқлари ҳувиллаб қолиб, ишчи кучи оқиб келавергани туфайли диёримизда ерли ҳалқ ичидаги ишсизлик авж олмасмиди, эски ўзбек ёзувидан мажбуран йироқлаштирилганимиз сабабли тарихимиздан бунчалар бегона бўлиб қолмасмидик, Туркистон деб аталмиш давлатимиз парча-парча бўлиниб, миллатлараро низолар чиқишига сабаб бўлмасмиди, қулоқ қилиниб, ер-суви тортиб олинган минглаб ўртаҳол дехқон ўз она диёридан ўзга юртларга қувғин қилинмасмиди ёки хорижга бош олиб кетишга мажбур бўлмасмиди...

Саволлар, саволлар, саволлар...

Жавобсиз қолган саволлар, бегуноҳ ҳибсга олинниб отиб юборилган, оиласи билан баҳтиқаро бўлган фуқаролар...

Бу баҳтиқароликлар ҳақида сўз очишдан аввал баъзи фактларга мурожаат қиласман. Бу «жиноятнома»га номи тиркалиб отувга, беш, ўн йиллаб қамоқ жазосига маҳкум этилган одамларнинг деярлик ҳаммаси кейинчалик оқланган экан, демак уларнинг бари бегуноҳ экан-да»...

Ҳа, улар бегуноҳ эдилар. Лекин давр шундай эдики, ҳамма-ҳаммадан бирдай, бир хилда ўйлаш, бир хилда фикр юритиш талаб этиларди. Ҳеч кимнинг ўз шахсий фикри бўлиши мумкин эмас эди.

«Жиноятнома» бўйича биринчи гуноҳкор деб топилган кимса — Мунавварқори Абдурашидов кетидан, ҳали совет ҳокимияти ўрнатилмасидан анча илгари, 1914 йиллардаёқ чор ҳокимияти исковчилари изма-из юришган, Мунавварқорининг маърифатпарварлигини чоризмга қарши ҳалқни қўзғашга уриниш деб баҳолашган. Бу фикр ҳақиқатдан йироқ эмас эди.

Негаки, халқ ҳокимиятдан норози экан, демак, бу ҳокимият халқа зулм ўтказган бўлади. Чоризм даврида, туркистонликлар биздан норози бўлаётиди, қани арзларини эшитайликчи, дейдиган кимса бўлмади. Лекин афсус, совет ҳокимияти йиллари ҳам халқнинг косаси оқармади. Ўйлаб кўринг: 1907—1909 йилларда Туркистонда битта бўрдоқи қўй эллик тийиндан бир сўмгача бўлганини ёзади 1989 йилнинг 5 июлида «Литературная газета»да «Буюк ипак йўли қаёқقا олиб боради» деган мақоласида Морис Симашко. Совет ҳокимияти йилларида эса кун кундан баттар бўлди. И.Кудрин «Известия» рўзномасининг 1989 йил 16 июль сонидаги «Арzon пахтанинг қиммат баҳоси» мақоласида: «... Подшоҳ даврида ўрис савдогари бир пут пахта учун ўзбекка 18 пут буғдой берган» деб ёзади.

Мунавварқори Абдурашидов шу «жиноятнома»нинг ўнинчи жилдидаги 17-саҳифада 1930 йилнинг 30 октябрида айтади: «1920 йилларнинг октябри бўлса керак, ўртаҳол деҳқоннинг: «1912—13 йилларда бир пут пахта учун 5 қадоқ чой, 30 пуд гуруч, 30 қадоқ қанд, 15 газ газмол, 5—6 пут буғдой, 50 қадоқ гўшт, 30 қадоқ мой олардик, энди бўлса бир қадоқ чой, 15 қадоқ қанд, 15 газ газмол, 2 пут буғдой, ярим пут гуруч, 10 қадоқ гўшт, 7 қадоқ ёғ беришяпти, ўрта ҳисобда 1913 йилдаги нархнинг учдан бирини беришяпти. Агар совет ҳукумати аввалги нархнинг ярмини ёки пахта учун Николай подшо берган нархнинг учдан бирини берганда ҳам ҳукуматдан хурсанд бўлардик, томимизгача пахта экардик» — дейишганини эшитганман», — деб кўрсатма беради. Буни ўқигач беихтиёр: ўзбек деҳқони хўбам хор қилиб юборилган эканми, деган фикрга келасан олтмиш йил ўтгандан сўнг.

Уйлайман: ўша давр зиёлилари Лениннинг

Россия ва Шарқнинг мусулмон меҳнаткашларига қарата қилган мурожаатидаги: «Эркин ва бемалол эркин ҳайтингизни кўраверинг. Бунга ҳаққингиз бор. Билингки, сизнинг ҳуқуқингиз, Россиянинг барча халқлари ҳуқуқи каби инқи-лобнинг ва унинг ташкилотлари — ишчи, солдат ва деҳқон депутатлари шўросининг бутун қудрати ила муҳофаза этилади...» деган сўзларга ишонгандар. Ваҳоланки, аксинча бўлиб чиқди — жумҳуриятлар ва шахслар ҳуқуқи Давлат Сиёсий Бошқармасининг бутун кучи — қудратила поймол этилди. Оқ-қорани тушинган, халқнинг инсоний ҳуқуқларини ҳимоя қилишга отланган кишилар бир-бир териб олинаверган.

Менинг отам Мұхаммад Сайд Аҳрорий ҳам ўша бегуноҳ қурбонлардан бўлган экан. Лекин ОГПУ отамни гуноҳкор деб билиши учун баҳона кўп экан. Аввало у хорижда — Туркияда таваллуд топган, Истанбулда илм олган.

Саъдуллақори Шермуҳамедов 1929 йилнинг 12 ноябри куни Тошкентда олиб борилган терговда «жиноятнома» нинг 11-жилдининг 31-саҳифасида:

«Сайд афанди — собиқ турк офицери. Гимнастика ўргатарди. Маҳқ ҷоғида у, ҳар бир турк ўғлони ҳарбни билиши, довюрак бўлиши керак. Қўшинсиз давлат бўлиши мумкин эмас, дерди. У яна:» Биз турк давлатимизнинг ҳимоясига кўксимиизни қалқон қилмоғимиз даркор. Бунинг учун ҳарбий ишни билмоқ керак» дерди дея кўрсатма беради.

Агарда терговчилар Мұхаммад Сайд Аҳрорийнинг «Турк сўзи» рўзномасининг 1918 йилдаги 5-6 ва 7-сонларида чоп этилган «Яшамоқ орзуси» мақоласини, худди шу рўзноманинг 1918 йил 2 июнь тўртинчи сонидаги «Турклик жараёни» мақоласидаги: «...Сиёсий ва иқдисодий асоратдан қутилмоқ учун турк дунёсидаги

мактаб ва мадрасалар ислоҳ қилинди, ҳамма мусулмонга китоблар ҳар билиқдан зиёда туркча бўлди, ҳар нарса турклаштирилди, яъни миллийлаштирилди», сатрлари билан танишган эсалар ҳам албатта Муҳаммад Саидни миллатчига чиқаришлари тайин. Ваҳоланки, булар муаллифнинг азбаройи ўз халқининг равнақи учун хизмат қилиш ниятидаги уринишлариdir. Аммо бу ўша давр терговчилари наздида гуноҳи азим-ку! Туркияда туғилган бўлса, турк офицери бўлса — албатта ниманидир кўзлаб юрибди... — деган таҳминнинг ўзи гуноҳ қилиб кўрсатила қолади.

Мана шундай сабабларга қўра Саид Аҳорийни 1930 йилнинг 12 ноябри куни ҳибсга оладилар. Лекин унинг қамалганини оиласи — хотини, бола-чақаси ҳам, бирга хизмат қилган дўстлари ҳам — ҳеч ким билмади. Орадан олтмиш йил ўтгачгина мен отамнинг ОГПУ тарафидан ҳибсга олинганидан, 1931 йилнинг априлида Москва шаҳрида отиб юборилганидан дарак топдим. Аммо даҳшатли жойи шундаки, «жиноятнома»да отамни қамоқقا олиш ҳақида ҳатто ордер — фармон йўқ. Нега? Ордерсиз қамашга кимнинг ҳаққи бор?!

Яна саволлар, саволлар, саволлар...
Бежавоб қолган саволлар.

5

1991 йилнинг жониқдан, серташвиш кунларидан туриб ҳужжатларга асосланган ҳолда аср бошига назар ташлайман.

Чақимчининг 1925 йилнинг 28 марта куни Давлат Сиёсий Бошқармасига топширган хабарида жадидлар ҳаракати ва миллий иттиҳодчилар тарихини яхши билганлиги учун ўзига маълум нарсалар ҳақидагина ёзишини билдиради:

Мен ҳам тўплаган ҳужжатларимни қайта-қайта ўқиб, фикрларканман ўша хуфянинг кўзи билан атрофга боқаман.

Унинг ёзишича, 1908—1910 йилларда туркистонлик таниқли маърифатпарвар зиёли Мунавварқори Абдурашидов, Аҳмаджон Маъзум Абдусаидов, Мирза Абдувоҳид Бурхоновлар янги усул мактаби очишни ташвиқот қилишга киришганлар. Улар мактабни ислоҳ этишни истардилар — она тили дарсини ўтиш усулига ўзгариш киритишни, таълим-тарбия масалаларини юқори савияга кўтаришни кўзда тутардилар. Бу зиёлилар янги усул — умуман янгилик тарафдори бўлгани учун уларни жадид деб атай бошладилар. Айнан шу 1910 йилларда туркистонликларни ўқиш учун хорижга — Туркияга юборадиган бўлганлар... 1911 йилда Муҳумитдин Ҳамзабеков билан Мазҳар Бурхонов ўртасида келишмовчилик пайдо бўлиб, Ҳамзабеков «Бухоро таълим маориф» уюшмасидан чиқиб кетди ва Олимжон Идрисий, Азизбек Абдуқаюмхўжа ҳамда талабалардан Ҳошим Шоик, Абдумажид Воҳидов, Абдуқаюмхўжа, Абдуқаҳорлар билан бирга Истамбулда «Турон нашри маориф» номидаги янги жамият ташкил этдилар. Бу жамият фақат бухороликлар учунгина бўлмай, балки барча турклар учун бирлашган жамият бўлганлигидан туркистонликлардан Фози Олим Юнусов, Маҳмуд Зиё, Темур, Муҳаммад Ризо, Абдураҳмон Исмоилзода ва Истамбулда истиқомат қилган Муҳаммад Саид Хўжа (Саид Аҳрорий) ҳам шу жамиятга аъзо бўлдилар. Бу иккала жамият синфий мақсадни кўзламас, балки Туркиядаги «Иттиҳоди тараққий» жамияти кўрсатмалари асосида иш юритарди холос. Иккала жамиятнинг сиёсий мақсади, ҳар қандай қилиб бўлса ҳам Бухоро амирини таҳтдан туширмасдан туриб давлат ҳокимииятида

ислоҳ ўтказишдан иборат эди. Агар амир бунга қаршилик кўрсатадиган бўлса, уни тахтдан тушириб, унинг оила аъзоларидан бошқа бирини тахтга ўтқазмоқ ниятида эди улар. Шу билан бирга Бухоро ҳукуматининг Туркия билан иттифоқ тузиши кўзда тутиларди. Туркистон ма-саласига келганда Русия билан Туркия ўртасида уруш бўлажаги ҳавода қалқиб турганлигидан; мабодо бу ҳол юз бергудек бўлса, Чор русияси истибдодидан дунё кўзга тор бўлиб кетган Туркистон фуқаролари истибдодга қарши бош кўтаришга ишончда эди бу ёшлар. Уларнинг ниятлари ҳам ўзлари каби навниҳол эди. Шу ҳол юз берса Русиядан ажралиб чиқадилар-да, Туркистон тепасига Худоёрхон авлодидан бирини қўядилар.

Лекин бу жамият аъзоларидан бир нечаси: марғилонлик Муҳаммад Ризо, қўқонлик Абдураҳмон Исмоилзода ва хўжандлик Муҳаммад Саид Хўжа (Саид Аҳрорий) ўзаро келишиб, Туркистонда хонлик барпо этишга тарафдор бўлмадилар. Тўрт йилда бир марта Президент сайлови ўтказиладиган Республика барпо этишни аъло санаганди бу ёшлар.

Ёшлар дейишимизнинг боиси бор. Бошқаларни билмадиму Муҳаммад Саид Аҳрорий бу чоқларда ўн беш ёшли гимназия талабаси эди. Шу ёшга етгунча она юрти Туркистонга атиги бир маротаба — 1908-йилда — ўн уч ёшда отаси билан келиб кетган Муҳаммад Саид юрагида у ўлкани истибдод зулмидан озод этиш иштиёқи қайдан пайдо бўлди экан?! Ижтимоий ҳаётнинг паст-баландлигини шу ёшдан қаёқдан билди?! Отаси Абдурашидхўжа савдо-сотиқ билан машғул кимса. Она юрти Хўжанддан муқаддас Хаж сафарига чиққанича қайтиб бориш насиб этмади. Туркияда қолиб кетди. Туз-насиба уни Истамбулга олиб келди. Шу ерда уй-жой қилди,

бала-чақа орттириди, савдо-сотиқ билан, сандиқсозлик билан кун кўрди. Муҳаммад Саид унинг тўнгичи (бўлса керак). Худо зеҳндан сиқмади, қўлидан китоб тушмади. Ота изидан бормай, гимназияга ўқишига кирди. Энди бўлса бу ерда ҳам тиниб-тинчимайди.

«Туркистон қачонгача оёқ ости бўлади? Қачонгача унинг бойликлари талон-тарож бўлиб ётади?» каби саволлар тинчлик бермайди унга. «Турон нашри маориф» жамиятига аъзо бўлишдан мурод ҳам ўзини қийнаган саволларга жавоб топишда эди. Мана бу ерда ҳам жавоб топмоқ қийин бўлаётиди. Жамият аъзолари фикри бир ердан чиқмаётиди. Жамиятнинг бир груп аъзоси хонлик тарафдори, улар орасидан уч киши республика тузуми тарафдори. Туркияда республикачилик гоясига қаршилар кўп бўлганлигидан бу гояни илгари сурғанлар хукумат тарафидан таъқиб қилинганлигидан республика тузуми тарафдорлари жазоланганилигидан бу уч республикачи орзуларини сир тутдилар. Бу гояни амалга ошириш борасида қилган саъи ҳаракатларини бегона кўзлардан яширин тутдилар, тайёрлаган плакат ва лойиҳаларини эълон қилмадилар — Муҳаммад Саид Хўжа хонадонида яширилганча қолиб кетди — ёпиғлиқ қозон ёпиғлигича қолди...

1912 йилда Истамбулга таниқли қрим татар адабиётчиси Исмоил Фаспирали билан самарқандлик Маҳмудхўжа Беҳбуди Русиядан келди. Республикачилик гояларини қай йўсин амалга оширишга ҳайрон юрган уч республикачи ёш ўз мулоҳазаларини Фаспирали билан ўртоқлашдилар.

Ёшлардан кўра беш-ён кўйлакни ортиқ йиртган, оқ-қорани таниган, жаҳон таниган таниқли олим Исмоил Фаспирали бу уч ёшдан маслаҳатини аямади:

— Бу яқин орада пан исломизм ёки пантур-

кизм ғояларини олға сурмоқ хаёлпаратликдан бошқа нарса эмас, — деди у ва фикрини қўйидагича шарҳлади. — Агардаки Русиядаги турк халқлари мустақил бўлишга уриниб кўрган тақдирларида ҳам, бу ҳол оврупадаги давлатлар учун намойиш қабилида кўринади, холос...

Маслаҳат сўраган ёшларнинг анг-танг қолганларини кўриб Фаспирали фикрини шарҳлаб беришга уринди.

— Яна шуниси ҳам борки, ўғлонлар, бу ишдан турк халқарининг ўзи учун ҳам ҳеч қандай наф йўқ-бўлмайди. Негаки, Оврўпо дипломатияси ишни алғов-далғов қилиб ташлайди. Туркистонда республика барпо этишда Туркиядан ёрдамни умид тутиш ҳам бир рўё. Бу борада Туркия ҳеч қандай мадад бўлолмайди. Ғояларингизни амалга оширишни ўзингиз учун муқаддас деб ҳисобласангиз, Туркияда туришингиздан фойда йўқ — ғояларингиз амали учун зарур шароит топмайсиз. Менинг сизларга маслаҳатим, она юртларингизга боринглар. Агардаки Туркистонда етарли мадад топмасангизлар Россия марказига жўнанглар, ўқишига киринглар — чукур билим олишга ҳаракат қилинглар. Юз йиллар ўрис империализми истибодида яшайди Туркистон халқи. Улар орасида республика тузуми ва пантуркизм тарафдорлари кўп бўлиши мумкин. Фақат шундай шароитдагина — барча турк халқлари бир ёқадан бош чиқаргандагина турк халқлари учун мустақилликка эришиш имкони туғилиши мумкин...

Муҳаммад Сайдхўжа ҳам, ошнолари ҳам Исмоил Фаспирали сўзларини жон қулоқлари билан тингладилар.

— Ростдан ҳам, яна бир нарсани таъкидлаб ўтмоқчиман. Менданки, маслаҳат сўраб келиб-сизларми, гапимга қулоқ тутинглар. Пантуркизм ва панисломизм ғоялари билан ўзларингизни

овораи сарсон қилмаларингиз. Бу фойдасиз ва бунинг устига амалга ошириб бўлмайдиган иш. Менинг назаримда империалистик Ўрусиянинг мустамлакачилик сиёсати остида эзилган турк халқлари бирлашиб, ҳаракатларини уйғунлаштириб озодлик учун курашмоқлари жоиз...

Бундан саксон олти йил муқаддам айтган эди Исмоил Фаспирали бу сўзларни...

Бу маслаҳат туркистонлик уч йигитга маъқул бўлди ва улар Туркистонга қайтишни дилларига тутдилар...

Мен эса бу ёзувларни ўрисчадан таржима қиласканман, ўн беш ёшидан бошлаб халқ дардини тишида тишлиб, унга малҳам бўлиш йўлларини излаган Муҳаммад Саидга ҳавасим келади.

6

Яна бу кунга қайтаман. Қўлимда ўша «Жиноятнома»нинг бошқа бир жилди. Неча ойдирки уни ўрганишда давом этаман. Саид Аҳорий ҳақида айтилаётган ҳар бир сўз мени қизиқтиради. Отам ҳақида умримда билмаган нарсаларни — ростми-ёлғонми шу ерда билаяпман.

Бир нарсага эътибор бераман. Кимдаким Саид Аҳорий ҳақида сўзларкан, албатта унинг номини «Турк изчилар тўдаси» деган уюшма билан боғлайди. Ҳақиқатан ҳам Саид Аҳорий «Турк изчилар тўдаси»ни ташкил этган. «Изчилар тўдаси»ни нима деб тушунмоқ керак? Менимча бу алоҳида мавзу бўлиши керак ва маҳсус ўрганиб рисола ёзишга арзирли мавзу.

Шунда бирдан болаликдан қайта-қайта кўравериб кўз ўнгимда муҳрланиб қолган бир суврат ёдимга тушди, «Ўқчи» маҳалласидаги «Ватан» мактаби ҳовлисида олинган бу сувратда бир қанотда қашшоф таёқларини ўнг ён-

бошда тик турган бир хилда кийинган болакайлар — кашшоффлар ва иккинчи қанотда духовой оркестр ва унинг ортида ўсмир ёшдаги талабалар, ўрталиқда қатор ўтирган ўқитувчилар ва улар орасида менинг дадам Муҳаммад Саид Аҳорий.

Нима учун «Изчилар тўдаси»? «Изчи» қай маънода келаяпти, деб кўп ўйлардим. Эндиликка келиб тушунишимча, олдинда борувчи — разведкачи маъносида бўлиши керак. Демак, бу ёшларга умид билан қаралган, уларнинг келажигига ишонч ва умид билан «Изчи», яъни издан борувчи деб аташган. Бу менинг таҳминларим...

Лекин «Изчилар тўдаси» ҳақида бошқа фикрлар ҳам бор. «Изчи тўдаси» ҳақида сўзлашдан аввал Саид Аҳорий 1919 йилда Тошкентда, Ўқчи маҳалласида ташкил этилган «Ватан» мактаби ҳақида сўзламоқ жоиз.

1927 йилларда ўзбек «миллатчилари» ва миллий ташкилотлар фаолияти ҳақидаги хабарномалардан бирида «Изчилар тўдаси» ҳақида маҳсус хабарнома бор. Бундай хабарноманинг бошқа хужжатгоҳлардан топилмаслигига ишонганимдан, ўқувчига қизиқарли бўлиши мумкин деган ўйда шу хабарни бир қисмини келтираман:

«Муҳаммад Саид, Абдуваҳоб Муродий, Фатхулла Умарий (ўзбек давлат труппаси артисти), Мир Носир (бойнинг ўғли), Мирҳамидбой, Акмал Икромов (Ўз ВКП(б) Марказий Қўмитаси масъул котиби, Аъзам Ёкуб ташабbusи билан 1918 йилнинг биринчи сентябрида «Ватан» мактаби биносида турк бой скаутлар уюшмаси «Турк изчилар тўдаси» ташкил этилди.

Биринчи ташкилий мажлисда юқорида санаб ўтилган кишилар отряд президиумига кирдилар. Ташкилотнинг доимий раиси «Бошбуғ»

қилиб Муҳаммад Саид сайланди. Абдуваҳоб Муродий — муовин, Фатхулла Умарий котиб, Мирҳамид Миршаропов — хазинабон, Мирносир, Ақмал Икромов ва Аъзам Ёқубий аъзо қилиб сайландилар.

Тўданинг олдига қўйилган мақсад: 16 ёшдан 30 ёшгача бўлган ёшларга миллий байроқ остида илм бериш, улардан мутахассислар тайёрлаш, уларни жисмоний етук қилиб тарбиялашдан иборат бўлиб, илм олиш учун хорижга жўнатиш, санъатни ривожлантириш, адабиёт ва матбуотни миллий руҳда барпо этиш, ҳарбий ўқувни йўлга қўйиш ва ахир оқибатда Туркистон халқини миллий мустақиллик учун курашчи қилиб тарбиялашдан иборатdir.

Тўда пантуркизм ва майда буржуа руҳида иш юритишига асосланган, деб ёзади чақимчи «Программасига қараганда турк миллатига мансуб (ўзбек, қозоқ, татар ва ҳакозо) бўлган ўн саккиз ёшдан ўттиз ёшгача бўлган, тўда ғояларига хизмат қилишга тайёр бўлган,uning программасини қабул қилган ҳар қандай шахс унга аъзо бўлиши мумкин. Аъзоликка ўтиш бадали (аъзо билаётган кимсанинг имкониятидан келиб чиқиб) президиум тарафидан белгиланади. Камбағал, ишсиз, ўқиши туғалламаганлардан аъзолик бадали олинмайди, балки моддий имконияти яхшиrok бўлганларга солиқ солинади.

Отряд ҳузурида қўйидаги тўғараклар ишлайди:

1. Духовой оркестр (ўзбеклар орасида биринчи духовой оркестр ана шу «Изчилар тўдаси» тарафидан ташкил этилганди).
2. Миллий мусиқа тўғараги;
3. Физкультура;
4. Театр труппаси;
5. Педагогика курслари;

6. Саводсизликни тугатиш курслари;

Бу маълумотни тарихий аҳамиятга молик деб билганимдан қисқартириб бўлсада маҳсус санаб ўтдим. Ҳозир жаҳон миқёсида бой скаутлар ташкилотларини тиклаш жараёни кетаётган бир пайтда бу хабарга ҳам ўзига яраша қизиқиш уйғониши мумкин. «Изчилар тўдаси» ҳақида маҳсус «Иш» бўлиши мумкин деган таҳминим бор. Негаки, бу тўда кейинчалик ташкил этилган «Темур тўдаси», «Тўдалар тўдаси» кабиларнинг энг биринчиси.

«...Тўданинг моддий бойлиги аъзолик бадаллари, қўйган спектаклларидан, томоша кечалари, сайдлар ва лекциялардан тушадиган тушумлар ва хайр-эҳсонлардан иборатdir, Тўда аъзоси саводини чиқаришга, илм олишга, ҳеч бўлмагандан бир ҳунар эгаси бўлишга, ҳар куни физкультура қилишга (шу жумладан ҳарбий машгулот билан икки соат шуғулланишга, иқтисод режимига итоат этишга, шахсий ҳаётда ўзгариш ясашга (овруполашибашга), ўзидан юқори лавозимдагиларга (ўқувчилар синф раҳбарларига, звено бошлиқларига, взвод командирлари ва бошқаларга) итоаткор бўлишга, тегишли форма лиbosларини озода қилиб кийишга эътиборли бўлмоғи жоиз...»

Хуфиянинг бу ёзувларига бу кунги кўз билан қаралса, «Изчилар тўдаси» қанчалар хайрли ишларни мақсад қилиб қўйганлиги намоён бўлади. Гап масалага қай кўз билан қарашга боғлиқ бўлса керак.

Муҳаммад Сайднинг 1919 йилнинг 17 октябри куни Ҳамза Ҳакимзода Ниёзийга йўлланган мактуби ҳам «Изчилар тўдаси»да маънавиятга алоҳида бир аҳамият берилганини кўрсатади.

Мана ўща мактуб:

«Адиби муҳарриримиз Ҳамза Ҳакимзода жанобларига.

Муҳтарам афандим!

15 октябрда бўлғон умумий йиғилишимизда 1200 сўм маош ила «Изчилар тўдаси» ҳайъати таҳририясига қабул этилдингиз. Бундан сўнгра Сизни ҳақиқий бир изчи деб тонувимиз ила баробар тўдамизниң ҳайъати таҳририясидан деб биламиз. Тўдамизга пъесаларингиз бўлса берувингизни ўтунув ила баробар маънавий ёрдамингизни рижо этамиз.

Буюк эҳтиром ила...»

Хат тубида Муҳаммад Сайд имзоси...

Аммо «Изчилар тўдаси» ҳақида замондошлардан бирининг бошқа бир салбий фикри ҳам бор. Оқ билан қорани ажратиб олишни ўқувчнинг ўзига ҳавола этиб, бу фикрларни ҳам айнан келтираман.

Шоир Боту 1935 йилнинг 9 феврали куни Соловкида қамоқ муддатини ўтаб юрган жойидан туриб Бутун Иттилоқ Коммунистик Партияси Марказий Қўмитасига, Сталинга ёзган аризасида барча тўдалар ҳамда жамиятлар рўзнома ва ойномаларни тилга олганида: «Изчилар тўдаси»ни пантуркистик аксилинқилобий ташкилот бўлган, «Миллий иттиҳод»нинг ошкор ишловчи қисми эди» деб ёзади, «бу гуруҳ ва тўдаларнинг асосий мақсади, вазифаси Совет ҳокимиятини афдариш ва миллий буржуа давлатини ташкил этишдан иборат бўлган» деб хабар қиласди. Боту бу мактубни ёзмасдан беш йил муқаддам «Миллий истиқлол» қонга ботирилган эди. — «Миллий истиқлол»нинг ўн беш аъзоси 1931-йилнинг 23 майида Москва шаҳрида отувга ҳукм этилган ва отиб юборилган эди. Сўнгги топилган маълумотларга кўра улардан беш нафари Москвадаги Ваганков қабристонига қўйилган.

Афсус... Қирчиллама ёшида қирчинидан қийилган эди улар... Аммо, улардан илгарироқ ҳибсга олинган Боту бу фожиалардан бехабар бўлиши мумкин...

7

Ахтариш жараёнида бир ғалати материалга рўпара келдим:

«...1917 йилда Туркистонда тўнтариш бўлганидан хабар топиб, Красноярскдаги ҳарбий асиrlар тутқунгоҳидан Муҳаммад Сайд Афанди қочади ва 1918 йил февралда Тошкентга келади.

У 1908 йилда — ўсмирилик чоғида отаси билан Истамбулдан Туркистонга келиб кетган эди. Муҳаммад Сайд Тошкентда отасининг ошнаси, Қашқар маҳаллалик катта бой Тожихўжа-никига тушади ва уникида бир ойдан ортиқ яшайди.

Шу бир ой ичида у автономия учун кураш борганидан, ёш бухороликларнинг амирга қарши кураш бошлаганидан ва мағлубиятга йўлиқ-қанлигидан, Туркистон ёшларининг заифлигидан, уламолар жамиятнинг қўли баландлигидан хабар топади.

Бу воқеалар Муҳаммад Сайдга қаттиқ таъсир қиласди, лекин ёлғизлиги туфайли ҳеч бир иш қилолмайди. Ундан ташқари бой ва уломалар вакиллари Муҳаммад Аминбек Худоёрхонов, Тожихўжаев, Орифхўжабой, Тўлаган охун, Мухторхон Аълам, Исахон Аълам (Сайднинг отасининг ошнолари ва дўстлари) Сайдни қуршаб, унга ўз таъсирларини ўтказмоқчи бўлишади. Лекин уларнинг феодаллик тарафдори бўлиб, жадидлар, ёшлар ва турли ислоҳотларга қарши эканликларини англаған Сайд улар билан бирга бўлишни истамайди ва (отасининг)

юрти Хўжандга жўнаш баҳонасида улардан ажralади.

Хўжандда Саид амакиси Валихонбобоникига тушади. (Воқеа 1918 йил эрта кўкламда ўтаётир). Билсаки, икки амакиси ва икки жияни оламдан ўтган, бир Абдувоҳид Валихонбобоев деган жияни бетоб ётган экан. (Ўша пайтларда Саидга амакисидан 400 кв. аршин ер-сув ва уйжой мерос қолган экан.) Жияни Абдувоҳид Валихонбобоев амакиваччаси Муҳаммад Саиднинг асирикдан қочганини, ҳужжати йўқлигини эшитгач қўрқиб кетади, қариндошлар меросни олгани келди деб чўчиб, ҳукуматга чақиб беришларини айтиб Муҳаммад Саидга тезроқ бу ердан жўнаб кетишини маслаҳат беради.

Муҳаммад Саид чўнтағида бир миризиз вокзалга жўнайди ва асирикдан қайтган пайтида Тошкентда Тожихўжабой кийгазган — олтин пулда ўттиз сўлкавой турадиган чопонини қофоз пулда 17 сўмга сотади-да, поезднинг иккинчи класс вагонига патта олади. Поезд Хавас станциясига етганда у Фози Олим Юнусовни учратиб қолади. Фози Олим Юнусов Саидга уч-тўрт кун Самарқандда меҳмон бўлишни таклиф этади. Ҳали ҳозир бирон ерда хизмат қилмайдиган Саид Самарқандни зиёрат қилиш, ёш бухороликлар билан кўришиш учун Фози Олимнинг таклифини қабул қиласи. Самарқандда айни олатасир тўполон пайтлари эди: бир тарафдан революциячи ёш бухороликлар Колесовнинг хиёнати туфайли қочиб кетиғанди (улар орасида Саиднинг эски қадрдонлари — Отахўжа Пўлатхўжаев, Усмонхўжа Пўлатхўжаев, Фитратлар бор эди). Бир тарафдан революциячи ёш бухороликлар оч, бир бурда нон учун ҳарқандай меҳнатга рози бўлган пайтлар, иккинчи тарафдан «Турк қадам маркази» уюшмаси аъзолари (Муҳаммад Амин Афандизода

раҳбарлигига) асосий роль ўйнашга ҳаракат қилишарди. Учинчи тарафдан эса большевиклар Самарқандда монархия жандармериясининг со-биқ агенти Ҳожи Сафо Жўрабоевни муҳтор ҳо-ким қилиб белгилагандилар ва ҳакозо...

Мана шундай шароитда «Турк ўчоги» аъзо-си Муҳаммад Саид ва «Иттиҳоди тараққий» аъзоси Фози Олим Юнусов Карл Маркс кўчаси-даги «Гранд Отель» меҳмонхонасининг 1-номе-рида ўтириб, ўзаро қуидаги мазмунда битим тузишади: «Ҳозирги кунда ҳеч қандай жадид ташкилотлари билан бирлашиб иш олиб бориш имкони йўқ, қолган турклар заиф, ўzlари ҳам хатарда. Фитрат Бухорода мағлубиятга йўлиқиб обрўсизланиб қолди. Мунавварқори ва унинг тарафдорлари муҳторият учун қилинган ҳара-катлари туфайли қоралангандилар. Шунинг учун ҳам уламоларнинг Саидга эътиборидан фойда-ланиб, улар билан вақтинча бирлашиб, улар розилиги ва улар ёрдами билан «Турк ўчоги» уюшмаси ташкил этадилар. Сўнг бу уюшмага жадидларни жалб этиб, пайтини топиб ҳамма уламолар ва хонзодаларни уюшмадан чиқариб юборадилар...»

«Турк ўчоги» — социал-сиёсий ва маданий оқартув турк ташкилотидир. Унинг шиори турк миллатини сиёсий-иқтисодий ва маданий асо-ратдан қутқариш ва ҳақиқий турк маданиятини барпо этишдир. Унинг мақсади — миллатчилик байроғи остида туркистон туркийларини (яъни ўзбекларни) бирлаштириш ва уларга миллий руҳ, миллий гоя ва миллий тарбия беришдир: туркистон ҳудудида истиқомат қилганларга тур-кий ҳалқ фарзандлари эканликларини тушун-тириш ва улар орасида қабилачилик адсоватлари ўрнига бирдамлик ва меҳр-оқибат уругини со-чиш кўзда тутилади; миллий урф-одатларга му-вофиқ ҳалқнинг маданий савиасини қўтариш,

савдони, дәхқончиликни, саноатни ривожлантириш, ҳамда турк маданиятини барпо этиш ва шу йўл билан туркистонлик туркийларнинг моддий қудратини оширишни кўзда тутади. Бу жамиятнинг фояси — пантуркизмидир».

Юқоридагиларни ўқирканман, ўйлайман: «Нега энди ўз халқи онгини оширишни, уни маърифатли қилишни кўзлаган кимса миллатчи деб қораланиши керак? «Миллатчи» деган сўз нега энди гуноҳкор деб тушунилиши керак?! Миллатчи дегани миллатпарвар дегани эмасми?

Хуфиянинг ёзишича Самарқанддалик чоғида Муҳаммад Сайд Фитрат билан, Отахўжа ҳамда Усмонхўжа билан фикрини ўртоқлашади. Лекин булар «Турк ўчоги»ни ташкил этишини маслаҳат кўришмайди. Усмонхўжа орқали Муҳаммад Сайд ёш бухоролик инқилобчилар раҳбари Файзулла Хўжаев билан танишади. «Турк ўчоги», «Турк сўзи», «Ватан» мактаби ва «Изчилар тўдаси» ҳақида Давлат Сиёсий Бошқармасига йўлланган машинкада 35 саҳифадан иборат бир ахборотда юқоридаги фикрлар давом эттирилиб шўнданай қўшимча қилинади:

«...Муҳаммад Сайднинг уламоларга, Фози Олимнинг Худоёрхоновларга таъсири ўлароқ 1918 йилнинг апрелида Тошкентда «Турк ўчоги» ташкил этилади. Бошда Фози Олим раис, Муҳаммад Сайд саркотиб, Темурбек Худоёрхонов ғазначи қилиб тайинланади. Уламолар жамияти раиси Тўлаган Охун, Муҳаммад Аминбек, Нуритдинбек, Исломбек Худоёрхоновлар президиум аъзолари бўлиб қоладилар.

Бу жамият иш бошлаган биринчи ҳафтада унинг ҳузурида икки синфли жадид мактаби очилади ва Муҳаммад Сайд ихтиёрига берилади, май ойининг охирида эса Тошкентда Темурбекнинг расмий муҳаррирлиги, Муҳаммад Сайднинг сиёсий раҳбарлиги ва адабий таҳри-

ри остида «Турк сўзи» номида (ҳафтада икки марта чиқадиган) рўзнома чоп этила бошлайди».

Шу ўринда мен бир нарсани таъкидлаб ўтишни истардим. Юқорида тилга олиб ўтилган уюшма ва жамиятлар ҳақида ҳеч ерда, ҳеч қандай маълумот топмадим, бу ҳаракатлар тарихини ўрганишда асқотиб қолиши мумкин деган ўй билан бу маълумотларни батафсилоқ келтираётиман. Ушбу ахборот менга анча қўл келди. Бундаги фактларнинг неча фоизи ҳақиқатлигини билмасамда, шу чоққача мени қийнаб келган кўпгина саволларимга жавоб топдим.

Масалан, мен Саид Аҳрорийнинг Файзулла Хўжаев билан бирга ишлаганини, Саид Аҳрорий ёш бухороликлар қўмитаси саркотиби, Бухоро Коммунистик партияси аъзоси бўлганини билардиму, лекин дадам билан Файзулла Хўжаев бир-бири билан қай йўсин танишганини билмасдим. «Саид Аҳрорий Тошкентда бўлса, улар қандай танишишди экан?» деган саволимга хуфиянинг ахборотдан жавоб топдим.

Бу ахборотда яна рўзноманинг ношири «Турк ўртоқчилиги» деган кичик бир ширкат бўлиб, Муҳаммад Аминбек, Нуриддинбек, Исломбек ва Темур Худоёрхонов, Исахон Аълам, Мухторхон Аълам ва Фози Олимлар бу ширкат аъзолари эканлиги санаб ўтилади...

«Расман ширкат масъул котиби Темурбек бўлса ҳам, аслида бу вазифани «Турк сўзи» рўзномасининг раҳбари, адабий муҳаррири Муҳаммад Саид бошқарар эди» дея таъкидланади.

Ҳужжатларни ўрганишни давом эттирас эканман рўпарамда менинг кенжা ўғлим Маъсудхон тенгдоши — 22 ёшли Муҳаммад Саид гавдаланади. Бу ёшгача не савдолар тушди унинг бошига. 1914 йилда ўн тўққиз ёшда

Туркияда I Жаҳон урушига сафарбар этилади. Дарданель ва Галициядаги жангларда иштирок этади. 1916—1917 йилларда Красноярскдаги ҳарбий асиirlар лагеридаги тутқунлик йиллари ва 1918 йил февралида — қаҳратон қишида чүнтагида бир чақа пулсиз лагердан қочиш... Бу саргузаштларни болалигимизда онамиздан худди эртак эшитгандек тинглардик...

Муҳаммад Сайд эндигина йигирма уч ёшга кирган. Унинг 1919 йилда Тошкентда бўлиб ўтган тўйида куёв навкарлар ўрнида «Изчилар тўдаси» аъзолари машъалалар кўтариб, қўшиқ куйлашиб Шайхонтоҳурдан Хадра тарафга — Ҳовузбог маҳалласига, Абдураҳмон эшон хона-донинга йўл олади. Куёв эшикдан кириб келгунга қадар ичин-ташин ҳовлиниң майдон тарафида бобом Абдураҳмон эшон Ойтўрахон бувимга зуғум қилиб: «Қизингни кимга бераяпсан?!» — деб қувалаб юрган бўлади.

Бу воқеаларнинг содир бўлишигача ҳали яна узундан-узун би-и-ир йил бор. Сайд Аҳорорий бу бир йил ичида Низомитдин Хўжаев, Саъдулла Хўжа Турсунхўжаев, Фатхулла Умаровлар билан танишади, бир-бирлари билан фикрлари тўғри келмайди, Шайхонтоҳурдаги «Равнақ» китоб дўконида дуч келишганида Низомитдин Хўжаев: «Хей! Истамбулда ўқиган уламо» деб гап қотади Муҳаммад Сайдга. Лекин Сайд бўш келадиган анойилардан эмас. «Хой, сиз сиёсий сўқирлар! Бу ерда тўпланиб гийбат қилиб тургандан кўра «Ўчоқ»قا кириб, халқقا маърифат бериш билан шуғуллансангизлар бўлмайдими» — деб таъна қиласи Муҳаммад Сайд уларга. Бу икки тараф орасидаги зиддият узоқ давом этмайди. Рўзноманинг тўртингчи сони чиқадиган куни Мунавварқори ариза билан келади ва Муҳаммад Сайд уни «Турк ўчоги» аъзолигига қабул қиласи. Улар: «Ўчоққа» жадидларни жалб

этиш, «Турон» билан «Турк ўчоги»ни бирлаштириб, аъзолари сони кўпайгач, «Турк ўчоги»дан барча уламочилар ва хонзодаларни чиқариб юбориш масаласини оғзаки келишиб олишади.

Бу хабарномада шундай дейилади:

«Рўзноманинг «Турк сўзи» олтинчи сонида Муҳаммад Сайд уламоларга ва инглизларга қарши «Англиянинг сўнг умиди» деган мақола чоп эттиради. Бу мақолада муаллиф инглизларнинг мақсади Туркистонни босиб олиш эканлигини, Бухоро амири ва уламолар инглизларнинг малайлари эканини очиқдан-очиқ эълон қилади».

Худди шу куни Тўлаган Охун «Турк ўчоги» биносида шу жамият президиумининг шошилинч мажлисини чақиради. Бу мажлисда президиум аъзолари инглизларнинг Туркистон ва Бухорони ўрислар зулмидан озод этгувчилар эканини исботлашга уринишади. Сайд бу фикрга қўшилмайди ва уларга қисқагина жавоб қилади: Агар Туркистон билан Бухорога озодлик керак бўлса, халқ ўзи бош кўтарсан. Хорижий давлатларнинг бизга аралашуви керакмас. Агар инглизларнинг текин эркинликлари бўлса, уни Ҳиндистон билан Мисрга беришсин...

Хулласи калом, тараф-тараф бўлиб, тортторт қилишлар оқибатида «Турк ўчоги» ҳам «Турк сўзи» рўзномаси ҳам ёпилади. Фақат «Турк ўчоги» хузуридаги йигирма талабанинг бошини қовуштирган бепул мактабгина ишини давом эттиради. Мактабда Муҳаммад Сайд она тили, жўкрофия, умум тарихдан, Абдуваҳоб Муродий математика ва табиатшунослиқдан, Абдураҳмон Исмоилзода расм ва қўл ҳунаридан хизматлари учун ҳақ олмай дарс беришарди.

Миллий руҳ ва миллий тарбия билан машғул бўлган мана шу кичкинагина мактаб яна

бир неча ой ишини давом эттиради. Рамазон оқшомларидан бирида бу мактаб талабалари бир хилда камзул кийишиб, кашшоф таёқларини күтаришиб саф тортишиб Шайхонтоҳурга чиқдилар, миллий қўшиқ куйлаб, гимнастика машқларини адо этиб, ҳамманинг дикқатини жалб этдилар. Айнан ана шу кундан бошлаб, бу мактабга ўғлонини етаклаб келувчи оталар кўпайганидан кўпаябошлади...

Олтмиш йил мобайнида отам ҳақида исмисаби, қаерда хизмат қилганидан бошқа ҳеч нимани билмаган бўлсам, энди мен унинг ўн беш ёшида қўйган қадамидан воқифман. Ҳа, шундай. Ишониш қийин. Ўзим ҳам ҳали-ҳануз ишонмайман. Ҷақимчиларнинг ёзувларини қандай бўлса шундайлигича дикқатингизга ҳавола қилаётиман. Бу дадам эди-ку, деб яхсини оширмадим, ёмонини яширмадим. Мен учун бир нарса қимматли: Муҳаммад Саид Аҳорорий қандай ишга қўл урмасин, у газета муҳаррирлиги бўладими, давлат маҳкамаларидаги раҳбарлик ишлари бўладими, ёки педагогикага доир ишлар жон-жаҳди билан ихлос билан киришган, ҳалқ манфаатини биринчи ўринга қўйган. Шу муносабат билан ғалати бир ҳужжат устида тўхталиб ўтаман. Бу ҳужжат собиқ Бухоро миллий ташкилоти ҳақида. Неча йиллар мобайнида Саид Аҳорорийни кузатиб юрган чақимчи билан 1927 йилнинг 24 апрелида бўлган суҳбатидан қисқартириб таржима қиласяпман: «...Собиқ Бухоро Ҳалқ Шўролар Жумҳурияти Ревкоми раиси, ҳозирда Тожикистон Ҳалқ Комиссарлари Совети раиси Мирза Абдуқодир Муҳитдинов чақиртиради-да, Саид Аҳорорийга дейди:

— Саид Афанди. Сиз яхши одамсиз. Ҳақиқий миллатчи ва ташкилотимиз аъзосисиз. Ташкилотимиз Сизга ишониб бир жиддий топ-

шириқ бермоқчи. Сиз уни бажаришингиз кепрак.

Саид Аҳорий бажараман, деб сўз беришдан аввал қандай топшириқ бермоқчиларини сўради.

Мұхитдинов одатда ташкилот аъзолари ичадиган қасамдан ташқари Саид Аҳорийни мусулмон фарзанди сифатида ҳаммасини сир тутиш ҳақида яна алоҳида қасамёд қилдириради-да:

— Ташкилотимиз Чоржўй яқинида Аму Дарё устидаги кўприкни портлатиб юбормоқчи. Бу ишни амалга оширишни ташкилот сизга топширади...

Бунга жавобан Саид Аҳорий, миллатчи бўлишидан ва ташкилот аъзосилигидан қатъий назар, бу тадбирни нотўғри деб ҳисоблагани учун, ўрисларга қарши бўлгани ҳолда бу топшириқни бажаришга рози эмаслигини айтади, зеро кўприк ўрисларнинг пулига ва ўрисларнинг қўли билан бунёд этилмаган, балки мусулмонларнинг қўли ва маблафи билан бунёд этилганини айтади, унинг фикрича, бундай қилиш мусулмонларга қарши курашнинг айнан ўзгинаси бўлишини ва бундай қилиш амирнинг қилғилиқларидан ҳам баттарлигини таъкидлайди. Кейинчалик ҳеч ким буни қайта тиклашни эплолмаслигини, Бухоронинг маблафи камлигини, бу ишда ёлғиз Англия ёрдам бероалишини лекин бу — мусулмонларнинг ўрислар истибодидан қутулиб, Англиянинг ўрисларни кидан қолишмайдиган истибоди остида қолажаги эканини исботлашга уринади. Шундан кейин Мұхитдинов Саид Аҳорийга ташкилот аъзоси сифатида топшириқни бажариши жоизлигини айтиб, таклифини такрорлайди, топшириқни бажармаган ташкилот аъзоси ташкилотдан чиқарилиши ва кейинчалик йўқотилишини эслатади. Саид Аҳорий бу топшириқнинг но-

тўғрилигини миллий ташкилотнинг асл нияти бундай эмаслигини айтиб, топшириқни бажаришдан иккинчи бор бош тортади...

...Бундан ташқари, миллатчи бўлгани ҳолда бундай топшириқни бажо келтирмаслиги устига, мабодо бошқа бирор тарафидан ёки ҳатто Англия тарафидан кўприк портлатиладиган бўлса бу тўғрида ўзи Бухоро Ҳалқ Шўролар Жумҳурияти Ҳокимиятинигина эмас, балки РСФСР вакили ва алоҳида бўлимга билдиражагини, бутун масъулият Муҳиддинов зиммасига тушажагини айтади...»

Хужжатларнинг ҳикоя қилишича ўша даврнинг зиёлилари ва улар қаторида Саид Аҳорий ҳам ўртамиёна яшаган. Ортиқча мол-мулки бўлмаган. Саид Аҳорийнинг ҳибсга олинганда тўлдирилган анкетасида мусодара қиласидаги мол-мулки йўқ, деб кўрсатилган. Ана шундай одам бўлган экан менинг жойлари жаннатда бўлгур отагинам.

Шундай қилиб бу хужжатгоҳдан мен отам Муҳаммад Саид Аҳорийнинг ўн йиллик меҳнат фаолияти давомида қаерда хизмат қилганини ҳам аниқладим:

1. «Турк ўчоги» уюшмаси ташкилотчиси ва раҳбари;

2. «Турк сўзи» газетасининг адабий муҳаррири;

3. «Ватан» номли мактаб ташкилотчиси ва раҳбари;

4. «Изчилар тўдаси» уюшмаси ташкилотчиси ва раҳбари;

5. «Ёш буҳороликлар» қўмитаси саркотиби;

6. «Бухоро Ҳалқ Шўролар Жумҳурияти давлат нашриётининг директори;

7. «Бухоро ахбори» газетаси муҳаррири;

8. Бухорода чиққан «Ёш ленинчи» газетаси таҳририяти аъзоси;

9. Бухоро халқ шўролар жумҳуриятининг
Озарбайжондаги муҳтор элчиси;

10. «Озод Бухоро» газетаси муҳаррири ўрин-
босари;

11. Бухоро халқ шўролар жумҳурияти Но-
зирлар Кенгаши аппарати ходими;

12. Молия халқ комиссарлиги ходими;

13.»Зарафшон» газетаси ходими;

14. Самарқанд молия-иқтисод техникуми
ўқитувчisi.

Сайд Аҳорорийнинг Сталин даври қатли оми
курбони бўлганидан хабар топгач, бир масала
мени ўйлантириб юарди. 1937 йилларда қа-
малганларнинг кўпларининг оила аъзолари ҳам
бадарга қилинган. «Нега бизнинг оила бу жазо-
дан халос бўлиб қолди экан?»

1991 йилнинг 30 январида «Литературная
газета»нинг № 4 (5330)-сонида бу саволимга
жавоб топдим. Газетадан ўзбек тилига афдариб
диққатингизга ҳавола қиласман.

СССР МАРКАЗИЙ ИЖРОИЯ ҚЎМИТАСИННИГ 1934 ЙИЛ 8 ИЮНЬ ҚАРОРИ

(М. Калинин ва А. Медведев имзо чеккан.
РСФСР, Украина ва бошқа жумҳуриятлар жи-
ноят мажмуасига ўша йилнинг август ойида
киритилган. Бир қанча қисқартириш билан бе-
рилаяпти).

1. Ватанга хиёнат... айнан: жосуслик, ҳар-
бий ёки давлат сирини ошкор этиш, душман
тарафга ўтиш, қочиш ёки чет элга учеб ўтиш
олий жазога — отувга, мол-мулки мусодара қи-
лувга, енгиллатувчи ҳолатлар бўлганида 10 йил
озодликдан маҳрум қилувга ва мол-мулки мусо-
дара қилувга ҳукм этилади...

Хоиннинг балоғат ёшидаги оила аъзолари,
хиёнат содир этилган пайтда у билан бирга

яшаган ёки қарамоғида бўлганлар беш йилга Сибирнинг узоқ ўлкаларига бадарға қилинади ва сайлов ҳуқуқидан маҳрум этилади...»

Демак, бу қарор 1934 йилда чиққан бўлиб, 1930 йилларда қамалганларнинг оиласи бунинг азобидан «бебаҳра» қолганлар. Шунисига ҳам шукур. 1937 йилларга келиб маҳкум этилганлар оиласлари ана шу 1934 йилда М. И. Калинин имзо чеккан қарор азобини тортган эканлар. Мен яшаган тоталитар давлатда ўз фуқаросига берадиган азоб-уқубатлар турини кашф этишда қанчалар моҳир арбоблар бор-а!

Шу «йиш»ни ўрганиш асносида мен отувга хукм этилган ўн беш нафар «Миллий истиқлол»чилар Москва шаҳридаги Бутирка турмасининг Шарқ бўлимида азоб чекканларидан хабар топдим. Бутирка турмасида маҳсус Шарқ бўлимининг ташкил этилишининг ўзи куни кечагина революция шарофати билан чоризм истибдодидан фориғ бўлдик деб ўйлаган Ўрта Осиё ҳалқларининг қаттиқ исканжада тутиш сиёсати эди. Яқинда мен СССР Ёзувчилари уюшмаси аъзоси Андрей Владимирович Станишевский (Азиз Ниалло)нинг 1958 йилнинг 29 сентябрида шоир Боту ишининг қайта кўрилиши муносабати билан «Ўзбекистонда миллий ҳаракат масаласига доир» деган хатини ўқидим. Станишевский, ўзининг ёзишича, 1926 йилнинг майидан 1927 йил ўртасигача ППОГПУнинг Ўрта Осиё Шарқ бўлимида ишлаган, кейинчалик адабий фаолият билан шуғулланган экан. Бу ҳақда у шундай ёзади:

«Бутун Иттифоқ фавқулодда комиссияси марказий аппаратида Шарқ бўлими ташкил этилганлиги мамлакатнинг колониал чекка ўлкаларида партиямизнинг шарқ сиёсатининг намоён этилишидир. Шарқ сиёсатича В. И. Лениннинг коммунистик интернационалнинг

II съезди учун тайёрлаган миллий ва колониал масалалари бўйича илк тезисларда айниқса ёрқин ифодалангандир». Бундан маълум бўладики, Совет давлати ўзининг илк одимлариданоқ миллий жумҳуриятларни қаттиқ қўл остида сақлаш сиёсатини белгилаган. Миллий ҳаракатларни ўрганиб; миллатпарварлар сафини ишдан чиқаришга, ўз ораларидан хабаркашларни тайёрлашга ҳаракат қилган, ахир оқибатда репрессияни қўллаган. Кенг миқёсда қўллаган.

Ана шунаقا гаплар...

Бу «Жиноятнома» билан танишар эканман ўзимдан ўтганини ўзим биламан ва ёлғиз худо билади. Баъзида: «Нега энди бу баҳтиқароликларга йўл қўйдинг?! Бу бояқишлиарнинг халқ-парварлигидан ўзга гуноҳи йўқлигини сен билар эдинг-ку...» — дея нола чеккан пайтларим ҳам бўлди. Мунавварқори Абдурашидовнинг: «Менинг ихтиёrim сизларда, сизнинг қўлингизда бир чивинчалик ҳолим бор. Бир бармомингиз билан эзиб ташлашингиз мумкин», — каби сўзларини ўқиганимда дилимдаги оҳим кўкка ўрлаб, бутун жисмимда оғриқ ҳис қилиб инграб юбораман. Умрим бино бўлиб ҳеч қачон кўрмаган, у тўғрида фақат мана шу «Жиноятнома»ни ўқиб билганим бу маърифатпарвар инсон дардига шериклик мени кеча-кундуз баробар қийнайди. Ёши ўттиз олтига етмай, Мунавварқори билан бир кунда отиб юборилган отам ва у билан бир қарорга асосан отилган яна ўн тўрт баҳтиқора кўз олдимда мўлтираб тургандек: «Биз бегуноҳмиз! Бегуноҳмиз!.. — деб нола чекаётгандек бўлади...

«Дод!» деган фарёд кўтарилади дилимда. «До-о-о-д!» Қалбим тубидан кўтарилган бу фарёд Ҳимолай тоғлари оша ўрлаб кетгандай бўлади, умрим бўйи кўрганим бедодликлардан

қон ютган қалбим тубидан чўккан аламлар ифодаси бўлиб янграйди.

Менинг отамнинг ва у каби ноҳақ азоб чеккан, отувга ҳукм этилиб, отиб юборилган истиқлол учун кураш йўлида қурбон бўлганларнинг хуни кимни тутиши керак? Ҳозирги уйғониб келаётган авлод, мустақилликни қўлга олган авлод уларнинг ёдини агадийлаштириш учун нима қилаётир?

«Миллий истиқлол» уюшмасининг бирнечча ўн аъзоси ҳибсга олиниб, улардан ўн беш киши 1931 йилнинг 25 апрели куни Москва шаҳрида ОГПУ Коллегиясининг судлов қарорига кўра отувга ҳукм этилган ва отиб юборилган. Уларнинг кўпчилиги РСФСР Жиноят Мажмуасининг 58.2, 58.3, 58.4, 58.6, 58.10 моддаларига кўра ўн, ўн беш йиллаб қамоқ жазосига маҳкум этилган ва улардан ўн беш нафари 1931 йилнинг 25 апрели куни Москва шаҳрида ОГПУ Коллегиясининг судлов қарорига биноан отувга ҳукм этилган ва Москва шаҳрида отиб ташланган...

«Бу даҳшатли эллик саккизинчи модда қаердан пайдо бўлдию, қанча одамнинг бошини еди?» — деган саволлар мени даҳшатга солиб келди...

Куни кечагина шу саволимга жавоб топдим. «Известия» газетасининг 1992 йилнинг 23 апре-лидаги сонида Дмитрий Волковоновнинг «Шафқатсизларча қатъият билан...» сарлавҳали мақоласини ўқидим. Юрагим дилдираб, руҳим тўнғиб, алам-изтироб билан ўқидим. «Наҳот! Наҳот шу рост бўлса! Наҳот бутун умрим алданиб ўтган бўлса!» деган нидо қалбимни поралади. Ленин номини беш ёшимдан ардоқлаб ўсган бўлсам, бутун умрим алдам-қалдам ичидагутиб кетган экан-да?! Алданган бир менгинами? Бутун бир авлод, бутун бир халқ алданган,

панд еган бўлса-я? Даҳшат!!!» — деган ўйлардан дунё тор кўринади кўзимга...

Мақола муаллифи ўзининг Лениннинг дастхатига мансуб қоралама сақланган ҳужжатгоҳда бўлганини, зирҳланган эшик орқасида халқ кўзидан пана бу ҳужжатгоҳда Ленин дастхатига доир, ҳеч қачон матбуот бетини кўрмаган 3724 ҳужжат неча-неча йиллардан бери сақланиб келишини айтаркан, ўша хат ва ёзувлардан мисоллар келтиради. Ўша ёзувлардан бир нечасини ўрисчадан таржима қилиб диққатингизга ҳавола этаман. Мана доҳиймиз Лениннинг 1918 йилнинг 11 августида Пенза коммунистларига ёзган мактуби:

«Ўртоқлар! Беш бўлисдаги кулакларнинг исёнини шафқатсизларча бостиromoқ даркор. Бутун революциянинг манфаати шуни талаб этади, зеро эндиликда ҳамма ерда кулакларга қарши «сўнгти қатъий кураш» бормоқда — ибрат кўрсатмоқ лозим.

1. Ҳаммага аён бўлган кулаклар, бойлар, золимларнинг юзтачасини осмоқ (халойиқ кўрсин учун албатта осиш) керак.

2. Номларини эълон қилмоқ керак.

3. Буғдойларнинг барини тортиб олмоқ керак.

4. Кечаги телеграммага биноан гаров белгиламоқ керак.

Шундай қилмоқ керакки, юз чақирим теварак атрофидаги халойиқ кўрсин, қалтирасин...

Мактубни олганингизни ва бажарганингизни телеграф орқали хабар қилинг.

Сизнинг Ленин.

«Қатъиятли одамлар топинг».

Даҳшат... Бу даҳшатли мактубнинг муаллифи наҳотки бизнинг Ленин?! Биз гўдакликдан то умр поёнига қадар отай бузрукворимиздек

эъзозлаган, буюк даҳо деб таниган кимса қала-
мига мансуб бу даҳшатли кўрсатма?! Ахир биз-
нинг жумҳуриятда ҳам бу кўрсатмалар асосида
озмунча хонадон қувфинга йўлиқдими?!

Лениннинг Т. Крестинский деган кимсага
йўллаган кичкинагина ёзувини диққатингизга
ҳавола қиласман. «Яширинча террорга ҳозирлик
кўрилсин: албатта — ва зудлик билан».

Бир биридан даҳшатли бу ёзувларни ўқир-
канман булардан баттариға дуч келаман деб си-
ра ўйламайман. Тўсатдан мени ўйлатган 58-
модданинг келиб чиқишига асос бўлган ҳуж-
жатга рўпара келдим. Адлия ҳалқ комиссари Д.
И. Курскийга ёзган хатида Ленин шундай дей-
ди: «...Тарғибот ва ташвиқот ёки ҳалқаро бур-
жуазиянинг капитализм ўрнига келган комму-
нистик тузумни тан олмаган қисмига ёрдамла-
шишга уринган уюшмаларда қатнашганлик...
энг олий жазога лойиқдир. Юмшатувчи ҳолат-
лар бўлган чоғда озодликдан маҳрум этмоқ ёки
чет элга қувфин қилмоқ керак». Кўриниб туриб-
дики, РСФСР Жиноят Мажмуасининг 58-мод-
даси шу тариқа пайдо бўлган ва миллионларча
Совет кишилари шу модданинг турли бандлари
 билан, баъзида бир неча бандлари билан бира-
кай айбланиб отиб юбориладилар, тутқунгоҳ-
ларни тўлдирадилар...

Жумҳуриятимизда истиқлол учун жонкуяр-
лик қилган «Миллий истиқлол»чилар ҳам ай-
нан шу модда билан айбландилар — ноҳақлик
курбони бўлдилар.

1931 йилнинг 25 апрелида РСФСР Жиноят
Мажмуасининг 58-моддаси билан отувга ҳукм
этилдилар, Москва ва Тошкент шаҳрида отиб
ташландилар.

Мана ўша ноҳақлик қурбонлари:

1. Мунавварқори Абдурашидов
2. Салимхон Тиллахонов

3. Фулом Икромов
4. Мирҳалил Каримов
5. Нажмитдин Шераҳмедов
6. Толибжон Мусабоев
7. Асадулла Хўжахонов
8. Усмонхўжа Тўхтахўжаев
9. Исройлжон Йброҳимов
10. Тангириқулҳожи Мақсудов
11. Ҳасанқори Ҳоний
12. Зайнутдинқори Насриддинов
13. Мулла Файбуллу Дадамуҳамедов
14. Абдуллабек Мусабеков
15. Саид Абдурашидович Аҳорорий (менинг отаи бузрукворим).

Буларнинг бари интервенция йўли билан Совет ҳукуматини йўқ қилиш ва буржуа мустақил Ўзбекистон давлатини барпо этишни мақсад қилиб қўйган «Миллий истиқдол» номидаги аксилинқилобий ташкилот тузишда айблангандар.

Истиқдол йўлида шаҳид кетган ҳамюртларимизни аллоҳ-таоло раҳмат қилсин.

Дадамга доир ҳужжатларни ўрганарканман қиёси топилмайдиган қонунсизликнинг шоҳиди бўлдим:

Бирламчи, Саид Аҳорорийни ҳибсга олишга ижозатнома — ордер бўлмаган. Қамаш ҳақида ордер бўлмагани ҳолда қай йўсин уни ҳибсга олишди экан?

Иккиласми, Саид Аҳорорий ҳибсга олингач тўрт ой давомида тергов қилинмаган. У Москва шаҳрида Бутирка турмасининг шарқ бўлимида қамоқда ётган. Савол туғилади: Москвада ҳам унинг ордерсиз қамалганлигини пайқамадилармикин? «Эчкига жон қайғу, қассобга гўшт» деган мақол беихтиёр ёдга тушади. Эътибор қилинг; 1930 йилнинг 12 ноябрида ҳибсга олинган ва то 1931 йилнинг 14 февралигача тергов-

сиз ётган. Сўнг уни икки кунда олти марта сўроқ қиласидар: 1931 йилнинг 14 февраля куни беш марта ва 25 март куни яна бир марта. Уч терговда Акмал Икромов билан бўлган учрашувлари тафсилотлари суриштирилади, бир бор Мунавварқори билан кўришганликлари сабабини аниқлашга уринишади, сўнгги терговда «Изчилар тўдаси»га доир материаллар ва Боту билан муносабати суриштирилган.

Сайд Аҳорийни ОГПУнинг вакили тергов қилган. Дадамга доир тергов протоколини қайта-қайта ўқирканман, Сайд Аҳорийнинг сиёсий қараашларига доир бир оғиз сўз топмайман, бундай маълумотларни бошқа маҳбусларнинг терговидаги дадам ҳақидаги мулоҳазаларида ҳам учратмайман... Астағфурулло! Бу нима деган гап? Демак, мен умр бўйи дийдорига зор-интизор бўлган отаи бузрукворим бегуноҳдан бегуноҳ, «Ҳар эҳтимолга қарши» отиб юборилган экан-да...

О-о-олтмиш йилдан сўнг топдим отам изини. Лекин қувонмоғим керакми ё қуюнмоғим, аза очмоғим керакми — билмайман. Дўст-ёрларим менга: «Қувонгин» дейишади. «Ҳар ҳолда отанг изини топдинг-ку!» Лекин дилимда қувончдан асар бўлмаса қандоқ қиласай?

Ўттиз олти ёшдаги яшашга иштиёқманд, куч-қувватга тўла отамни 1930 йилда йўқотсада, олтмиш йилдан сўнг асфаласофинга жўнатиб юборилганидан дарак топсам...

Юрагим куяди. Дадамга, дунёга келмай қолган жигарларимга, йигирма беш ёшида тул қолган, гулдай умри хазон бўлиб кетган онам Вазирахонга қалбимда аза тутаман.

Мен қалбимда кўпларга аза тутаман. Умрим бино бўлиб ҳеч қачон кўрмаганим, Истамбул шаҳрида Нури Усмония сўқмоғида умр гузаронлик қилган бобом — сандиқсоз Абдурашид-

хўжа Аҳрорга, мен ҳатто исм-шарифларидан ҳам бехабар бўлган, ўн тўққиз ёшли ўғлони Муҳаммад Саидни 1914 йилда жаҳон урушига кузатиб қолганидан кейин ўла-ўлгунча йўлига кўз тиккан, биз набиралари ҳеч қачон бағрида исинмаган бувижонимга ва Истамбулда яшаб қолган Акрам амаким ва Асмо аммамга аза тураман, улар авлодларини кўмсаб яшайман. Дилемда тилимга чиқмаган фарёд янграйди ва бир савол менга тинчлик бермайди: педагог, журналист, драматург ва дипломат Саид Аҳорийнинг ўлими кимга керак эди ва нега? Дадам билан бир кунга ўлимга ҳукм этилган халқнинг сара фарзандлари ўлими, ўттиз еттинчи йиллардаги ҳадсиз-ҳисобсиз қирғин баротнинг илдизи қаерга боради?! Буларнинг барининг хуни кимнинг ёқасидан тутмоги керак?!

Ҳужжатларни ўрганаракман ғалати бир фактга рўпара келаман. Эсингида бўлса иш бўйича ўн беш киши отувга ҳукм этилганди. Лекин қанчалар диққат билан ўрганмай «Жиноятнома»да саккиз кишининг: Мунавварқори Абдурашидов, Салимхон Тиллахонов, Гулом Икромов, Мирҳалил Каримов, Нажмутдин Шераҳмедов, Толибжон Мусабоев, Тангириқулҳожи Мақсудов ва Саид Абдурашидович Аҳорий хусусида отув ҳақида ҳукм ижро этилганини аён этувчи справкани кўрмадим.

Ёдингида бўлса, ҳикоямнинг бошларида менинг аризамга берилган жавобда Саид Абдурашидович Аҳорий 1931 йилнинг 25 апрелида РСФСР Жиноят Кодексининг 58—4 моддасига кўра отувга ҳукм этилган ва худди ўша куни Москва шаҳрида отилганлигини ёзган, дегандим. Лекин ҳужжатлар билан танишиш жараёнида дадамнинг отилганлиги ҳақидаги справкани кўрмадим.

«Бу қанақаси бўлди?!» — деб юбордим ҳай-

рат ичида. Негаки, ўн беш кишини отув ҳақидаги қарордан қейинги 113-саҳифага бир ҳужжат тиркалганди. Уни русчадан ўзбекчага ағдариб эътиборингизга ҳавола қиласан.

«ЎРТОҚ ЗУБКИНГА, ИККИНЧИ НУСХАСИ ЎРТОҚ ОЛЬСКИЙГА» деб ёзилган-у қора қаламда Дъяковга деб қўшимча қилинган.

ОГПУ Суд Коллегиясининг 1931 йил 25 апрелидаги мажлисининг Мунавварқори Абдурашидов, Салимхон Тиллахонов ва бошқалар, шу жумладан 87 кишига доир ҳукмнинг ижроси то ЦККдан партия аъзоларига доир масала кўрилгунга қадар бутун иш юзасидан тўхтатилсин.

ОГПУ Ҳайъатининг саркотиби
29.04.31 йил.

(Буланов)

Эътибор беринг. Ёзишма сўнгида 1931 йилнинг 29 апрели санаси кўрсатилган. Демак, бу кунга қадар ҳукм ижро этилмаган. Отувга ҳукм этилган ўн беш тутқун ҳали ҳаёт. Аммо менга берилган маълумотга кўра отам Сайд Аҳорий 1931 йилнинг 25 апрелида отувга ҳукм этилган ва шу куниёқ Москва шаҳрида ҳукм ижро этилган.

Бу ҳужжатларнинг қай бирига ишонмоқ кепрак?!

Бу ҳужжатларни ўрганишнинг ўзи бўлмайди: толиққандирман, илғаб ололмагандирман, деб ўйладим. Лекин мана шу «иш» юзасидан маҳкумларни оқлашга доир 1957 йилдаги материаллар тиркалган ҳужжатларни ўрганишга тушдим. Қўшимча текширувга доир 19 жилнинг 315-саҳифасидаги ҳужжатни русчадан таржима қилиб келтираман.

**«670 рақамили Архив-тергов иши бўйича
ХУЛОСА**

10 июнь 1957 йил.

Бирлашган Бosh сиёсий Бoшқарма Ҳайъатининг А. Xўжахонов, У. Тўхтахўжаев, И. Иброҳимов, Ҳасанқори Хоний, З. К. Насриддинов, М. Г. Дадамухамедов ва А. Мусабековни отувга ҳукм этиш ҳақидаги қарори 1931 йилнинг 3 июнида ижро этилган.

Аммо, М. К. Абдурашидов, С. Тиллахонов, Ф. Икрамов, М. Каримов, Т. Мусабоев, Т. Х. Мақсадов, Н. Шераҳмедов ва С. А. Аҳрорийга нисбатан ҳукм ижро этилдими йўқми ишдан кўринмайди. Ушбу текширув давомида ҳам буни аниқлашнинг имкони бўлмади».

Ана холос! Буни нима деб ўйласангиз ўйлайверасиз. Мен анг-тант бўлиб қолдим. Бу нима бўлди асти? Бизнинг Совет Социалистик Жумҳуриятлар Иттифоқи деб аталмиш, биз болаликдан дунёдаги энг адолатли давлат деб билган мамлакатда рўй бераяптими бу ҳақсизликлар?! Минг афсус... у ёғига дилимда жўш урган қарама-қарши туйғуларни ифода этишга ожиз сезаман ўзимни...

1957 йилдаги бу текширув комиссиясининг менинг дадам ҳақида ҳам маҳсус хulosаси бор:

«Сайд Абдурашидович Аҳрорийга Мунавварқори ва бошқа миллатчилар билан эски алоқани узмай, миллий доиралардаги аҳвол ҳақида Мунавварқорини огоҳлантириш билан унга аксилинқилобий ишни йўлга солишда кўмаклашган, деган гуноҳ тақалган. Аммо унинг Мунавварқори билан «эски алоқаси» айнан нимадан иборатлиги, Аҳрорий Мунавварқорини нима ҳақида огоҳлантирганлиги ишдаги материаллардан кўринмайди. Умуман Аҳрорийнинг бирон бир советларга қарши, миллатчилик ташкилотларига алоқадорлигини кўрсатувчи ишонарли далил-исботлар йўқ.

Хуллас қалом 349-саҳифага келганда ўн беш киши ва улар қаторида Сайд Абдурашидович

Аҳорий гуноҳи исботланмаганлиги туфайли оқланади.

Мана энди 1930 йиллардаги терговчилар билан ҳозирги кун терговчиларини қиёслаб кўрайлик. Олдинги терговчилар отувга олиб борган маҳкумлар бугун бегуноҳ бўлиб чиқаяпти. Нега? Гап давр тақазосида. У даврдаги ходимлар тоталитар давлат буйругини кўр-кўrona бажаришга мажбур бўлганлар, деб биламан. У буйруқни бажармай кўр-чи, ўзинг кетасан асфаласофилинга. Жон талвасасида қилинган ишлар бўлса керак у терговлар. Ахир шу буйруқни ижро этган ташкилот ходимлари ҳам қирғин баротдан бебаҳра қолмадилар-ку. Бу ҳақда аниқ маълумотлар келтириш қийин. СССР Давлат Хавфсизлиги Кўмитаси информацион бюллетенининг 1990 йил 2 сонидаги маълумотга қараганда фақат 1934—1939 йиллар ичидагина (ўттизинчи йиллар бунга кирмайди) чет элда масъул вазифаларни адо этаётган чекистлардан «аксилинқилобий жинояти учун» 21.880 ходим масъулиятга тортилган.

Шундан ўзингизга хulosа чиқараверинг.

1991 йилнинг 18 июля куни Марказий телевидениедан шундай бир рақамни эълон этдилар:

1937 йилда иттифоқимизда коммунистлар сони 1 миллион 800 минг киши бўлган экан. 1939 йилга келиб 300 мингга камайган, яъни коммунистлар сони 1 миллион 500 минг бўлиб қолган. «Уч юз минг коммунист қайга кетди?» — деган қонуний савол туғилади. Маълум бўлишича, шу икки йил ичida 300 минг коммунист отиб юборилган экан. Кўркув салтанатининг мамлакат узра юргазган неча турли гаровларидан бири эди бу. Ўша гаровга тушмаган тоифа қолмаган эди. Зиёлилар билан бир қаторда ўша давр сиёсатини амалга оширган че-

кистлар ҳам бу гаровдан четда қолмаган эди. Бунга 1930—1937 йилларда ҳам, турғунлик йилларида ҳам қонунларимизнинг мукаммал бўлмаганлиги сабаб. Ҳозирги кунда қонунга асосланган давлат тузуми барпо этиш учун кураш кетаётганлиги бежиз эмас. Бутун кучимизни, ақл-идрокимизни қонун устувор бўлган давлат барпо этишга қаратмоғимиз керак, шахсга сиғинишнинг бу даҳшатли сабоқлари ёдимииздан кўтарилимаслиги керак.

Олдинда яхши кунларни яқинлаштириш учун кураш кутади бизни. Бу кураш ҳар бири-мизнинг оқ-қорани танишимизга боғлиқ. Ёшдир-қаридир атрофга зийрак боқмоғи, кутганимиз тансиқ кунларни бу кунга яқинлаштиришимиз учун хизматдан қочмаслиги керак. Сайд Аҳорий бир вақтлар ёзганидек бизга ҳам:

«Тансиқ кунлар келди,

Яйраш чоғидир...» — деб бонг урмоқ насиб этди.

8

Меҳнат фаолиятимни тугатиб, нафақага чиққанимда: «Қирқ йил меҳнат қилдим. Мана энди дам оламан, театрларга бораман, янги спектаклларни битта қолдирмай қўраман» деб ўйлаган эдим. Умрим ҳужжатгоҳларда ўтиб кетаяпти. Ҳужжатгоҳлардан қўлим хиёл бўшаган пайтларда Навоий номидаги жумҳuriят миллий кутубхонасининг нодир асаллар бўлимида йигирманчи йилларда чиққан газета ва журналларни ҳижжалаётган бўламан. Дадам муҳаррирлик қилган «Бухоро ахбори» рўзномасини ўз қўлимда тутаман. Юрагим алғов-далғов, дадам руҳи мени кузатиб тургандай... Қани энди саводим бўлсаю, бу рўзномаларни бошидан сўнгги нуқтасигача ўқиб чиқсан. (У чоқларда газета ва

журналлар эски ўзбек алифбосида чоп этилган). Аммо афсус, бизнинг юртда ҳар мучалда бир мартадан алифбони янгилаш одат бўлган... Бизни атай ўз тарихимиздан йироқлаштирганлар — бизлардан манқуртлар бунёд этганлар.

Дадам мақолаларини ўзим ўқий олишим учун маҳаллада саводсизликни тугатиш курслари очдик ва унга қатнаб, зўр-базўр ўқиш имконига эга бўлдим ва кутубхона ходими Раҳим Файзуллаевнинг самимий ёрдами билан дадамнинг 1918 йилда «Турк сўзи» газетасида чоп этилган «Турклик жараёни», «Яшамоқ орзуси», «Инглизларнинг сўнг умиди», «Кўланкаларимга» мақолаларини кўчириб олиш имкониятига эга бўлдим.

Дунёда, ҳали ҳам бўлса, яхши одамлар бор. Бухоролик меҳнат фахрийси Абул Бозоров менинг қилаётган ишларимдан хабар топиб, хужжатгоҳларда юрган чоғларида дадамнинг учраган мақолаларини газеталардан кўчириб менга юбордилар. Улар талайгина. Дадам муҳаррирлик қилган «Бухоро ахбори» газетасида чоп этилган «Инқилобимиз», «Дўстлик муносабати», «Қайтиш», «Вазифа бошида», «Қонға-қон» каби мақолалари шулар жумласига киради.

Яқинда Абул Бозоровдан яна хат олдим. Улар ёзган мактубларида «Бухоро ахбори» газетасининг ўн тўртинчи сонида Муҳаммад Сайд Аҳрорийнинг «Турк-ўзбек атамалари луфати» берилганини хабар қилибдилар. Луфатни алоҳида нашр этиш зарурлигини айтибдилар. Демак, изланиш давом этади. Тилимизга эътибор ошган ҳозирги кунда Сайд Аҳрорий луфати асқатиб қолса ажаб эмас.

Изласанг топар экансан. Дадам изини умрим борича излашга тайёрман... Ҳамон излайман...

Дадам ёзган мақолаларни ўрганиш бароба-

ридан мен унинг қарашларини англадим. Истибдодга қарши, мустақиллик учун кураш садолари янграйди унинг сатрларида.

Мана дадамнинг Мұҳаммад Сайд имзоси билан 1918 йилда «Турк сўзи» газетасининг 5—6 ва 7-сонларида чоп этилган «Яшамоқ орзуси» мақоласи. Бундан саксон йил муқаддам ёзилган бу мақоладан истиқдолга ташналиқ иси уфуради. Бундан хиёл кам бир аср муқаддам зиёлиларимиз қалбини ёндирган масала — мустақиллик учун кураш масаласи эканини, бу йўлда қилинаётган амаллар ўша йиллар айримларга номақбул эканлигини англаймиз.

«Биз, миллий хусусият ва истиқдолимизни муҳофаза қилиб яшамоқ истагимизга ва бу орзуи муқаддасимизга кучимиз билан, қаттиқ бир шиддат билан ёпишиб, керак бўладиган чораларга бош урганимизга дарҳол теварагимидағиларнинг жони сиқилади. Бинобарин, ҳар тарафимиздан шиддатли товушлар ва шиддатли эътиrozлар бош чиқариб, бизни эски ҳолатимизга қайтармоқчи бўлиб қўрқита — бошлайдилар. Узлари учун фидокорлик ва қаҳрамонлик деб қабул қилинган бу ҳаракатлар табдил қилиниб бошга кўтарилган бу ҳислар бизнинг учун бир ақлсизлик ва бир ҳурматсизлик деб ҳукм бериладир. Биз яшамоқ истаймиз ва улар бизнинг маҳв бўлишимизни ҳамда ўз-ўзимизни ўз қўлими билан йўқ қилишимизни хоҳлайдилар.

Чунки ўз қўзимизни ўзимизга кавлатмоқ осонроқ бир иш, яқинроқ бир йўлдир, ҳам чиқимсиз бир суратда ва қонсиз бир баҳо билан майдонга келадилар. Николай вақтида Туркистоннинг бус-бутун маҳв ва паришон бўлганини ҳамма дунё билган эди...»

Отагинамнинг йигирма уч ёшида ёзган бу сатрларини ўқирканман унинг зеҳни-камолига

ҳавасим келади. Бошқача бўлиши ҳам мумкин эмас эди. Хорижда таваллуд топиб, ватанини қўмсаб ўсган Муҳаммад Сайднинг ўн беш ёшидаёқ, Истамбулдаги гимназия талабаси чоғиданоқ Туркистонни истибодод зулмидан озод этишга бел боғлаган бир гуруҳ фидокорлар қатори «Турон нашри маориф» уюшмасига аъзо бўлишида жон бор эди. 1910—1911 йилларда Истамбулга борган Исмоил Фаспирали ва Маҳмудхўжа Беҳбудий билан учрашиб, бу хусусда маслаҳатлашувида ҳам жон бор эди. Мана энди, ўн тўқиз ёшдан жаҳон уруши майдонларида — Галиция ва Дарданелла жон олиб, жон берган, ўрислар қўлида асирик азобини тортган, Красноярск шаҳридаги ҳарбий асиirlар тутқунгоҳидан қочиб, 1918 йил февралида Тошкентга келган Муҳаммад Сайд Туркистон халқининг азоб-уқубатларини англаб етиб, уни бу кўргиликлардан қутқариш йўлларини излар эди. Сайд Аҳорорий куйиб-ёниб қуйидагиларни ёзади:

«...Хурриятимизни талаб қилганимиз бир қабоҳат, муҳториятимизни қўлдан бермаслигимиз бир қабоҳат, хориждан ўзимизга керакли таълим ва устодларни келтиришимиз қабоҳат, ниҳоят, катта қувват пайдо қилмоққа бошлишимиз ҳаммадан катта бир қабоҳат бўлиб кўринадир. Чунки, энди ҳар кимга алданиб юрмаймиз... Энди биз ҳам бошқа миллатлар орасида бир мавқеъ тутмоқ учун барча овозимизни кўтариб ҳаққимизни тилаймиз...» — дея бонг уради.

Бу сатрларни ўқирканман она ватанида мусоғир бўлиб юриб, ўзини шу ватан фарзанди деб билган ёруғ ва олов қалбли йигирма уч ёшли йигитнинг оқсоқоллардек фикр юритишига таҳсинлар ўқийман ва Муҳаммад Сайд сатрлари ила ватандошларга мурожаат қиласман:

«...Бугунги уйғонишимиз билан бошқа миллат-ларнинг икки йилда ишлайдурган ишини бир йилда тамомламоғимиз зарур...»

Менинг отам ва унинг замондошлари истиқолот учун курашдилар, уни интиқ кутдилар, умидвор бўлиб кутдилар, курашдилар. Шулар ҳақида ўйларканман бирдан отамнинг — Саид Аҳорийнинг куни кечагина ўқиганим «Бухоро ахбори» газетасининг 1920 йилнинг 26 январида чиққан «Сўнгсиз қиш» сарлавҳали қатраси ёдимга тушади. Ўша давр зиёлиларининг кайфияти билан сизларни таништириш учун шу қатрани тўлалигича эътиборингизга ҳавола қиласман...

«СЎНГСИЗ ҚИШ...»

«Бир кун келиб барча гуллар, яғочлар бир ел билан йиқилиб ерни ўпадилар. Ёпроқлар учуб, чаманлар йиғлайдурлар ва бутун очунни қайгули бир тус чулғаб олур... Гуллар сўлуб, табиат ўладур.

Бироқ бу сўлгун гуллар, йифиқ яғочлар бир кун яна жонлануб турли туслар билан безанардирлар, титоқ ишқлар ва қулимсировчи гуллар бир янги қўёшдан жон топадирлар, демак янгидан кўклам қайтиб келган бўлур.

Менинг ўйноқ хаёлларим қайғу қорлари билан оғулонғон ҳолда учқон сойин баҳтсиз руҳим тунгмоқдо, қурмоқдо ва сорғоймоқдодир...

Бироқ сенинг оҳ! Ўксиз руҳим, сенинг ўз кўкламингга қовушар эҳтимолинг ҳечда йўқдир...» — дея нола чекади отам мустақилликка эришишдан ноумид бўлиб.

Аммо мустақиллик учун кураш давом этади. Зиёлилар турли жамият ва тўдаларга уюшиб бу курашни давом эттиридилар ва бу йўлда шаҳид кетдилар.

Мана ҳозир шундай замонга етдикки, отагинамнинг ва уларнинг сафдошларининг руҳи шод бўлсин.

Биз истиқлолга эришдик. Бугун Ўзбекистонимиз хур — мустақил давлат.

Мустақиллик муборак, азизлар!

Жумхуриятимиз мустақиллигини жаҳондаги юздан ортиқ давлат тан олди, у Бирлашган Миллатлар Ташкилотига аъзо бўлиб кирди. Қувончимнинг чеки йўқ — уни сўз билан изҳор этишга ожизман.

Қалбимда ҳам қувонч, ҳам алам...

Хаёлан «Миллий истиқлол»чилар билан сўзлашаман:

«Сиз кутган кунлар келди, азизлар! Ўзбекистон энди хур жумхурият. Ўзбек энди ўзига хон, ўзига бек. Узининг ерига, қазилма бойликларига, ўзининг меҳнати маҳсулига ўзи хўжайин!

— Дадажон! Ўн олти яшарлигингиздан — Истамбулда гімназия талабаси чоғингизданоқ Туркистон эли учун орзу қилган, сиз интиқ кутган истиқлолга эришдик! — дея отам руҳи билан сўзлашаман.

Ҳа, энди буёғи ўз қўлимида: меҳнатимиз, ақёл-заковатимиз билан юртимизни обод этамиз, ҳар бир хонадонга файз, рўшнолик олиб кирамиз. Аллоҳ таоло Сизни, истиқдол йўлида қурбон бўлган барча ҳамюртларимизни раҳмати-жаннати қилсин! — дея ёзганларимга нуқта қўяман. Аммо қалбимда туғилган бир тилакни ўртага ташлагим келади:

— Азиз ҳамюртлар! Тарихдан маълумки, бунгунги истиқлол бизга осмондан тушгани йўқ. Бу истиқлол йўлида қурбон бўлганларнинг ҳали ҳисобига етганимиз йўқ. Шу қурбонлар ёдини

келажак авлод қалбидა сақлаб қолмоқ учун ҳуржумхуриятимиз пойтахти Тошкент шаҳрида истиқлол йўлида қурбон бўлганлар учун ёднома ўрнатмоқ зарур. Яна мустақилликка эришиш йўлидаги кураш тарихини кўзгуда акс эттиргандай намоён этадиган музей ташкил этмоқ керак. Токи юртимизнинг етти ёшидан етмиш ёшигача бу кураш тарихини билсин. Истиқлолнинг тотли нашъаси қадрига тушуниб етсин.

СҮНГСҮЗ

Мен-ку олтмиш йил деганда отамни топдим. Ўйланиб қоламан: мен каби ҳасрат-надомат чекканлар озми? Учликлар тарафидан ўн, ўн беш йиллаб қамоқقا ҳукм этилган ва шу кетганча бедарак йўқолганлар қанча экан? Даҳшатли ўтизинчи ва ўттиз еттинчи йилларда отиб юборилган ёки дом-дараксиз кетганлар жумхуриятимизда қанчалигини ҳали-ҳануз аниқ билмаймизку. Мен каби дардли қалблар, юрагингизни очинг, дардингизни қофозга туширинг, кимингиз қатлиомга дучор бўлганини ёзиб юборинг. Балким биргаликда уларни излармиз...

Излайлик, азизлар, яқинларимизни. Истиқлол йўлида ёш жонини фидо қилган юртдошларимиз бедарак кетмасин. Кунимиздан бир кун қолса ҳам излайлик! Биз изламасак ким излайди?! Марҳумлар олдидағи бурчимизни ўтаб улгурайлик. Мустақил эл дастурхонига барака сиз билан бизнинг, бутун элнинг ҳаракатига боғлиқ экан — ҳаракатимизга барака...

СҮНГИ СҮЗДАН КЕЙИНГИ СҮЗ

«Астойдил йиғласанг сўқир кўздан ёш чиқар» дейди доно халқимиз. Отамни йўқотиб

хўбам йиғладик. Аввалига онам... Йигирма беш ёшида тўрт бола билан бева қолган, ўтиз олти ёшдаги ўқимишли, меҳрибон эрининг эрта билан чиқиб кетганича бедарак йўқолганини онгиға сингдираолмаган гўзал аёлнинг кечалари болаларидан, онасидан, акаукасидан яширин тўккан кўз ёшлари бирга тўпланса дарё бўлиб тошса ажаб эмас. Акаукаларимни тилга олмасам ҳам, мен ўзим эсимни таниганимдан бошлаб изладим, ўшандан буёғига отамни изладим.

Аллоҳнинг иноятини юқоридаги саҳифалардан билдингиз, азиз ўқувчи. Лекин буёғига ҳам Аллоҳ бизни қўллади. Отамнинг қаерда отилгани ва қайси қабристонга қўйилгани дарагини топдик.

Гап шундаки, Москвада чиқадиган «Вечерняя Москва» газетаси 1990 йилнинг 6 декабридан бошлаб 1930—1940 йилларда яширинча отилиб, Москвадаги Ваганков қабристонига яширинча кўмилган одамлар рўйхатини бериб келаркан. Шу газетанинг 1992 йил 25 майдаги сонида тўққиз кишининг рўйхати берилган бўлиб, шулардан беш нафари бизнинг юртдошларимиз экан.

Улар:

1. Сайд Абдурашидович Аҳрорий (менинг отам)
2. Мунавварқори Абдурашидов
3. Салимхон Тиллахонов
4. Тангриқулхожи Мақсадов
5. Нажмитдин Шераҳмедов экан.

Буни кўриб, ўқиб анг-танг қолдим. Қарангки, аллоҳ таоло бу ишда ҳам ўзи қўллади. Ўн беш миллий истиқлолчининг фожиали қисмати қандай якунлаганига аниқлик киритди. Энди навбат бизга — истиқлол шарофатидан баҳраманд бўлган авлодга — уларнинг элдошлари,

фарзандларига. Истиқлол учун тенгсиз курашда шаҳид кетганлар ёдени абадийлаштириш бора-сида олиб борадиган ҳаракатларимиз суръатини бўшаштирмаслигимизда.

МАЪРИФАТ ВА ЭЗГУЛИККА БАХШИДА УМР

Умрим бино бўлиб бу одамни сира кўрмаганман. Гоҳо-гоҳо қулоғимга чалинган гаплардан билганларим шуки, у — маърифатпарвар инсон бўлган. Лекин қисмат унинг бошига шундай савдоларни солдики, бу кўргиликлар унинг етти ухлаб тушига кирмаган, албатта. Мен эса бу одамнинг қисмати менинг отам тақдирни билан бунчалар пайванд бўлганини сира хаёлимга келтирмаганман. Бу одам — Мунавварқори Абдурашидов.



Мунавварқори Абдурашидов.

Янги замон, янгиланиш шарофати билан дадамга доир материалларни ўрганиш менга насиб этди. Давлат Хавфсизлик Қўмитасида мен «Мунавварқори Абдурашидов, Салимхон Тиллахонов ва бошқалар» деб номланган иш билан танишдим. Умримнинг бир йилини шу ишни ўрганишга баҳшида этдим. Бу иш бўйича ҳисбса олингандардан 15 киши олий жазога — отувга, қолганлари турли муддатларга қамоқ жазосига маҳкум этилган. Мунавварқори Абдурашидов ва менинг отам Сайд Аҳорий ана ўша қатл этилган 15 истиқдолчилардан бўлишган экан...

Кейинги йилларда Мунавварқори Абдурашидовнинг ҳаёти фаолияти ҳақида газета ва журналларда қатор-қатор мақолалар чоп этилаётир. Унинг сиймосини ҳам мен шу мақолаларга илова этилган сувратлардангина топдим. Мунавварқорининг маърифатпарварларга хос фаолияти ҳақидаги ҳикояни унинг бу хислатларини яхши билганларга ҳавола этганим ҳолда мен унинг 1929 йилдан кейинги, ҳисбса олинганидан сўнг кечган савдолари хусусида, Тошкентдаги Москва турмаси ва Москва шаҳридаги «Бутирка» турмасида терговчиларнинг саволларига жавобларида қайд этилган, халқ қўзидан панада қолган дард-аламлари хусусидагина тўхтамоқчиман.

Мен энди шуни аниқ биламанки, Мунавварқорини Туркистон мустақиллиги учун олиб борган кураши туфайли ҳисбса олдилар ва миллий истиқдолчи сифатида жазоладилар. Менинг ҳикоям Мунавварқорининг шу «иш» бўйича берган шахсий кўрсатмаларига асосланади.

Биринчи жилднинг биринчи саҳифасига Мунавварқорининг уйини тинтиш ва ўзини ҳисбса олиш ҳақидаги 1929 йилнинг 5 нояброда битилган 19 рақамли ордер — фармон тиркалган. Шу ордердан мен Мунавварқори Абдурашидовнинг Шайхонтоҳурда — Дархон маҳалла-

сидаги 17-ҳовлида яшаганини, унинг уйини тинтиш ва ўзини ҳибсга олиш Давлат Сиёсий Башқармаси ходимига топширилганини била-ман.

Бу қора ишни амалга оширишни қонунлаштириш учун икки гувоҳ — Мунавварқори Абдурашидовнинг икки қўшниси таклиф этилади. Дархон кўчасидаги 19-ҳовлида истиқомат қилган ишчи факультети талабаси Сайдумар Эшонхўжаев билан худди шу кўчадаги 22-ҳовлида яшовчи Турсунбой Солиҳмуҳамедовлар тинтуб давомида миқ этмай кузатиб ўтиришга мажбур бўлганлар. Шу куни тинтубда Мунавварқори уйидан турли ёзишмалар, иккита суврат, чордокдан яна бир боғлам ва яна бир қанча ёзишмалар олиб кетилди. Тинтуб жараёни қайд этилган қофозда тинтуб давомида уйнинг томи ўпирилиб тушгани, Мунавварқорининг рафиқаси Лазиза Абдурашидова ўзининг ўкув дафтарларини олиб кетаётгандарини, бу дафтарлар ўзига зарурлигини айтиб норозилик билдирганлиги ҳам қайд этилган.

Хўш, Мунавварқорини ҳибсга олишга асос бормиди? Унга қандай айб тақашаяпти, деган саволимга 1-жилднинг 68-саҳифасига етганда жавоб топдим. 1929 йил давомида тўпланган материаллар Мунавварқорини ҳибсга олишга асос бўлганини англадим.

...Бу ишни ўрганиш жараёнида неча-нечабор: «Кўрмайин ҳам, куймайин ҳам...» дея ташлаб кетгим келди, Рост-да, бир ўйлаб кўринг, уч ёшли бола эдим, олтмиш учга кирганимда отамдан дарак топибман. Отам ҳозир менинг фарзандим ёшида — ўлганлар қаримайдилар. Ўттиз беш ёшида ҳибсга олиниб, ўттиз олтига тўлар-тўлмас отиб юборилган — жанозасиз ва кафансиз ўраларга ва кўмиб ташланган. Мана шу хабарнинг ўзи юрагингни алғов-далғов қи-

лади... у ёгини аниқлашга кучни қайдан топаман...

Жисмим биттаю, қалбим иккиланади.

Бири айтади: — Бас қил. Инфарктдан турганингга кўп бўлгани йўқ. Қирқ кун реанимацияда ётганинг ёдингдан кўтарилидими? Юрагинг дарди яна бир хуруж қилиб қолса борми, яна шифохонада шифтни томоша қилиб ётсан...

Иккинчи мен дейди: — Бир бошга бир ўлим. Бу имкониятлар қайда эди. Бу имкониятлардан фойдаланмоқ керак. Сен қилмасанг бу ишни ким қилади? Сенинг фарзандлик бурчинг бу. Ишни охирига етказиш учун тош келса кемиришинг, сув келса шимиришинг керак...

Хуллас калом, Аллоҳ таолонинг мадади билан қарийб бир йил давомида кунда бўлмаса ҳам кун аро ҳужжатларни ўргандим. Бу ҳужжатлар кўз олдимда жумхуриятимизда Истиқлол учун борган кураш манзараларини намоён қилди. Бу жинойи иш бўйича асосий гуноҳкорлардан деб топилган Мунавварқори Абдурашидовни ҳибсда ўтирган чоғида бошига тушган синоатлардан огоҳ бўлдим ва умрим бино бўлиб ҳеч қачон кўрмаганим Мунавварқори каби ажойиб инсоннинг фожиали қисматига шериклик юрагимни қийма-қийма қилиб юборди.

Бу ҳужжатлардан шуни билдимки, 1928 йил бошларида ПП ОГПУнинг Ўрта Осиёдаги вакили Мунавварқорини ҳузурига чорлаб, жадидликнинг келиб чиқишига доир воқеаларнинг тафсилотларини ёзиб беришни тавсия қилди. Айниқса, Октябрь Революциясидан кейинги воқеаларни атрофлича ва ҳужжатлар асосида ёзишни таъкидлади. Қатор саволлар билан тўлдирилган қофоз берди. Мунавварқори бу таклифни қабул қилди. Негаки, шу баҳонада ўтган воқеаларни ҳар ёқлама батафсил таҳлил қилиш

имкони туғилди ва боз устига, келажак авлод учун тарихий манба қолдиради...

Мунавварқори 1930 йилнинг 27 октябрида ёзган кўрсатмасида бу таклифни амалга ошириш учун аввал режа тузганини ёзади. Мунавварқори ёзадиган ишини даврга бўлади:

Биринчиси — жадидликнинг келиб чиқишидан то февраль инқилобигача бўлган давр;

иккинчиси — февраль инқилобидан октябрь инқилобигача бўлган давр;

учинчиси — октябрь инқилобидан кейинги давр.

Мунавварқори бу ишни амалга оширишга астойдил ҳаракат қилди — билганларини ёзди, унугилганларини ўзи билан бирга ишлаган замондошларидан суриштириди. Файзулла Хўжаев, Мухитдинов ва Турсунхўжаевлар билан маслаҳатлашди. 1929 йилнинг бошларида биринчи даврга доир хотирани ёзишга бошладио, лекин вақти камлигидан буни тугатишга имкон топмади, негаки, бу вақтга келиб у ишсиз қолганилигидан тирикчилик йўлларини изларди.

1930 йилнинг 27 октябридаги кўрсатмасида Мунавварқори шундай ёзади: «...Оиласда мендан бўлак ишлайдиган одам йўқ эди. Рафиқам бу чоқларда ўқир эди. Кунига 9—10 соат ўтириб қўлқоп тикиб, икки-уч сўм топиб рўзгорни тебратишга мажбур эдим. Шу сабабли ёзувни тезда битказиб топширишнинг имкони бўлмади. 1929 йилнинг августида бўлса керак, мен бу ҳақда Сиёсий Бошқарманинг Шарқ бўлими бошлиғига хабар қилдим ва оилавий аҳволим ҳақида очиқласига гапирдим...»

Мунавварқори Абдурашидов бу идора раҳбарларидан ўзининг нафақаси масаласида кўмак беришларини сўрайди, аммо бошлиқ ваъда берадио, гапининг устидан чиқмайди ва Мунавварқори бошлиқнинг буйруги билан ҳали

ёзib битказмаган хотираларини чалалигача топширишга мажбур бўлади ва учинчи давр ҳақидаги материалларни тўплаб улгурмасидан ҳибсга олинади.

Ўша 1929 йилнинг бешинчи нояброда ёлиз Мунавварқоригина эмас, яна неча-неча хонадон эгалари қон қақшаб қолдилар. Мунавварқорини ҳибсга олиш ҳақида 19 рақамли ордер ёзган кимса 20 рақамли ордерни девонбекилик Салимхон Тиллахоновга, 22-сини Эшонхўжа Хонийга, ўттизинчисини 1-мергандалик Хайритдинхон Аълам каби эллик бешкишига ёзганди.

Бу жиноят ишидан мен Мунавварқори Абдурашидовнинг 1878 йилда туғилганини, бутун ҳаётини халқ маорифини такомиллаштириш ишига бахшида этганини, миллий озодлик ҳаракатини бошқарганлигини билдим. Мунавварқори эски шаҳар халқ маорифида коллегия аъзоси ва бўлим бошлифи бўлиб хизмат қилган, музейда ишлаган, ҳикоя ва мақолалар ёзган, шоҳмот алифбосини тузган.

«Шахсий ҳаётим масаласига келадиган бўлсак, фақир бир оиласдан чиққанман. Бутун ҳаётимни халққа маърифат ва эзгулик бахш этишга бағищлаганман. Пул, бойлик ва мансаб мени ҳеч қачон қизиқтирганман. Тушуниб-билиб туриб ҳеч қандай жиноят содир этмаганман. Фақир, оддий ҳаёт билан кифояланганман. Ҳатто яшаб турган ҳовлимни ҳам халқ учун бўшатиб берганман. Айни чоқда ҳовлимда I Май номидаги мактаб фаолият олиб бораяпти», — деб ёзади у.

Мунавварқорининг ёзувлари шуни кўрсатадики, Октябрь воқеаларидан аввал элимиизда «Иттиҳоди тараққийпарвар» жамияти ташкил этилган. Бу жамият ўз номига яраша, тараққиёт учун жаҳолатга қарши кураш вазифасини ўз олдига мақсад қилиб қўйган. Жамият дастурини

Мунавварқорининг ёзишича, турк офицерларидан Усмонбек ва Ҳайдар афандилар тузганлар ва Мунавварқори туркчадан ўзбек тилига таржима қилган. Ишга раҳбарлик қилиш учун учничи аъзони ерли миллат кишиларидан уларнинг ўзи белгилаши керак эди.

Шунингдек, «Иттиҳоди тараққий» (кейинчалик жамият шундай атала бошлаганди). Совет ҳокимияти тарафидан берилган имтиёзларга таянган ҳолда қўйидаги вазифаларни ўз олдига кўйди:

- а) мактаблар сонини кўпайтириш;
- б) мактаблар қошида катталар учун саводсизликни тутатиш курслари очиш, тўғараклар, жамиятлар ташкил этиш;
- в) Совет ҳокимияти берган мухториятни мустаҳкамлаш, давлат идораларида ерли кадрларни кўпайтириш (негаки, ишни эплолмайди, деган баҳоналар билан ерли кадрлар давлат идораларидан четлатиларди).

Марказдан «Қизил шарқ» поезди сиёсий комисари П. Кобозев ишга келгач, кўпчиликда, коммунистик партия меҳнаткаш халқ манфаатини кўзлашига, Москванинг ёрдам қўрсатишига ишонч пайдо бўлди. Кобозевнинг сиёсатига тескари иш олиб бораётганлар — мустамлакачилик сиёсати тарафдорлари деган фикрда эдилар. Қурултой ва конференциялар ёрдамида улардан го либ келишларига ишонардилар. Мустамлакачилик сиёсати олиб бораётганлар устидан Москва га шикоят қилиш ва Марказ ёрдами билан Туркистонда мухтор бошқарув ўрнатиш мумкин, деб ўйлардилар. Айниқса, саккизинчи қурултойдан сўнг Марказий Ижроия Комитети ва ўлка комитетлари раҳбарияти ерлилардан белгилангач бунга ишончлари янада мустаҳкамланди.

Мунавварқорининг шу хотираларини

ўқирканман зиёлилар Марказ сиёсатининг асл моҳиятидан тамомила бехабар бўлганларини англайман. Улар қоронфуда тимирскаланиб юргандай иш тутганлар, деган ишончда титраб кетаман. Ҳа, Марказ жуда устамонлик билан иш кўрган экан. Бунчалар кеч англайдик буни.

Мунавварқорининг Бухоро воқеаларига доир ёзувлари ўша даврни кўз олдимизга келтиришимизга ёрдам беражагини кўзда тутиб, русчадан таржима қилиб эътиборингизга ҳавола қиласман. Мунавварқори ОГПУ раҳбари талабига кўра ўша давр воқеаларини (арраб алифбосида) ёзив берган бўлиб, бу ёзувлар рус тилига таржима қилиниб терговчилар тарафидан чукур ўрганилган, сатрлар остига, саҳифа ёнбошига қора, қизил, кўк қаламлар билан турли белгилар ва чизиқлар тортилган — ҳар қайси рангнинг ўзига хос маъноси бўлган. Мунавварқори шундай ёзади:

«1920 йилда октябрнинг тантанаси муносабати билан Бухорода, Арк ёнидаги майдонда катта митинг бўлди. Марказ вакили (Куйбишев эди шекилли) нутқ сўзлади, Бухоро Халқ Шуролар Жумхуриятининг мустақиллиги Марказ тарафидан эътироф этилганини тантанали равишда эълон қилди. Ундан сўнг Мирзақори Мұхитдинов сўзга чиқди ва Бухоронинг мустақилликга эришгани хотираси учун митинг ўтказилаётган бу майдонга «Бухоро мустақиллиги» номи берилишини эълон этди. Ундан сўнг Файзулла Хўжаев сўз олиб Октябр байрами билан ва Бухоронинг мустақиллиги эълон этилиши билан қутлади. Шу кундан бошлаб ёш буҳороликлар ичida «мустақиллик» деган сўз тез-тез тилга олинадиган бўлди ва чинакам мустақилликка интилиш орта борди. Турк комиссия Бухоро ишига кўп аралашадиган бўлди ва нати-

жада бухороликлар орасида норозиликлар келиб чиқишига сабаб бўлди. «Инқилобми бу ё истило», дейдиган бўлиб қолди одамлар. Бу норозилик кундан кунга орта борди. Орадан бир қанча вақт ўтгач Бухорога Турккомиссия аъзоси Сафаров келди. У мени ревкомга таклиф этди-да, Бухоро ходимларининг аҳволи ҳақида суриштириди. Бу йифинда Сафаров, Зиновьев, мен ва таржимон Еникеев бор эди. Сафаров мендан бухороликларнинг инқилобга муносабати ва шарқий бухороликларнинг амирни қувватлаши сабабини сўради. Мен ҳам, ҳеч нимани яширмасдан, бухороликларнинг мустақилликка интилишини, бу кунги аҳвoldан норози эканликларини, «инқилобми бу ё истило», — деган гапларнинг кўпайиб бораётганligини батасил сўзлаб бердим. Яна шарқий Бухорода қизил отрядлар отларини масжидларга боғлаётганини, босқинчилик қилаётганликларини ҳам айтдим. Шундан сўнг Сафаров ревком мажлисини чақирди, ҳокимият ва раҳбарларни қаттиқ койиди. Сафаров жўнаб кетганидан сўнг Бухоро ҳукумати вакиллари ўзаро маслаҳатлашдилар ва агар Сафаров йўналишини ўзгартирмайдиган бўлса, ишни ташлаб кетишлирини Москва га ёзиб юбордилар. Бу ультиматумни олгач Москва Сафаровга Бухоронинг ишига аралашмасликни буюрди».

Кўриб турибмизки, Марказдан келган ходимлар ерли ҳалқ учун жон куйдурмаган. Ҳалқ орасида норозиликларнинг келиб чиқишига ўзлари сабаб бўлганлар.

Жумхуриятимиз худудида миллий озодлик ҳаракати шу йўсин бошланган бўлса ажабмас. Ташкил этилган ва кейинчалик ташкил бўлган юшма ва жамиятларнинг уринишларини шундан бўлакча аташ мумкин эмас. Совет ҳокимиятидан демократия ва эркинликни кутган

зиёлилар алданганларини шу тариқа англай бошладилар. Ҳаракат кўлами кенгайгандан кенгайиб Қозоғистон, Татаристон ва Бошқаристонда ҳам кенг қанот ёйди. Турор Рисқулов раҳбарлигига олиб борилган бу ҳаракат Давлат Сиёсий Бошқармаси тарафидан тор-мор этиб юборилди...

Тергов материалларидан кўриниб турибдики, Давлат Сиёсий Бошқармасини жумхуриятларда ташкил этилган жамиятлар, уларнинг номлари ва аъзолари қизиқтирган. Мунавварқори ёзувларидан «Миллий иттиҳод» бўлинмалари Тошкентдан ташқари Наманган, Самарқанд ва Бухорода ташкил этилганини биламиз. Аммо афсус ва надоматлар билан шуни қайд этиш керакки, бу жамият аъзолари ўртасида бирдамлик бўлмаган, бухороликлар Бухоро истикдоли байроғи остида иш кўрган бир пайтда туркистонликлар миллий иттиҳодга (бирлашишга) чақирганлар. Тошкент Бухорога бўйсунмаган, Бухоро Тошкентга итоат этмаган. Ўша чоқларда Бухорога келган Заки Валидов бу икки ташкилот орасидаги муносабатни Мунавварқоридан суриштириб, билиб, бухороликлар ва Туркистонликлар ўртасини яхшилаб, иккала марказдан икки кишидан вакил белгилаб ягона «Марказлар маркази» ташкил этишга уринади. Материаллардан кўринадики, зиёлиларнинг боши қовушиши қийин бўлган. Ишимизнинг доимо пачава бўлишининг боиси шундан бўлса керак. Айтишади-ку, бўлинганни бўри ер, деб. Яна айтишади: «Бўлиб ташла ва ҳоким бўл!» Иллат — қовушмаслигимизда бўлган. Шунинг учун ҳам энг ёруғ қалбли одамларимиз бўрига ем бўлиб кетганлар. Афсус... Минг афсус...

Бир тери остида қўй неча семириб, неча озади, дейишади. Мунавварқори ҳам не-не савдоларни бошидан кечирмади. «Ўзингники ўза-

гингни узади» деганларидай, унинг шахси ва асарларига қаратилган устма-уст танқидий чи-қишилар жон-жонидан ўтиб кетди. 1925 йилда Назрулла Иноятий Мунавварқорининг китобларини танқид забтига олди. Уч марта қайта нашр этилган элга манзур китобнинг танқид қилинишини, Мунавварқори асосан ўз шахсига қаратилганини ҳис этади.

«Мана шу воқеалар мени Ўзбекистондан ва умуман ўзбеклардан совутиб юборди.... ва мен Ўзбекистондан бутунлай бош олиб кетмоқчи бўлдим...» деб ёзади Мунавварқори.

Мунавварқори 1926 йилнинг майигача жумҳуриятдан бош олиб кетишни режалаштириди (ким билади, балки боши узра қора булатлар тўпланаётганини кўриб, ёмон кунларни ҳис қилиб тургандир ўша чоқларда). Ҳовлининг бир қисмини сотди, қолган қисмини хотини ва болаларига бўлиб берди. Бунинг устига қизи ва набираси вафотидан ларзага тушган Мунавварқори бу фикрида қаттиқ туриб олди. Москвага жўнаб кетишга, рус тилини ўрганишга аҳд қилди ва Москвага жўнади. Йўл-йўлакай Қизил Ўрдада бўлди, Турор Рисқулов билан учрашди. Акмал Икромов Москвада эди. Рисқулов Москвага Халқ Комиссарлари Совети раиси муовини бўлиб борди. Мунавварқори унинг кўмагида Шарқ халқарини ўрганиш комитетида ишламоқчи ва институттага кириб ўқимоқчи бўлди. Комитет президиуми уни яхши қабул қилди ва улар Ўзбекистон учун белгиланган уч ўриннинг бирига расмий командировка билан Мунавварқорини қабул қилишни лозим топдилар. Комитет раиси унинг учун командировка сўраб расмий хат йўллади ва ҳатто шахсан Икромовдан илтимос қилди. Мунавварқорининг ўзи ҳам Акмал Икромов билан шахсан сўзлашди. Мунавварқори Акмал Икромовга, ўзини ўзи Ўзбекис-

тондан бадарға қилаётганини айтди. «Агар Сизни Ўзбекистондан бадарға қилиш лозим бўлса, ўзимиз қилардик», — деди Акмал Икромов ва командировқани тўғрилаб беришни ваъда қилди», — деб ёзади Мунавварқори.

Бу Мунавварқорининг ўша чоқлардаги қатъий қарори эди. Негаки, бу ердаги қоралашлар унга қаттиқ теккан бўлиб, у юртдан бош олиб кетиб, илмий иш билан шуғулланмоққа аҳд қилган эди. Аммо унинг кутгани бўлмади. Москвада комитетдан ёзиб берилган мактубни Жумхурият халқ маорифи Комиссарлигига топширди. Орадан бир ой ўтказиб олган жавоб хатида, унинг илтимоси рад этилгани кўрсатилган бўлиб, Мунавварқори яна ўқитувчилик фаолиятини давом эттиришга мажбур бўлди.

Лекин Мунавварқори миллат озодлиги йўлида курашдан четланмади. Бора-бора маданият учун жаҳолатга қарши курашни Совет ҳукумати билан биргаликда олиб бориш осон ва мақсадга мувофиқ деган ўйга борган пайтлари ҳам бўлди. Бу ёлғиз унигина эмас, бутун «Миллий иттиҳод» шу фикрда эди. Бу жамият ўз вакилларига, улар қаторида Мунавварқорига ҳам коммунистик партия сафига киришга ижозат беради. Жамият бекор қилинади. Бунинг бошқа сабаблари ҳам бор эди: аввало аъзоларнинг итизомсизлиги бўлса, иккинчидан, моддий қийинчиликлар ва президиумга ишончсизлик сабаб бўлган эди.

Мунавварқорининг зиддиятла тўлиқ ҳаёти, унинг ўз қўли билан битган сатрларидан бир-бир кўз ўнгимдан ўтади. Баъзи тафсилотларни бошқа айбдорларнинг кўрсатмаларидан топаман. «Миллий иттиҳод» номи кейинчалик Мунавварқори ташаббуси билан «Миллий истиқлол» деб ўзгартирилди. «Аввал миллий мустақилликка эришайлик, сўнг миллий иттиҳод —

миллий бирлашиш учун курашамиз», — деб тушунтириди у, — деб ёзади Салимхон Тиллахонов. Унинг терговдаги жавобига кўра «Миллий истиқлол» аввало, миллий жумҳурият барпо этишни истаган. Ҳукумат эса байналмилал жумҳурият барпо этиш тарафдори бўлган: «Миллий истиқлол» катта аҳамият берган иккинчи масала, ерли халқ вакилларини раҳбарлик ишларига кўтариш, улар тажрибасини ошириш. Хотин-қизларни озод қилиш борасида эса уларни паранжи балосидан қутқариш биланги-на кифояланмай, меҳнатга жалб этишни истайдилар. Ҳаммаси ҳаётий масалалар. Лекин Давлат Сиёсий Бошқармаси кўзи билан кўрганда, булар бари гуноҳи азим. 1930 йилнинг 25 апрелидаги терговда Салимхон Тиллахоновнинг маориф масаласидаги жавоби диққатга сазовор қўйидаги сатрларни ўқиганимда дилимда: «Айни кунларда ҳам бу масала жуда зарур масалалардан-ку», деган фикр ўтади. Салимхон Тиллахонов ўшанда мана нима дейди:

«Биз ортиқ даражада эътибор беришимиз зарур бўлган масала — маориф масаласидир. Бор кучимизни маорифни ривожлантиришга сарфламоғимиз жоиз. Негаки, ҳозирги кунда тайёр кадрларнинг йўқлиги туфайли ишимиз олга бормаётир. Келажакда бизга жуда кўп билимдон одамлар керак бўлади. Озгина муддатда биз уларни тайёрлай олмаймиз. Уларни тайёрлаш кўп вақт талаб этади. Биз мактабларда ўқувчилар сонини кўпайтиришимиз, техникумларда, институтларда ва умуман мутахассислар тайёрлаб чиқарувчи билим юртларида ерли халқ вакилларига илм бермоғимиз керак. Фақат эркакларнигина эмас, хотин-қизларни ҳам ўқишга жалб қиласайлик. Ўқув юртларида улар сонини эркаклар сонига етказайлик....»

Бу ниятнинг нимаси ёмон? Ахир орадан олтмиш йилдан зиёд вақт ўтиб ҳам турли соҳаларда ерли миллат вакилларидан етишиб чиқсан мутахассислар етишмайди, деб зорланамиз-ку...

Тергов бир ярим йил давом этиб, тергов давомида Мунавварқоридан, Салимхон Тиллахоновдан, Лазиз Азиззодадан миллий ташкилот аъзолари рўйхатини талаб қиласидар, номманин санаб ўтишга мажбур қиласидар. Салимхон Тиллахонов ташкилот аъзоси сифатида 115 кишининг номини тилга олади. Бу рўйхатда менинг отам Саид Аҳорий ҳам бор. Демак, Бирлашган Бош Сиёсий бошқарма шу номи зикр этилганларни қузатган ва лозим топганларини бир-бир териб олган. 1930 йил 31 январида ҳибсга олинган қўқонлик Лутфулла Алимов терговда шундай дейди: «Ўзбекистонда улуғ давлатчилик шовинизми ўсиб боряпти. Ўрисиянинг марказий губернияларидан ўрисларни ёппасига Ўрта Осиёга кўчириб келтирилаётганлиги туфайли ишсизлик ўсиб бораётир. Маҳаллий саноатнинг йўқлиги, пахта заводлари ва тўқимачилик фабрикаларининг ўрусиядаги қурилиши сабабли бутун пахта ҳосили олиб чиқиб кетилаётпи, ўзбек хунармандлари хонавайрон бўлаётиди...»

Яна бир тергов кўрсатмаси. Бу Саидвали Шарафутдиновнинг 1929 йил 4 сентябрида деғанларидан: «Давлат идораларини тўлиқ ўзбеклаштириш керак. Ўзбекистоннинг бутун бойлиги марказга оқизиб олиб кетилаётир. Ўзбекистон — қизил колония. Ўзбек халқи мустақил яшамоги керак. Шундагина яхши ҳаёт кечириши мумкин. Совет даврида халқ борган сайин қашшоқлашиб бораётиди. Миллий армия барпо этмоқ керак. Социализм — яхши нарса бўлгани билан хом хаёлдан бўлак нарса эмас, — деган фикрни элга суради Шорасул Зуннун».

Қаранг-а, миллий истиқлолчилар орзу-умиди олтмиш йилга кечиктирилибди.

«Миллий истиқлолчилар» нима учун жазоланди? — деган саволга топган жавобим қуидагича бўлди.

1. Аввало улар коммунистик партияning диктаторлиги ва Туркистоннинг Москвага сиёсий-иқтисодий қарамлигидан норози эдилар.

2. Жумхуриятга таҳдид солаётган пахта якаҳокимлигига қарши эдилар.

3. Ўрисларнинг жумхуриятимизга гурас-гурас кўчириб келтирилишини нотўғри санаардилар.

4. Давлат идораларини ерли миллат вакиллари идора этиши лозим деб санаардилар.

5. Туркистонни миллий республикаларга бўлиб юборилишини нотўғри деб ҳисоблардилар.

6. Алифбони ўзгартиришга қарши эдилар.

7. Ер-сув ислоҳотининг нотўғри олиб борилиши туфайли кўплаб ўзбекларнинг ватанидан бош олиб кетаётганлигига куйинар эдилар.

8. Ўзбекларнинг ўз она заминида хор-зор этилаётганидан аламзада эдилар...

Уларнинг талаблари қонуний бўлганлиги орадан олтмиш йил ўтгандан кейингина тан олинаётир-а. Ўзбекнинг орзу-умиди рўёби олтмиш йилга кечиктирилибди-я...

Лекин бу кунлар келгунча қанча сувлар оқиб ўтди, истиқлолчилар бошига қанча кулфатлар тушди. Мунавварқори неча-неча бор тегирмонга тушиб чиқди... Совет ҳукуматининг бебурд қарорларига ишонди-алданди.

Ўша йилларда Мунавварқори Коммунистик партия сафига кирди. Чунки, у коммунизм миллат ва халқ манфаатига тўла хизмат қилаҗагига ишонч ҳосил қилган эди. Бу тўғрида у: «Эндиликда мен миллат ва халқнинг кўпчили-

гини ташкил этган камбағаллар ва меҳнаткашлар манфаати учун хизмат қилишни истайман. Шу сабабдан ҳам коммунистик партияга аъзо бўлдим. Бошқа бирон ташкилотнинг энди кераги йўқ, деб ҳисоблайман» — деб ёзади. Мунавварқори ҳатто митингларда ҳам шу руҳда нутқ сўзларди. Адашмаган ёлғиз парвардигордир.

Аммо унинг коммунизмга бўлган ишончининг умри қисқа экан. Ҳалқ маорифи Комиссарлигида хизмат қилиб юрган Мунавварқори ерли коммунистларга раҳбарлик қилган П. Кобозевнинг гапларига ишонарди. «Марказ Туркистонда маҳсус шарқ сиёсатини олиб бормоқчи, ҳатто таъсис мажлисини чақиришга ҳам қаршилик кўрсатмайди», — деган фикрларни олға сурарди П. Кобозев. У ҳатто саккизинчи съездда ҳам шу гапни такрорлади, ерли делегатлардан иборат миллий груҳ тузиб ўзи бошчилик ҳам қилди. Ерли зиёлилар бундан Туркистонда бошқа шарқ мамлакатларига намуна бўладиган автоном давлат ташкил этиш мумкин деган ишончга келдилар. Бу фикрга қарши бўлган Казаков ва Успенскийга ўхшаш кишиларни мустамлакачилар деб қораладилар.

Қурултойдан кейин Рисқулов билан Саъдулахўжа Турсунхўжаев ҳокимият тепасига чиқдилар, марказдан ўртоқ Шалва Зурабович Элиава раҳбарлигида Туркистон ишлари бўйича маҳсус комиссия келди. Ўзбек зиёлилари ўша чоқларда Туркистон автономиясини кенгайтириб бориб Туркистон жумҳуриятини ташкил этишни кўзда тутгандилар. Давлат идораларига ерли ҳалқ вакилларини жойлаш билан П. Кобозев тутган сиёсатни амалга оширмоқни кўзладилар. Аммо Рисқуловчиларга қарши бошланган ҳужум туфайли орзулар орзулигicha қолиб кетди. Бу ишларни Казаков ва Успен-

кий сингари мустамлакачилик қайфиятидаги кишиларнинг иши деб тушуниб, Марказга мурожаат этишга қарор қилдилар. Рисқулов ва Низомитдин Хўжаев Москвага бордилар, аммо мағлуб бўлиб қайтдилар. Бу ўртада Турккомиссиянинг Сафаров деган янги вакили Тошкентга келди. У ҳам Рисқулов ва унинг тарафдорлари га қарши турди. Мана шу бўлиб ўтган воқеалар ерли зиёлилар ва ерли коммунистларнинг коммунизмдан ихлосини қолдирди. Буни англаб этиш учун Кобозевнинг мақоласидаги айрим сатрларга мурожаат этамиз. 1920 йилда П. Кобозев «Иштирокиён» газетасида: «Тўғрисини айтганда, ҳозиргacha Туркистонда шўролар ҳокимияти тузилмаган. Ҳукумат тепасига рус истилочилари билан эски ҳукумат тўралари, бойлар ўтириб олиб ўз манфаатларига ишлаганлар...» — деб ёzádi. Адолат юзасидан айтилган бу сўзлар ўша даврдаги ҳақиқий манзарани кўрсатиб, норозиликларнинг келиб чиқиш манбани намоён этиб турибди.

1929 йил декабрида терговчи Мунавварқоридан олти йил бурун бўлиб ўтган бир воқеани суруштириди ва ёзib топширишни ундан талаб қилди. Мунавварқори ёзган хотира қўйидагicha:

«...1923 йилнинг майимиidi, июнимиди Тошкентга Оржоникидзе ва Элиаванинг келишганини ва мен билан кўришиш истагини билдиришганини айтишди. Белгиланган куни айтилган жойга бордим. Оржоникидзе, Элиава, Обиджон Маҳмудов, Сайдносир Миржалилов сухбатлашиб ўтиришарди. Мен ҳам сухбатга қўшилдим. Обиджон Маҳмудов ажойиб қизиқчи эди, ҳазил-мутойибалар билан Оржоникидзе ва Элиавани кулдиради.

Оржоникидзе:

— Тошкентда миллий ташкилот бор дейишади, ростми шу? — деб сўради.

— ГПУ таъқиб қиласвериб йўқ нарсани бор деб бўйнимизга олишга мажбур қилди. Айни дақиқада миллий ташкилот йўқ, фақат миллий гуруҳ бор, — деб жавоб берди Обиджон Маҳмудов.

— Аъзолари нечта?

— Бутун ерли халқ ва яна бутун ҳукумат аъзолари, — деди Маҳмудов.

Бу жавобдан ҳамма, албатта, қаҳ-қаҳ уриб кулиб юборди.

Суҳбат давомида саволларга Обиджон Маҳмудов жавоб қайтарарди, шу сабабли суҳбат ҳазил-мутойиба руҳида борарди. Жиддий гаплар бўлмади. Уйга қайтатуриб бизлар москвалик ўртоқларни (Элиава билан Оржоникидзени) Тошкент чеккасидаги боғлардан бирига меҳмонга таклиф этдик. Улар миллий гуруҳ аъзолари билан танишириш шарти билан боришга рози бўлишди. Учрашув куни ва соати белгиланди. Ўша пайтларда мен хордиқقا чиққандим ва Қибрайда Куриловнинг боғида оиласм билан дам олаётгандим. Бу боғни «Туркистон» ширкати ижарага олганди. Ўртоқларни шу боққа таклиф этдик. Юқорида санаб ўтилганлардан ташқари Тўрақулов ва Раҳимбоев таклиф этилди.

Энг аввал Маҳмудов билан Саидносир Миржалилов келишди. Меҳмонларга хизмат қилиб туриш учун Асадуллахўжа Хоний, Нажмитдин Шераҳмадбоев, Убайдуллақори Эргозиев ва Салимхон Тиллахонов таклиф этилди. Толибжон Мусабоев бормиди, йўқмиди — эсимда йўқ. Умуман, «Туркистон» ширкати аъзоларининг кўпчилиги бор эди, зиёфат ҳам ширкатнинг маблагига ташкил этилганди.

Оржоникидзе Тўрақулов ва яна бир таниш одам билан бирга келди. Оржоникидзе автомобилдан тушатуриб Маҳмудовдан: Миллий гуруҳ аъзоларини тўпладингизми? — деб сўради.

— Ҳа, тўпланишайти, — деб жавоб берди Маҳмудов. — Раисни ўзингиз бошлаб келдингиз, — деди ва Тўрақуловни кўрсатди.

Бироздан кейин Раҳимбоев етиб келди ва Маҳмудов уни миллий гуруҳ саркотиби деб танишитирди. Шундай қилиб, бу гал ҳам суҳбат ҳазил-мутойиба билан ўтди.

Ўртоқ Оржоникидзенинг: «Гуруҳнинг ҳамма аъзолари ҳозирми, бу ерда?» деган саволига Маҳмудов: «Мана булар энг фаол аъзолар», — деди-да, ўзига ва менга ишора қилди.

Савол ҳам, жавоб ҳам ҳазил тариқасида бўлгани учун, юқорида зикр этилганларнинг ҳеч бири бу жавобга эътиroz билдирамади. Маҳмудовнинг ҳазилларини илгаридан билганлари учун меҳмонлар кулиб қўяқолишиди.

Хуллас, ҳазил-мутойиба билан бошланган суҳбат беш соатлар чамаси давом этди.

Маҳмудов билан Оржоникидзе ўртасида қўйидагича суҳбат давом этди:

— Фарғонада босмачилик қачон барҳам топади, деб ўйлайсиз? — сўради Оржоникидзе.

— Мени министр қилиб тайинлаган кунингиз, акс ҳолда у барҳам топмайди.

— Агар барҳам топмаса бир дивизия жўнатамиз, Фарғонани теп-текис қилиб юборади, — деди Оржоникидзе.

— Сиз бир дивизия юборсангиз, мен ҳам босмачилар сонини икки дивизияга етказаман, — жавоб қилди Маҳмудов...

Ҳазил-мутойиба билан айтилган бу сўзлар замирида ҳақиқат ётарди. Марказ вакили Оржоникидзе учун бутун бир шаҳарни кунпаякун қилиш ҳеч нима бўлмаганидек, ерли халқ она тупроғини сўнгги томчи қони қолгунча мудофаа этажаги аниқ эди. Менимча, буни Оржоникидзе ҳам англаган, мезбонлар ҳам...

Давлат Сиёсий Бошқармасининг пихини

ёрган терговчилари арқонни узун ташлаб, гоҳ тоғдаги, гоҳ боғдаги воқеаларни суриштириб, ўзига мос фактларни териб бир ипга тизишнинг устаси бўлганлар. Юқоридаги хотираларни Мұнавварқори ҳибсга олинганидан бир ой кейин ёзив берган бўлса, орадан бир йил чамаси ўтгач ёзган аризаси ҳам бор.

БИРЛАШГАН БОШ СИЁСИЙ БОШҚАРМАГА

*Маҳбус Мұнавварқори
Абдурашидовдан*

АРИЗА

Ушбу аризамга, ёзган кўрсатмам ва оиласамга ёзган хатни илова қилиб Сизга йўлларканман, қуидаги илтимосимни қондиришингизни сўрайман:

1. Оиласмагилар мендан мактуб олмаётганликлари туфайли менга ҳеч нима юбормаяптилар, шу сабабдан ушбу хатимни маркасиз бўлсада жўнатишишингизни сўрайман.

2. Ушбу ва олдинги кўрсатмаларимнинг таржимасини ўзимга кўрсатишишингизни ёки таржимон билан бирга ўқиб чиқишга имкон берингизни илтимос қиласман.

3. Ҳозир қаттиқ бетобман, оёғим шишиб кетганидан юролмайман, бошқаларнинг ёрдамига муҳтожман. Шу сабабли мени умумий камерага кўчиришишингизни ёки шифохонага ётқизишишингизни сўрайман.

Менга берган қофозларингизнинг камлиги ва бетоблигим сабабли кўрсатмаларимни имкони борича қисқа қилиб, олдинги берган маълу-

мотларимни такрорламай, аввалги кўрсатмани эслатиб ёзишга мажбур бўлдим.

Шу билан бирга бўлиб ўтган ва ҳозир эслай олганим энг майда ҳодисаларгача ёзишга ҳаракат қилдим. Сизнинг марҳаматингиз ва шафқатингизни кутиб

Мунавварқори Абдурашидов.

30.Х.30 й.

Аризани ўқирканман кўз ўнгим қоронғилашиб, шахсан ўзи учун ҳеч нимани тиламаган, халққа маданият ва маърифат бериш учун курашган, истиқдол учун жонини фидо қилган инсоннинг чеккан азоблари борлиғимни ларзага солди. Кимлардан шафқат ва марҳамат кутяпти у? Қалбимни қиймалаган саволларга жавоб тополмайман. Қайси жинояти учун ўтирибди қамоқда Мунавварқори? Кимнинг молига ёки жонига қасд қилди? Аризадан кўринадики у энг ашаддий жиноятчилар каби яккахонага қамаб қўйилган, умумий камерага ўтказилишини эса бир марҳаматдай сўраётиди. Аризадаги «хатимни жўнатинглар» деган илтижодан англайманки, ўша чоқлар у Москвадаги Бутирка турмасида бўлса керак. Ҳали олдинда олти ойлик азоблар кутади уни — терговлар, юзлаштиришлар, яна терговлар... Мунавварқорининг терговда алам билан айтган сўzlари ҳамма вақт қулоғим тагида янграб туради:

— 1920 йилнинг сентябри эди. Ўртаҳол дехқондан шундай норозилик сўzlарини эшитганман: «1912—1913 йилларда бир пуд пахта учун 5 қадоқ чой, 30 қадоқ қанд, 45 газ газмол, 5—6 пуд буғдой, 30 қадоқ гўшт, 30 қадоқ ёғ олардик, энди бўлса: 1 қадоқ чой, 15 қадоқ қант, 15 газ газмол, 2 пуд буғдой, ярим пуд гуруч, 10 қадоқ гўшт, 7 қадоқ ёғ оляяпмиз. Ўрта ҳисоб билан

1913 йилдаги нархнинг учдан бирини беришляпти. Агар Совет ҳукумати Николай пошшо давридаги баҳонинг ярмини ёки учдан икки ҳиссасини берганда ҳам ҳукуматдан хурсанд бўлардик ва томимизгача пахта экардик...» Кўриниб турибдики, Совет ҳокимияти илк кунлариданоқ ҳалқни алдаган, ўзбек деҳқонининг нонини түя қилган. Оқпошшо даврида деҳқон бир пуд пахтани 4 сўмга сотган, бир газ читни 15 тийиндан сотиб олган. Советлар эса пахтанинг пудига 5 сўм тўлаган-у читнинг ҳар газини 50 тийиндан сотган. Буёгини ўзингиз ҳисоблаб олаверинг. Ўша даврнинг ақли расо кишилари кўра била туриб қандоқ қилиб бефарқ қолиши мумкин?! Мунавварқори ҳам бефарқ қололмаган — буларнинг барини юрагига яқин олган. Ҳалқ дардига малҳам бўламан, деб ўз жонига жабр қилган. Эндиғина ҳибсга олинган кунларидан бирида 1929 йилнинг 7 нояброда бўлган терговда Мунавварқори шундай дейди: «Совет ҳокимиятини мустамлакачилик сиёсатини олиб боришда айблашга асос бор: мустамлакачиларнинг (ўрисларнинг) кўчириб келтирилиши, давлат идораларида ерли миллат вакилларини жалб этмаслик. Ваҳоланки, ҳеч бўлмаса эллик фоиз ерлилар ишлашини истаймиз...»

Яна шундай дейди:

«Ёзган хатида Лазиз Турксибга қарши чиқаяпти: бу темир йўл Туркистонни мустамлака қилишга катта имконият туғдиради. Туркистон — Сибирь темир йўли Туркистон учун баҳтиқоралик, мусибат, оғат келтиради...»

Бу жиноий ишни кўраётган терговчилар бу сўзлардан ўзларига хос хulosा чиқарганлар албатта.

Олтинчи жилднинг 258-саҳифасидаги Мунавварқорининг ёзган аризаси бор. Мунавварқори бу аризанинг иккинчи нусхасини Москва-

дан келган ўртоқقا етказиши сўрайди. Аризада у шундай ёзади: «Ҳозир мен ҳамма ҳукуқлардан маҳрум этилиб, бир кишилик камерага ташланганман. Менга ҳатто, ашаддий жиноятчилар фойдаланиши мумкин бўлган нарсага — ҳожатхонага чиқишига ҳам ижозат бермайдилар...

...Кўлингизда асирман, сизнинг олдингизда чивинчалик ҳам ҳолим йўқ. Битта бармоғингиз билан эzsангиз йўқман...»

Якка-ёлғиз заҳ камерага ташланган, ёши элликдан ошган Мунавварқорининг аламли нигоҳларини кўраётгандай бўламан. Жисмоний азоб ўз йўлига, бутун умр қилган ҳаракатингни зое кетганлигининг алами юракларини ёндириб, хўл жисми қуруқ ўтиндай чарс-чарс ёнаётгандай бўлади наздимда. Кимларни ва нималарни ўйлади экан у шундай онларда?

Балким Абдурауф Фитратнинг унинг елкасига бошини қўйганча: «Биз бундай инқилобни хоҳламаган эдик», — деб афсус-надомат чекканини эслаган ёдир... Балким... Қай бирини айтай...

Мунавварқори Абдурашидов қариб бир ярим йил қамоқда азоб чекди ва 1931 йилнинг 25 апрели куни РСФСР Жиноят мажмуасининг 58-моддасига кўра отувга ҳукм этилди. ОГПУ Суд коллегиси ўша куни Миллий истиқдолнинг ўн беш аъзосини отишга ҳукм этган, кейинроқ ҳукм ижро этилган — у 1931 йилнинг 23 майи куни Москвада отилган.

Истиқдол учун курашган ва бу йўлда шаҳид кетган элимизнинг сара фарзандлари номини ёдда тутинг.

Отилиб кетганларни Аллоҳ жаннати қилсин. Қолган беш, ўн, ўн беш йиллаб қамоқ ва лагерларга ҳукм этилганларнинг тақдири нима бўлди? Ким қайтди-ю, кимлар қайтма-

ди? Уларнинг кейинги тақдирлари нима бўлди? Буни билмаймиз. Ваҳолангки, билишимиз керак. Ахир улар бизларнинг тақдиримиз учун курашдилар-ку! Улардан бирқанчаларининг номини санаб ўтаман. Балким кимдир билар, уларнинг кейинги қисмати ҳақида хабар қилас.

Фарғонадан — Турғун Парпиев, Лутфулла Алимов, Ёкуб Омон, Андижондан — Иматмаҳсум Обиддинов, Асрор Зайнутдинов, Мўминжон Ҳакимов, Сайфи Камолов, АбдуллаҳўжаFaфуров, Тошкентдан — Убайдулла Хўжаев, Абдуқаюм Мадалиев, Фоғиржон Мусахонов, Қўқондан — Ашур Али Зоҳирий, Мухитдин Хусаинов, Мирзаабдулла Солиев, Нуритдин Эрматов, Намангандан — Файзулла Усмонов, Фатҳитдин Исматуллаев, Мулла Файбулла Дадамуҳамедов.

Азиз юртдошлар! Ватанимизни мустамлакачилик зулмидан озод этиш учун курашган бу ватандошларимиз номини абадийлаштириш Сиз билан бизнинг виждонимизга ҳавола...

Яқингинада биз катта шодиёнани нишонладик. Жумҳуриятимиз мустақилликка эришганига олти йил тўлди.

Мана шундай шодиёна кунларда ўтганлар руҳини шод қилишни ўйлайлик. Улар-ку мустақиллик учун курашиб қизил террор қурбони бўлиб шаҳид кетдилар. Биз-чи, биз улар ёдини абадийлаштириш учун нималар қиласяпмиз? Мустақил жумҳуриятимиз Тошкента қизил террор қурбонлари сиймосини абадий қўяйлик. Шундай қилайликки, улар номини ёш авлод билсин, келажак авлодлар ҳам ёд этсин...

Лекин асосий вазифамиз олдинда. Чок-чоқидан сўқилиб кетган мустабид давлатнинг тўкилиб тушиши туфайли қўлга киритганмиз

мустақилликни мустаҳкамлашга бор кучимизни қаратмоғимиз, шунга хизмат қилган кучларни бирлаштироғимиз, чекка-чеккадан, айниқса сабиқ марказдан бўлаётган ҳийла-найрангларни вақтида илғаб олиш учун зийрак турмогимиз зарур. Асрлар давомида тортган азоб-уқубатларга сабрли, бардошли бўлганимиз учун Аллоҳнинг мукофоти тариқасида қўлга киритганимиз ҳурликни қўлдан чиқармаслигимиз керак. Худо кўрсатмасин-у, агар тараф-тараф бўлиш билан, лоқайдигимиз билан уни қўлдан бериб қўйсак, бизни Аллоҳ ҳам, бандаси ҳам кечирмас...

Истиқолол йўлида шаҳид кетганлар руҳини шод этайлик — мустақиллик байробини маҳкам тутайлик.

САЛИМХОН ТИЛЛАХОНОВ — КИМСИЗ?

Тақдир тақозосига сўз йўқ. Ҳеч қачон кўрмаган-бilmagan, номини эшиитмаган кишилар билан рўпара қилади. Ҳудди шундай бўлди: Ҳеч кутмагандан мен, умримда сира кўрмаган-бilmagan, эшиитмаган кимса қисматига даҳлдор бўлиб қолдим. Бу ўринда эшиитмаган деган сўз жудаям тўғри бўлмас... Зоро 1950 йилларда мен орқаваротдан Ҳосият Тиллахонова деган аёл ҳақида эшиитганман. Ҳудди шу йилнинг октябр ойида республикамизда «Ўзбекистон хотин-қизлари» журнали ташкил топиб, мен ҳам шу журнал редакциясига ишга таклиф этилганман. Журналнинг ташкилий ишлари жараёни давом этаётган кезлар республикамизда илгари ҳам «Янги йўл» номида аёллар журнали бўлганлиги, бунда 1929—1934 йилларда Ҳосиятхон Тиллахонов



Салимхон Тиллахонов.

нова деган аёл муҳаррирлик қилганини эшитганман.

— Бирга ишлаганмиз — яхши аёл эди. Замонасининг олдинги одамларидан эди. Жуда гўзал аёл эди — ёш кетди раҳматлик, — деган эди ўшанда редакциямизда техник муҳаррир бўлиб ишлаётган Зокиржон ота Раҳимов. — Алғовдалғов вақтлар эди. Ўз ажали билан кетмади чоғи. Унга дори беришган, деган гаплар тарқаганди. Аниқ бир нарса билмадик. Хуллас, ёш кетди раҳматлик...

Ҳосиятхон Тиллахонованинг номини эшитганим билан унинг қиёфасини тасаввур этмадим. Лекин орадан йигирма беш йил ўтиб, эндиликда «Саодат» номи билан чиқаётган журнализмизнинг эллик ёшлик тўйига ҳозирлик кўрарканмиз, ярим аср фаолият кўрсатган журнал тарихи билан муштариylарни таништириш зарурати туфайли ўтган муҳаррирлар ҳақида маълумот ва уларнинг суратларини излай бошла-

дик. Ҳосиятхон Тиллахонованинг сурати қўлимга текканида эса маҳлиё бўлиб тикилиб қолдим. Яратган ҳусн бобида бу аёлни кам қилмаган. Кейинроқ билсам, ақл-заковатда ҳам кам бўлмаган экан бу зирофа аёл. Яна сўнгроқ: «Қазисан, қартасан — асли зотингга тортасан» дейишгани тўғри экан. Яхши одамларнинг фарзанди-да... Салимхон Тиллахоновнинг синглиси-да. Акаси ҳам кўп фозил одам эди. Ўзим бўлай дейдиганлардан эмас, ўзимдагини бўлишай дейдиганлардан эди...» деган узуқ-юлуқ сўзлар қулогимга чалинди.

«Хом сут эмган банда» дея койийман энди ўзимни, «Сен қандай журналистсанки, улар ҳақида сўраб-суриштириб қолмабсан-а...»

Аммо дунёга келган жонзотки бор насиб этган ризқини бир-бир териб яшагани мисол журналист керакли маълумотни йиллар давомида зарра-зарралаб тўплаб, қалби тубига жойларкан ва ахийри, вақти-соати етиб бу маълумотлардан бошқаларни ҳам баҳраманд этиш зарурати пайдо бўлганда, билганини ичиға сиғдиролмай қофозга тўкиб соларкан... Қисматинг осонмас, журналист!.. Илож қанча — тақдирни ўзгартириб бўлмайди... Журналист тақдирни қанча оғир бўлмасин, қайта қасб танлашга тўғри келганда яна журналистикани танлаган бўлардим...

Шундай. Вақти-соати етиб менинг журналистик тақдиримда педагог, журналист ва дипломат бўлиб хизмат қилиб, 1930 йилда бедарак йўқолган отам Саид Аҳрорийдан дарак топиш ва уларнинг фожиали қисматларини ўрганиш насиб этди... Шунда ҳужжатгоҳда миллий истиқдолчилар устидан олиб борилган жиноий ишни ўрганиш жараённида яна Салимхон Тиллахонов номига дуч келдим. Аслида жиноий ишнинг номи «Мунавварқори Абдурашидов,

Салимхон Тиллахонов ва бошқалар» деб номланган эди. Шунинг ўзиёқ бу кимсанинг фаолияти алоҳида ўрганилганини кўрсатарди.

Ким у Салимхон Тиллахонов?

Неча-неча бор хаёлан унга рўпара келаман ва: «Кимсиз, Салимхон Тиллахонов?» дея савол бераман. Лекин жавоб йўқ...

Бу саволга жавоб топиш ниҳоятда қийин. Зеро Мунавварқори Абдурашидов ҳам, Салимхон Тиллахонов ҳам аллақачонлар (олтмиш етти йил муқаддам дунёдан кўз юмишган — тўғрисини айтилса, собиқ Совет Ҳукуматининг РСФСР жиноят мажмуасининг 58-моддаси турили бандлари билан отувга ҳукм этилишган ва сўнгги топган маълумотимга кўра 1931 йилнинг 23 июни куни ҳукм Москва шаҳрида ижро этилган ва худди шу куни Салимхон Тиллахонов Москвадаги Ваганков қабристонига яшириқча кўмилган.

Аммо инсон чивин эмаски, беиз йўқолса... Юқорида зикр этилган жиной иш саҳифаларини варақласак Салимхон Тиллахонов ҳаёти ва фаолиятига доир баъзи маълумотлар билан танишамиз. Шу маълумотларни ўрганарканман яккаш Сиз ҳақингизда ўйлайман, Сизнинг қандай инсон бўлганингизни тасаввур қилишга урунаман, Салимхон Тиллахонов. Сиз ҳақингизда ўйларканман — у офтоб чарақлаб турган ёруғ кун бўладими ёинки бомдоддан сўнг тонг ёришаётган маҳал — бетўхтов саволга тутаман Сизни: «Айтингчи, рўзгорингиз ва оиласигизни тебратишга бир қора чақа қўшмайдиган, аксинча имконингиз қадар сиз мадад бериб турган бу сермашаққат ва таҳликали ҳаракатга нега қўшилдингиз? Эл қайғуси сиз учун ўзингиз дунёга келтирган зурриётларингиз — қизларингиз Гўзалданда гўзал, Ширинойданда ширин кўриндими? Ёинки, эл қайғусининг қанча-

лар аччиқлигини юракдан ҳис этиб эл-юртни бало-офтальмадан ҳалос этмоққа бел боғладингизми? — дея хаёлан неча-неча марталаб мурожаат этаман сизга ва саволларим жавобсиз қолади. Сўнгра мен саволларимга жавобни яна ҳужжатлардан излай бошлайман. Ҳа, шундай: Мунавварқори Абдурашидов, Салимхон Тиллахонов ва отам Сайд Аҳорий ҳамда қатор ватандошларимизни айловгага доир неча-неча жилд жиноий иш саҳифаларидан жавоб излайман. Бу ҳужжатларнинг гувоҳлик беришича, элимизда мамлакатимизни мустабидлик зулмидан қутқориш — қуллик занжирларини чил-чил қилиб юртимизда мустақил давлат барпо этиш учун курашган «Миллий истиқдол» уюшмаси бўлган (мустақилликка эришгунимизга қадар биз бу яқин тарихимиздан тамомила бехабар бўлганмиз) ва бу уюшма аъзолари собиқ СССР Давлат Сиёсий Бошқармаси тарафидан қон қора қақшатилган. Аслида бу уюшма аъзолари қанча бўлганлигини билмасакда, улардан 87 нафари ҳибсга өлинганини ҳужжатлардан биламиз. Мана улардан айримлари: Усмонхўжа Тўхтахўжаев, Асадулла Хўжахонов, Толибжон Мусабеков, Нажмитдин Шераҳмедов, Исройлжон Иброҳимов, Ҳасанқори Хоний, Фулом Икромов, Мирҳалил Каримов, Тангриқулхожа Мақсудов ва бошқалар 1931 йилнинг 25 апрелида Москва шаҳрида отувга ҳукм этилиб отиб юборилганлар. Лутфулла Алимов, Ёкуб Омон, Ашурари Зоҳирий, Усмон Акрамий, Носир Эркин, Фатхиддин Исматуллаев, Мўминжон Ҳакимов, Фоғуржон Мусахонов ва бошқалар ўн йил муддатга концлагерга ҳукм этилиб, совуқ ўлқаларга бадарға қилинганлар ва ҳоказо... Булар бари — юртимизнинг то шу кунгача биз билмаган кечаги кун тарихи.

Истибдоднинг минглаб қурбонларидан би-

ри бўлмиш Салимхон Тиллахонов босиб ўтган қисқа ҳаёт йўлини тиклаб кўриш ана шундай қийин кечди. Зеро, унинг бу оламдан кўз юмганига олтмиш етти йил бўлган. Сўраб-сурештирадиган катта ёшдаги қариндош-уруглар, амаки-холалар ҳам дунёдан ўтиб кетишган. У ҳибсга олинган чоғида икки қизалоги: етти ёшли Гўзал ва тўрт ёшли Ширинни бағрига босганича фарёд чекиб қолган 28 ёшли рафиқаси Кароматой Шодмон қизи ҳам ҳаётдан кўз юмган...

Лекин ҳаётда ҳар қандай тўфон ва бўронлардан сўнг ҳам табиат қайта тирилгани мисол ўттизинчи, ўттиз етти-ўттиз саккизинчи, эллигинчи йиллардаги қама-қамалардан кейин ҳам ҳаёт давом этди...

Менга Салимхон Тиллахоновнинг набираси Зилола Сулаймоновани топиш насиб этиб, мен унинг манзилгоҳини бобосига доир иш саҳифалари орасидан топган эдим. Зилола Сулаймонова бобоси тақдири билан қизиқиб, тегишли идораларга ёзган аризасини ўқигандим. Мана нима учун инсон фарзанд кўришни орзу қиласкан?! — деб ўйлагандим ўшанда. «Ўғилдир-қиздир фарзанд бўлгани яхши экан. Бобосини ҳеч қачон кўрмаган, у ҳақда фақат яқин-йироқ қариндошларнинг сўзларидангина билган набира — Зилола Сулаймонова бобосининг изини излабди-да охири. Ўзбек мана нима учун болажон халқ. Фарзандлар — юртимиз келажаги...». Шу йўсин суриштириб билдимки, Салимхон Тиллахоновнинг саккиз набираси бор экан — уларнинг бари турли соҳаларда мустақиллигимизни мустаҳкамлашга хизмат қилаётибиди...

Салимхон Тиллахоновнинг набираси Зилола суриштириб билишича бобоси жуда ўқтам, сахий, жудаям ҳушрўй ва иқтидорли одам бўлган. «Араб, форс, озарбайжон ва рус тилларини яхши билган эканлар. Аввал бошда биринчи

босқич мактабни тугаллагач, «рус-тузем» мактабида ўқиган эканлар». Зилоладан мен Салимхон Тиллахоновнинг Бухоро мадрасасида таҳсил кўрганини, 1917—1918 йилларда Боку шаҳрида ўқиганини, у ердан иқтисод бўйича мутахассис бўлиб қайтганини, шу ихтисос бўйича турли курсларда дарс берганини, Озарбайжондан олиб келган билими билан кифояланмай Ўрта Осиё Давлат университетида ҳам таҳсил кўрганини, иқтисод соҳасида билимини мустаҳкамлаганини билдим. Зилоланинг ҳам сўраб-суриштириб билишича Салимхон Тиллахонов 1921 йилда икки йиллик педагогика билим юртида директор бўлган. Айнан ўша чоқларда «Садойи Туркистон» газетаси ва журналларда мақолалар чоп эттирган. Унинг элим, юртим деганини мақолаларида баён этган фикрларидан билса бўлади.

Салимхон Тиллахоновнинг 1928 йил 11 марта «Четга кўпроқ ўқувчилар юбориш кепрак» мақоласидаги фикрлар унинг қанчалар элсевар инсон бўлганлигидан далолат беради.

Салимхон Тиллахонов шундай ёзади:

«1922 йил ўқиши мавсумида Тошкентда ташкил этилган «Кўмак» уюшмасининг ташабbusи, Туркистон ҳукуматининг кўмаги, Бухоро жумхуриятининг ғайрати ва Шўролар Россияси соясида Туркистон ва Бухородан 70 га яқин ўқувчи Олмонияга келган эди. Мана шу ҳисобга қараганда 12 миллион нуфузга молик Туркистонимиздан 70 тагина талаба бўлиши ҳеч бир вақтда бизни қаноатлантирмайди. Ҳаракат қилиб келгуси йилларда Оврупонинг ҳар бир бурчагига минглаб талабалар юборишимиз кепракдир. Бизнинг дўхтиrimiz, адибимиз, муҳарриримиз, техникимиз, файласуфларимиз ва ҳоказо улуғ кишиларимиз, йўлбошчиларимизни ўз ичимииздан чиқаришимиз лозимдир...»

Қанчалар ажойиб фикрлар, Салимхон Тиллахоновнинг қандай одам бўлганлигини шу фикрларнинг ўзиёқ кўрсатиб турибди. «Юртим деб, элим деб дили куйган, ёниб яшаган одам бўлган экан-да, Салимхон Тиллахонов...» — деган фикр кечди дилимдан. Аммо ўша ўттизинчи йиллардаги Давлат Сиёсий Бошқармаси бундай фикрламаган. Улар ўлчовида Салимхон Тиллахонов ҳам, у билан олдинма кейин ҳибсга олинган Туркистон фарзандларининг бари — халқ душмани бўлган. Шу сабаб ҳам улар қаттиқ сиқиқса олинган.

1930 йил апрел ойи бошида Салимхон Тиллахонов устидан тергов бошлайдилар.

Салимхон Тиллахонов миллий ташкилотларга аъзо бўлиши 1917 йилнинг охири ва 1918 йилларга тўғри келгани ҳақида сўзлаб, эндиғина Бокудан қайтиб келганлиги, Абдуваҳоб Муродий ва Қаюм Рамазон билан Бокуда ўқиганини айтади. Ундан яширин ташкилотлар ҳақида сўзлаб бериш талаб этилган бўлса керакки терговдаги жавоблари биз билмаган кечаги тарихимизга дарча очади. Терговни «Муссават», «Миллий иттиҳод», «Иттиҳоди тараққий», «Миллий истиқдол» уюшмаларининг нима сабабли пайдо бўлганлиги қизиқтиради ва Салимхон Тиллахонов ўз жавобида шу уюшмаларнинг келиб чиқиш сабаблари ҳақида тўхталади. «Миллий иттиҳод» ҳақида сўзлар экан у, бунинг яширин уюшма экани, олдига қўйган мақсади, миллий мустақилликка эришиш йўлида курашмоқ, ва ахир оқибатда турк халқларининг бошини бириктириш эканини сўзлади.

Худди шу куни такрор ўтказилган терговда Салимхон Тиллахоновдан «Миллий истиқдол»нинг Тошкент бўлими ҳақида суриштирадилар. Унинг жавобидан биламизки, Салимхон Тиллахонов, Лазиз Азиззода ва Фофуржон Му-

саҳоновдан иборат учлик ташкил этилиб, Тошкент гурӯҳи раҳбари деб белгиланган ва Мунавварқори таклифи билан бу гурӯҳга эски аъзолар эмас, ёшлар қабул қилинган — Давлат Сиёсий Бошқармаси тазиқидан қўрқиб шу йўлни тутгандар. Негаки Сиёсий Бошқарма эски аъзоларни таниган, номма-ном билган. Маълум бўлишича Миллий истиқдолчиларнинг мустақил давлат тузалишларига ишончлари катта бўлган. Истиқдол кишанини парчалаб мустақилликка эришган давлатлар: Сербия, Болгария ва Финляндиядан андоза олмоқни кўзлагандилар.

Терговни учлик фаолияти қизиқтирган чоғи Салимхон Тиллахонов жавобида, ўзи, Фофуржон Мусахонов ва Лазиз Азиззодадан иборат учлик раҳбариятининг вазифаси маълум ғояларни олға суришдан иборат бўлганлигини айтади...

Шу савол-жавоблардан маълум бўладики, истиқдолчилар мустақилликка эришиш учун яширин кураш олиб борганлар. Халқни истибдодга қарши курашга чорламоқ вақти етганини, бунинг учун аввал кенг меҳнаткаш оммани уйқудан уйғотмоқ зарур деб билганлар. Буни истиқдолчилар йўлбошчиси Мунавварқори Абдурашидов яхши анлаган ва шунинг учун ҳам «Миллий иттиҳод» — яъни миллий бирлашишни олдиларига қўйган асосий вазифани амалга оширгачгина, яъни мустақилликка эришгачгина амалга оширилажагини айтиб 1927 йилларга яқин уюшма номини «Миллий истиқдол» деб ўзгартиришни таклиф этган. Демак олдидағи вазифа, аввало, миллий истиқдолга эришмоқ йўлидаги кураш, деб англамоқ зарур эди. Бундан бўён ҳам асосий вазифаларнинг бири миллатни уйқудан уйғотмоқ бўлиб, истиқдолчилар буни мамлакатнинг — яъни миллатнинг келажаги бўлган ёшлар орасида бошламоқ лозимли-

гини англаған ва мактабларда иш бошлаганлар. Шу сабабдан ҳам ўттизинчи ва ўттиз етти-ўттиз саккизинчи йиллар қатағонида минглаб муаллимлар ҳибсга олинди, узоқ ўлкаларга беш-үн йиллаб муддатга бадарға қилинди.

Салимхон Тиллахоновнинг терговдаги жавобидан бу уюшмаларнинг Октябр тўнтарувига қадар пайдо бўлишига чор ҳокимиятининг мустағидлик сиёсати ва Совет даврида эса ҳалқ ҳаёти борган сайин ёмонлашиб боргани, Туркистоннинг ҳомашё базасига айлануб бораётгани келтириб чиқарган норозиликлар сабаб бўлганини — бу уюшмалар миллатни ҳимоя қилиш усули тарзида бунёд бўлганини ва шу йўлда ўзидан неча-неча баробар кучли тузумга қарши бош кўтарганини биламиз. Ҳужжатлар бунга гувоҳ.

Ҳужжатлар яна шундан гувоҳлик берадики, у ҳам бўлса, элига, юртига катта муҳаббат жўш урган экан Салимхон Тиллахоновнинг қалбида. Узи ҳам, қалби ҳам чиройли бу кимса юртини, юртдошларини эркин кўришни орзулаган, орзулаш билангина кифояланмаган, бунга эришишга йўл излаган. Қандай қилиб бўлса ҳам, аввал рус чоризми, сўнг Совет истибоди остида эзилган элини мустақил давлат сифатида кўриш йўлларини излаганлардан бўлган экан.

Шунга ўхшаш бир қатор гувоҳликлардан мана энди мен тасаввур қиласман Салимхон Тиллахоновнинг кимлигини. Салимхон Тиллахонов элим деб, юртим деб ёниб яшаган, ҳуррият йўлида жонини фидо қилган миллатпарвар инсон. Биз мустақилликда яшаётган ҳозирги кунимизни яқинлаштириш учун ширин жонидан кечган покдомон инсон. Ўйлайманки, эндиликда биз юртимизнинг мустақиллиги учун курашган миллатпарвар оталаримиз руҳини шод этмоқ йўлида фидойилик намунасини кўрсатмоғимиз керак.

Яқинда мен жаҳонгашта севимли адбимиз Чингиз Айтматовнинг юртимизда олиб бориляётган улкан қурилишлар ҳақида қувониб, ифтихор билан сўзлаганини ўқидим. У ўз сўзида Ўзбекистонда қилинаётган ишлар бугун ёки эртани ўйлаб эмас, балки келажакни ўйлаб қилинаётганини, Ўзбекистондаги каби беқиёс қурилишни ҳеч ерда кўрмаганини эътироф қиласи.

Дунёнинг ишлари гаройиб экан, одамнинг ёмон отлиқ бўлиши қанчалар осону, лекин унинг пок номини тиклаш — оқлаш учун эса йиллар керак бўларкан. Салимхон Тиллахоновнинг пок номини тиклаш учун орадан олтмиш йил вақт ўтиши керак бўлди.

Аллоҳга беадад шукр: ҳақиқат букилади, лекин синмайди. Салимхон Тиллахонов ва уларнинг маслакдошлари кутган кунларга етдик — исhtiқдолга эришдик. Мустақиллигимиз етти ёшга тўлаётир. Ўзбек диёри, унинг фарзандлари мўъжизалар кўрсатаётир, ёшларнинг баркамол бўлиб етишишлари учун шароитлар яратилаётир. Иншооллоҳ юртимиз биз орзу қилган буюк мамлакатга айланади. Энди олдимизда турган асосий вазифа — мустақиллигимизни мустаҳкамлаш. Демак, ота-боболаримизнинг орзу-умиди бўлган хуррият байроини баланд кўтармоқдир.

ҲАЁТДАН УМИДИ КАТТА ЭДИ

Қизгинанинг исми Сурайё эди. Хонадонларида машъум воқеа юз беришидан бир ҳафтагина аввал дадаси Омонулла қизининг тўрт ойлик бўлгани шарафига зиёфат берган эди. Август ойининг охирлари — гарқ пишиқчилик. Дастурхон тўкин. Хонадонда куй ва қўшиқлар тонготар бир-бирига уланди. Ёр-биродарлар, амма-холалар қизалоқ шаънига энг яхши тиљакларни билдирадилар.



Омонулла Нусратуллаев.

— Омонулла, қизинг дарров бир яшар бўлдими? — ҳайрон бўлиб сўради меҳмонлардан бири. — Куни кечагина эмасмиди Тамматхоннинг кўзи ёриди деганинг?

— Менинг қизим, Сурайё юлдузим энди тўрт ойлик бўлди. Нега сўраяпсан?

— Зиёфат берганингга ёшига тўлибдими дебман. Ахир, одатда, ёшига тўлганда нишонланади-ку, туғилган кун...

— Менга қолса, қизимнинг туғилган куни ни ҳар ой нишонлайман. Унинг дунёга келиши менинг учун катта байрам. Ахир синглим билан Тамматхондан бўлак кимим ҳам бор... — ўксик товушда деди ва кейин ўзини кўлга олиб тантанавор қўшиб қўйди. — Ҳар ойнинг шу куни менинг учун байрам. Дўст бўлсанг шу куни тўғри кириб келавер...

Омонулла синглиси кўтариб ўтирган йўргакдаги гўдакни олиб бағрига босди.

— Катта бўлса, мен қизимни Оврупонинг марказига — Парижга юбориб ўқитаман! — деди баландпарвозлик билан.

— Дадасига ўхшаб олам таниб келарканда... Илоҳим ниятингга етгин, — гапга аралашди чақалоқни унинг қўлидан олар экан Муаттар синглиси.

Аммо Омонулланинг орзу-умидлари пучга чиқиб кетди. Орадан ўн кун ҳам ўтмай бўлиб ўтган бир воқеа, ҳамма орзу-ҳаваслар устидан қора чизиқ тортди. Тўрт ярим ойлик чақалоқ Сурайё бир кечада отасидан айрилиб етим бўлиб қолди.

Йўқ, йўқ, унинг отаси автомобил ҳалокатига йўлиқмади, ёки бирон безори пичоқлаб кетмади. Сурайёнинг отаи бузруквори Омонулла Нусратуллаев машъум 1937 йилда Сталин даври қатлиомига гирифтор бўлганларнинг бири бўлди.

Ярим кечада, кутилмагандан, тапир-тупур қилиб кириб келган нотаниш кишилар уй эгаларининг эсхонасини чиқариб юборган эди. Яқингинада кўзи ёриб, ҳали ўзига келиб ултурмаган жувон-актриса Тамматхон Зиёхонова қўрқиб кетди. Юраги қинидан чиқиб кетгудек гуп-гуп уриб, кураги тагида қаттиқ оғриқ бошланди. Бу оғриқ бутун умр унга ҳамроҳ бўлишини, шу куни бошланган дард сабаб бўлиб, оламдан ёш кетажагини ҳали ўзи ҳам билмасди. Осуда хонадонда тинчликка ўрганган гўдак тарақ-туруқ, гупур-гупурдан чўчиб уйғонганича чирқираб йиғлай бошлади. Балки, кейинчаликка бориб, юрагининг операция қилинишига олиб борган дард ўшанда бошлангандир...

Хонадон алғов-далғов. Кириб келган одамлардан бири — Ички Ишлар Халқ Комиссарлиги капитанимиди, бу машмашадан фойдаланиб — чақалоқни парваришлашда кўмаклашиш учун

ёлланган Ксения деган мордва қизини бир чеккага чорлаб: «Хўжайининг энди келмайди. Мен билан кет, менинг ҳам шундоқ қизим бор...» — деб шивирлаб улгурган эди.

Чақирилмаган «меҳмон»ларниң бу хона-донга кириб келишига 1937 йилниң 4 сентябр куни Ички ишлар Халқ Комиссарлиги тарафидан тайёрланган қарор ва худди шу куни Омонулла Нусратуллаевни ҳибсга олиш учун ёзиб берилган ордер сабаб бўлган эди.

Орадан қарийб олтмиш йил ўтиб ҳужжатларни ўрганарканман қалбимда жунбуш урган ҳислар, фикрлар туфёни — тўфонида ўзимни кўярга жой тополмайман.

Минг тўқиз юз ўттиз саккизинчи йилниң октябри. Бу кун ҳаво қанақа бўлган? Билмадим. Аммо ўша кунларга доир ўрганган ҳужжатларим менинг дард-дунёйимни қоронғи қилиб юбордики, анчагача ўзимга келолмай юрдим. Бу ҳужжатлар инсон ҳуқуқи поймол этилиб, ҳалқимизнинг илмдон, оқил, қалб қўзи ёруғ фарзандлари тоталитар тузум қурбони бўлганлигидан гувоҳлик беради. Ҳужжатларниң бари ўрис тилида бўлганлиги учун уларни ўзбекчага ўгириб, бироз қисқартириш билан диққатингизга ҳавола қиласман. Үқувчидан эса, бу ҳужжатларни диққат билан ўқиб, мағзини чақишни сўрайман.

**СССР ОЛИЙ СУДИ ҲАРБИЙ КОЛЛЕГИЯСИ
САЙЁР СЕССИЯСИННИНГ ЁПИҚ СУД МАЖЛИСИ
ҚАРОРИ**

1938 йил 9 октябр

Тошкент шаҳри

Раислик қилувчи Бриг ҳарбий юрист Зайцев ва биринчи ранг юрист Болдирев

Саркотиб 1-ранг ҳарбий юрист Батнер

Мажлис соат тўққизу йигирма дақиқада очилди.

Раислик қилувчи Омонулла Нусратуллаев-нинг Ўзбекистон ССР Жиноят Мажмуасига кўра айбланишига доир иши кўрилажагини эълон қилди. Саркотиб судланувчининг суд залида эканлигидан, гувоҳлар судга чақирилмаганлигидан огоҳ қилди.

Судланувчи ҳеч қандай талаб қўймади, суд таркибиға норозилик билдирамади.

Раислик қилувчи судланувчини унинг бўйнига қўйилган айблардан огоҳ қилди ва ўзини айбдор деб ҳисоблаш, ҳисобламаслигини сўради, судланувчи ўзини гуноҳкор деб билишини, олдинги терговлардаги кўрсатмасини тан олишини айтади.

Жосуслик қилганини бўйнига олади.

Охирги сўзида судланувчи ҳаётини сақлаб қолишларини сўрайди.

Суд маслаҳатлашиш учун кириб кетади.

Соат тўққизу ўттиз дақиқада ҳукм эълон қилинади ва суд мажлиси ёпилади.

**Раислик қилувчи Алексеев
Саркотиб Батнер**

Бор-йўғи ўн дақиқада бир инсоннинг ёруғ дунёда яшаш яшамаслиги ҳал этилди. Ҳаётини сақлаб қолиш ҳақидаги Омонулланинг илтимоси ҳавога учди-кетди...

Ҳукмдан қуидаги сатрларни ўрисчадан ўзбекчага таржима қилиб келтираман:

«Нусратуллаев ЎзССР Жиноят Мажмуасининг 58, 64 ва 67-моддаларида кўрсатилган жиноятларни содир этганликда айбдор топилиб, СССР Олий Суди Ҳарбий Коллегияси ЎзССР Жиноят Процессуал Кодекснинг 128 а, 131-моддаларига биноан

ҲУКМ ҚИЛАДИ

Омонулла Нусратуллаев олий жазога — отувга ҳукм этилиб, унга тегишли мол-мулки мусодара қилинсин.

Ҳукм Марказий Ижроия Комитетининг 1934 йил 1 декабри қарорига биноан зудлик билан ижро этилсин.

Раислик қилувчи...

Аъзолар...

Худди шундай бўлди. Ҳукм зудлик билан 1938 йилнинг 10 октябрину куни ижро этилди. Шу ўринда СССР Марказий Ижроия Комитетининг 1934 йил 1 декабри қарори ҳақида тўхталиб ўтишга зарурат туғилади.

Мана ўша қарор (Бу қарор С. М. Кировнинг отиб ўлдирилиши туфайли қабул қилинган эди).

ИТИФОҚДОШ РЕСПУБЛИКАЛАРНИНГ ҲАРАКАТДАГИ ЖИНОЙИ ПРОЦЕССУАЛ КОДЕКСИГА ЎЗГАРИШ КИРИТИШ ТЎҒРИСИДА СССР ИЖРОИЯ КОМИТЕТИ

Қ А Р О Р И

СССР Ижроия Комитети қарор қилади:

Террорчилик ташкилотлари ва Совет Ҳукумати ходимларига қарши олиб борилган террорчилик ҳаракатларини кўриб чиқиш ишига қўйидаги ўзгаришлар киритилсан:

1. Бу йўсингдаги ишлар тергови ўн кун ичida поёнига етказилсан.
2. Айлов хulosаси судда кўрилишига бир кун қолганда айборрга берилсан.
3. Иш тарафлар иштирокисиз кўрилсан.
4. Ҳукм устидан шикоят аризаси ва афв

ҳақида илтимоснома беришга йўл қўйилмасин.

5. Олий жазо ҳақидаги ҳукм чиқарилган заҳоти, зудлик билан ижро этилсин.

СССР Марказий Ижроия Комитети

Раиси

(М. Калинин)

СССР Марказий Ижроия Комитети

Котиби

(А. Енукидзе)

Москва. Кремл.

1.XII. 1934 йил.

Қанчалик даҳшатли қарор эди бу...

Бу қарор билан илк бор танишганимда руҳим тўнгиб қолди — ақлим бовар қилмади. Ишчи-дехқон ҳукумати санаалган совет мамлакати раҳбарлари бундай қарорга имзо чекиши мумкинлигига ҳали-ҳануз ишонгим келмайди...

Хўш, Омонулла Нусратуллаев ким эди?

Бу саволга жавоб топиш учун уни айбдор санаб ҳибсга олганларидан сўнг тўлдирилган маҳбус анкетасини жиноий ишнинг олтинчи саҳифасидан ўзбекчага ўғириб, диққатингизга ҳавола қиласман:

МАҲБУС АНКЕТАСИ

Фамилияси: Нусратуллаев

Исми: Омонулла

Туғилганийли: 1906

Туғилгандожои: Бухоро шаҳри

Тураржои: 2-Дегрез маҳалласи, 20-үй

Касби: механик муҳандис

Ишжои: Тошкент Темир йўл транспорти институти. Ишчи факультети, ўқитувчи

И ж т и м о и й к е ли б ч и қ и ш и: бек
И ж т и м о и й а ҳ в о л и: хизматчи
Р е в о л ю ц и я г а ч а: ўқувчи
М а ъ л у м о т и: олий
Партиясиз, ўзбек, СССР фуқароси.
О и л а с и: рафиқаси Таммат Зиёхонова — 1914
йилда туғилган ва тўрт ярим ойлик қизи бор...

Терговчи сўроқларидан биламизки, Омонулла Нусратуллаев ўн олти ёшида Олмонияга ўқишга юборилган — 1922 йил сентябридан 1929 йил июнигача, деярли етти йил Олмонияда — Лейпциг шаҳрида машина қурилиши мактабида ўқиган. Олмониядан қайтиб келгач, Тошкент Темир йўл институтининг ишчи факультетида дарс берган, уйланган, фарзанд кўрган. Лекин 1937 йилдаги Сталин даври қатлиоми уни четлаб ўтмаган. Ёш мутахассисни ҳибсга олиб, уни Олмонияда Советларга қарши миллий ташкилотга аъзо бўлганликда айبلاغанлар. Омонулла Нусратуллаев терговларда: (20.IX.37) «Менга қўйилган айбларни тан олмайман (14.XII.37). Ҳеч қандай Советларга қарши жосуслик ташкилотига аъзо бўлмаганман, СССРга қайтаётганимда ҳеч қандай жосуслик топшириғи олмаганман» деса, 1937 йилнинг 18 декабрида терговчининг: «Сизнинг Советларга қарши Олмонияни ёқлаб ташвиқот қилишингиз терговга маълум. Шу ҳақда кўрсатма беринг...» — каби дағдағасига жавобан дона-дона қилиб: «Мен буни инкор этаман, Советларга қарши ҳеч қандай ташвиқот олиб бормаганман», — дейди.

Ва ахийри 1937 йил 22 декабрида, ҳибсга олинганидан кейин уч ой ўтиб тергов тугаганлиги ҳақида протокол тузилади ва Омонулла Нусратуллаевга эълон қилинади. Лекин маҳ-

кумнинг азоб-уқубатлари бу билан барҳам топмайди. Орадан тўқиз ойга яқин вақт ўтиб, 1938 йил 13 сентябрида Омонулла Нусратуллаев қўшимча терговга чақирилади ва бу терговда Олмонияда туркистонлик ўқувчилар орасида Советларга қарши «Озод Туркистон» деган ташкилот бўлганини тасдиқлайди. Бундан ташқари 1929 йилда Олмониядан ватанига қайтиш арафасида советларга қарши миллий ташкилотга аъзо бўлганини, бу ташкилотнинг мақсади Ўзбекистонда Совет ҳокимиятини афдариб, Ўзбекистонни СССРдан ажратиб, буржуа миллий давлатини барпо этишдан иборат бўлганини, ҳар бир юртига қайтиб келган талабага СССРга қарши Олмония фойдасига жосуслик иши олиб бориш топширилганини тан олади. Бундан сўнг 23 сентябрда Фузайл Шераҳмедов, 1938 йил 3 октябрида Темурбек Казбеков (Олмонияда бирга ўқиган ўртоқлари) билан юзлаштирилганда ҳам жосуслик материаллари тўплаб Олмонияга жўнатганини тан олади.

Нега бирдан бундай ўзгариш? Дастрлабки терговда айбни бўйнига олмаган Омонулла Нусратуллаевдаги бу ўзгариш сабаби нима? Балки тўқиз ой давомида терговсиз маҳкумликда ҳибсда ётиш ўз ишини қилгандир?! «Бўлари бўлди, бўёғи синди» қабилида иш тутгандир Омонулла Нусратуллаев?! Ахир у дастрлабки терговда айтганидек бегуноҳ эди-ку!..

Тергов ишининг 106-саҳифасини ўрганиш жараёнида дуч келганим ёзувлар бу саволларга жавоб беради. Азиз ўқувчи, сиз ҳам бу ҳужжатларга эътибор қилинг. Ўша йилларда маҳбуслардан керакли маълумотларни олиш ниятида қаттиқ тазъийиқлар қўлланганлигини билиб оласиз. Мана ўша маълумотлардан айрим қисмини ўрис тилидан ўзбекчага ўтириб, эътиборингизга ҳавола қиласман:

МАЪЛУМОТНОМА

Ўзбекистон ССР Ички Ишлар Халқ Комиссарлигининг Леонид Исаакович Леоновнинг (архив) тергов иши бўйича...

Бу маълумотномада Л. И. Леонов-Немировский 1941 йилнинг 7 июлида Ўзбекистон ССР Олий Суди Ҳарбий Коллегияси тарафидан содир этган жиноятлари учун отувга ҳукм этилганлиги ва ҳукм 1941 йилнинг 21 июлида ижро қилинганлиги кўрсатилади.

Леонов-Немировский Ўзбекистон ССР Ички Ишлар Халқ Комиссари муовини бўлиб хизмат қилган кезларда аксилинқилобий шахслар ва ташкилотларга қарши кураш баҳонасида оператив ходимларга Ўзбекистонда истиқомат қилган аҳолини оммавий ҳибсга олиш топширигини берганликда айбланган. Ҳибсга олинганлар соҳталаштирилган маълумотлар асосида оғир аксилинқилобий жиноятларда айбланганлар.

Леонов-Немировский оператив ходимларга тергов жараёнида қонундан ташқари усусларни қўллаш ҳақида бўйруқ берганликда айбдор деб топилган. Бунинг натижасида жуда кўп маҳбуслар қамоқда ўлиб кетганлиги суд ҳукмида қайд этилади...

Омонуллага ҳам, балки, шу усул қўлланилганdir? Балки у азоб-уқубатларга дош беролмай, дастлабки терговдаги сўзларидан қайтиб, аввал инкор этган айбларни бўйнига олгандир? Ким билади, балки... Лекин ундан бошқа ҳам сабаблар бўлгандир...

Ҳар қанақа жамиятда, у буржуа бўладими, демократик бўладими, хиёнатчи, тухматчilar бўлади. Бизнинг, ўша чоқларда социалистик деб номланган жамиятда ҳам тухматчи, хиёнатчilar бўлган. Ўща йилларда юз бераётган бу қонли қатлиом даврида бўлаётган тўс-тўпалоннинг ҳайбаракаллачилари бўлган. Шунинг учун бўлса

керакки, оталаримиз, момоларимиз дуога қўл очганда қуруқ тухматдан асрарни Яратгандан тилайдилар.

Омонуллага ҳам тухмат қилувчилар топилди. У билан бирга ишлаганлардан бир нечаси, уни Олмонияни мақтаганликда, Совет тузумини ёмонлаганликда айбладилар. Ҳибсдаги маҳкумнинг қўлидан нима ҳам келарди?! Ўша йилларда қатлиомнинг қўлами қай даражага етганини менга маълум бўлган икки мисол билан тахминан белгилаш мумкин. Масалан, Омонулла Нусратуллаев куёв бўлган Зиёхон эшон ва Нисабувиларнинг Омонулладан ташқари яна икки куёви ҳалқ душмани деб ҳибсга олинган эди. Ўша чоқларда Себзор даҳасида истиқомат қилган бу хонадон эгасининг бир йўла уч қизи. Шоҳидахон, Хабибаҳон ва Тамматхон қўлларида биттадан бола билан бева қолдилар. Бу хонадонда бирданига уч етим қиз: Эркли, Раъно, Сурайё — бири ўн, яна бири беш ва тўрт ярим ойлик Сурайё тирик етим бўлиб қолишиди. Беваларнинг бошидан нима кечди-ю, етимлар отасиз не-не хўрликларни бошларидан кечирдилар фақат ўзларига ва яна Аллоҳга аён.

Ўша 1937—1938 йилларда, ҳозирги «Саодат» журнали «Ёрқин ҳаёт» номида чоп этилган кезларда, бу редакциянинг уч ходими, муҳаррир бўлиб хизмат қилган, кейин район партия комитети котиби бўлиб хизмат қилган Тожихон Шодиева, яна бир муҳаррир, Тошкент шаҳар, Киров район партия Комитети котиби бўлиб ишлаган Собира Холдорова ва редакция адабий ходими Мариям Султонмурадова (қўлида олти ойлик гўдаги билан) ҳибсга олиниб, турли муддатларга совуқ ўлкаларга бадарға қилиндилар. Мана шу икки мисолнинг ўзи мутеълигимиз қай даражага етганлигидан далолат беради.

Булар бари тоталитар тузумнинг ҳалқ усти-

дан юргизган ғарови эди — ҳуқуқсизлигимиз мезони эди. Бу ҳуқуқсизлик жуда узоқ давом этди — унинг оқибатида неча-неча минг туркестонликнинг ёстиғи қуриди...

Улар қанча эди? Лекин, афсус, билмаймиз. Лекин билишимиз керак... Омонулла Нусратуллаев ҳибсга олингач, тинтуб ҷоғида унинг хона-донидан нимаики олиб кетилган бўлса, ҳеч бири қайтарилимаган. Шунинг натижасида у қамалган ҷоғида тўрт ярим ойлик қолган қизи Сурайёнинг хона-донида отасининг бирон бир сурати йўқ. Қанчалар баҳтиқаролик бу ахир!.. Сурайёнинг қўлида отасидан ёдгорлик бўлиб, икки ҳужжатгина қолди. Бири — Омонулланинг вафот этганлиги ҳақида 1958 йил 28 октябрда берилган гувоҳнома. Ундаги ўлим сабаби кўрсатилиши керак бўлган ўрин бўш — ҳеч нима ёзилмаган. Иккинчи ҳужжат — Омонулланинг гуноҳсиз эканлигини тасдиқлаб, оқланганлигига гувоҳлик берувчи ҳужжат.

Инсон ҳуқуқи ўша йилларда қанчалар поймол этилганлигини яна бир ёзувдан англаб олсак бўлади. Шу «иш»нинг 86-саҳифасида Омонулла Нусратуллаевнинг рафиқаси Таммат Зиёхонованинг СССР Ҳарбий трибуналига йўллаган аризаси бор. Аризада у эрининг нима сабабдан қамалганини ҳануз билмаслигини айтиб, унинг ўлик-тириклиги, қаердалигини билиш истагини ёзади. Ариза тагида 1958 йил 18 август санаси. Орадан йигирма бир йил ўтиб — тўрт ярим ойлик қолган қизи йигирма бир ёшга киргандა ҳам эри тақдирини билмаган у баҳтиқаро аёл...

Бундай баҳтиқаролар қанча бўлган экан?!

...Қизгинанинг исми Сурайё эди. Отаси уни Парижга юбориб ўқитиши, олий маълумотли бўлишини орзу қиласарди. Лекин унинг орзулари кўксисида кетди — ўн гулидан бир гули очилмай ҳазон бўлди. Сурайё эса йигирма ёшида отаси-

нинг фожеали қисматидан огоҳ бўлди. Отасидан қизига ҳатто битта сурати ёдгор бўлиб қолмади. Аммасиникида қолиб кетган бир суратга ялина-ялина эга бўлди. Унга отасидан яна унинг ўлими ҳақидаги гувоҳнома қолди. Энди у, набираларининг бобоси ҳақидаги саволлари-га жавоб беролади. Ким билади, балки, мавхумликдан кўра, қанча аччиқ бўлмасин, ҳақиқатни билган яхшироқдир! Муҳими шуки, ҳақиқат эгилиши мумкину, лекин синмаслигини, қирқ йилда бўлса ҳам ҳақиқат юзага чиқишига Сурайё ўз ҳаёти мисолида — отаси қисмати мисолида ишонч ҳосил қилди.

Ҳаёт давом этади. Агар Омонулла Нусратуллаев ҳаёт бўлганида невара ва чеварали бўлган бўларди. У кутган кунлар келди — юртимиз мустақил, ватанимиз узра мустақил Ўзбекистон байроби ҳилпирамоқда.

Бу демак, бизнинг — мустақил юрт фуқароларининг зиммасига катта масъулият юклайди. Бу мустақилликка кўз тегдирмаслигимиз, юртимизни ёмон кўзлардан, қора нийятлардан омон сақламоғимиз керак. Бу масъулият фарзандларимиз, юртимиз келажаги бўлмиш ёшларни зийрак ва тийрак бўлишга, мустақиллик берган имкониятларни баракали истифода этиб, ҳаётдан муносиб ўрин эгаллашга чорлайди.

КЎКЛАМ ҲАЗОНИ

Минг тўққиз юз ўттиз еттинчи йилнинг саккизинчи январ куни Ўзбекистон Ички ишлар халқ комиссарлиги Давлат хавфсизлиги бошқармаси ходими қўлига 24 рақамли ордер топширилди.

Ордерда: «Сизга Карл Маркс кўчасидаги Тошкент Табобат институтига қарашли уйда истиқомат қилувчи Саттор Жабборовнинг хонадонида тинтув ўтказиб, ўзини ҳибсга олиш

топширилади, дейилганди. Бу ордерни олган ходим ўша куниёқ топшириқни бажаришга киришади — уй коменданти гувоҳлигига уйда тинтув ўтказилади, Саттор Жабборовнинг паспорти, Олмониядаги СССР талабалари уюшмаси аъзосилиги тўғрисидаги гувоҳномаси, учта ён дафтар, олмон тилида чоп этилган «Шарққа йўл» деган китоб ва 1936 йилда олмон тилида чоп этилган турли илмий-техник газетлар, доктор Р. Энглянд номига ёзилган гувоҳнома, катта-кичик ўн беш дона сурат, юз сўмлик кредит билети, уч боғлам турли-туман мактублар ва ҳоказоларни мусодара қилди. Саттор Жабборовнинг онаси, хотини ва болалари чирқиллаганча қолади, унинг ўзини олдиларига солиб олиб чиқиб кетадилар — Ўзбекистон ССР Ички Ишлар Халқ Комиссарлиги комендатурасига топширадилар. Бу ерда навбатчилар бошлиги ва кичик назоратчи иштирокида Саттор Жабборовнинг чўнтакларини қоқиширадилар ва бор-йўгини хатлайдилар.



Саттор Жабборов.

Саттор Жаббор устидан жиноят иши қўзгашга асос бўлган ҳужжатни «Жиноятнома»нинг биринчи саҳифасидан топдим. 1937 йилнинг 7 январида ёзилган қарорда Саттор Жабборга доир материалларни кўриб чиқиб, у Олмонияда ўқиб юрган кезлари Берлиндаги «Туркистон» деган аксил инқилобий уюшманинг фаол аъзоси бўлган деган қарорга келган терговчининг наздида бу уюшма Ўзбекистонда миллий буржуа давлати барпо этишни ўз олдига мақсад қилиб қўйган. Тошкент табобат институтида дарс бериб юрган Саттор Жаббор талабалар ўртасида миллатчилик фояларини олдинга сурган. Олмонияга мойиллик кайфиятларини ташвиқ қилган, — каби тахминлар билан Саттор Жаббор гуноҳкор топилган. Терговчи бирор далил келтирмаёқ Саттор Жабборовни ЎзССР Жиноят Мажмуасининг 67 ва 66—1 қисми билан жазога лойиқ топади.

Бу — Саттор Жабборнинг тергов мобайнида йигирма икки ой давомида чеккан азоб-уқубатларининг муқаддимаси эди...

Саттор Жаббор асли ким эди?

Тергов давомида тўлдирилган анкетадан унинг 1905 йилда Тошкентда туғилган, 1930 йилда Берлин дорилфунунининг кимё факультетини битириб, Тошкент табобат институтида ишлагани маълум. Айтишларича, у билан бир марта сўзлашган одам яна суҳбатлашсан дер экан. Билими чуқур педагог, талабаларнинг севимли устози бўлган экан. Унинг дид билан кийинишидан тортиб, сўзлаган ҳар бир сўзи талабаларни ўзига ром қилар, аксарият ёшлар ма-на шу ўқтам ўқитувчиларига ўхашни орзу қиласар эканлар.

Шогирдларининг айтишича, Саттор Жаббор билимдон педагог бўлиш билан бирга шоир табиат инсон ҳам экан. Ўзи ҳам шеър машқ

қилар, ҳатто поэма ҳам ёзган экан. Саттор Жабборнинг машқлари ўша даврнинг атоқли ва севимли шоири Фитратга манзур бўлган. Фитрат унинг ижодий келажагига умид билан қараган бўлса керакки ёш ижодкорнинг поэмасини таҳrir қилиб берган экан. Саттор Жаббор яна талабалари орасидан педагогикага лаёқатликларини ажратиб, ўқувчиларга дарс бериш сирларини уларга ўргатган ҳам, табобатга доир терминлар таржимаси билан шуғулланган. Саттор Жаббор йигирма бешга яқин илмий иш чоп этдирган. Шу билан бирга у химия дарсликларини олмон тилидан ўзбек тилига ўгирган, русча-ўзбекча, ўзбекча-русча кимёвий атамалар луғатини тузишда иштирок этган. Бу ишлари билан у, ўзбек олимларини оламшумул илмий янгиликлар билан таништириб борган. Олмониядан қайтиб келгач у то 1934 йилгacha биохимия кафедрасини бошқарган. 1935 йилдан то даҳшатли 1937 йилгacha ноорганик химия кафедрасига раҳбарлик қилган. Саттор Жаббор 1936 йилда жумҳуриятда биринчилар қаторида химия фанлари номзоди унвонини ёқлаган. Ана шундай кўп қиррали олим, меҳрибон устоз, ажойиб инсон эди Саттор Жаббор. Табиат ундан ажойиб инсоний фазилатларни ҳам аямаган эди. Қадамидан ўт чақнар, лочиндай елиб юради. Талабалар орасида ҳам, ҳамкасабалари ўртасида ҳам ҳурмати катта эди унинг. Талабалар унга ўз оғаси ёки отасига таянгандек ишонишарди, шодликлари, ташвишларини ундан яширишмас ва ўз навбатида устозлари улардан ҳам маънавий, ҳам моддий ёрдамини аямасди. Саттор Жаббор Тошкент Табобат институти ҳаётида ҳам, жумҳурият тиббиётини янги погонага кўтариш ишларида ҳам фаоллик кўрсатган. Саттор Жаббор СССР соғлиқни сақлаш Ҳалқ комиссарлиги коллегияси аъзоси бўлган.

Аммо афсус, минг афсус унинг қанчадан қанча ниятлари гул очмай кетди, режалари поймол бўлди, орзулардан дилида яратган боғи олим ҳаётининг кўкламидаёқ ҳазон бўлди...

Даҳшатли 1937 йил! Мана шу даҳшатли йиллар тегирмонида тортилиб кетган эл фарзандларининг саноғига етаолармиканмиз?! Сизлар дош берган кулфатларга тоғлар ҳам дош беролмас, юртимниң мушфиқ аёллари. Сизларниң мунг тўла боқишиларингиз орадан олтмиш йил ўтганидан кейин ҳам кўз ўнгимда гавдаланганида ўзимни қўярга жой тополмай қоламан. Сизларниң ҳолингиз нима кечган экан-а?!

Афсус, афсус! Очилмайин сўлган у гуллар — Саттор Жабборлар! Эссиз уларниң ҳайф кетган умрлари!

...Саттор Жабборниң жиноий ишига алоқадор тергов протоколларини ўрганар эканман қирқ беш йил давомида бутун эл-юртдан, маҳбусларниң ота-оналари ва фарзандларидан пинхон тутилиб келган воқеалардан воқиф бўлдим: Ўшанда — 1922 йилда Бухоро Ҳалқ Шўролар Жумҳурияти нафақаси билан ўқиб келиш учун Олмонияга жўнатилаётган олтмиш нафар ёш толиблар қаторида шоир Фитратниң тавсиясига кўра Саттор Жаббор ҳам жўнаб кетган экан.

Улар она юртларига 1930 йилларда не-не орзуласар билан қайтиб келдилар. Олмонияга жўнатилаётганларида улар шаънига айтилган гаплар шундоққина дилларида муҳрланиб қолганди. Зеро у серфараҳ лаҳзаларда: «Сизлар жумҳуриятниң ақли-идроқи, суюнган тоғи, ишонган боғи бўласизлар. Ҳалқимизниң онгини кўтаришда, маданиятини оширишда катта хизматлар кутади сизларни!» — дейилганди-да.

Саттор Жаббор 1922 йилдан 1925 йилгача

Берлиндаги ўрта маълумот берадиган ўқув юртида билим олди, 1925 йилдан 1927 йилгача Гейделберг дорилфунунида ўқиди, 1928 йилдан 1931 йилгача Берлин дорилфунунининг кимё факултетида таҳсил кўрди.

Мусофиричилик, талабаликнинг мушкул йиллари... Тўққиз йил мобайнида ҳорижда таҳсил олишнинг ўзи бўладими. Бир оғиз олмон тилини билмай Олмонияга ўқишга бориш учун ҳам юрак керак-ку... Ўша талабалик йилларидағи қийинчиликлар тергов протоколларидан ҳам шундоққина уфуриб турибди. Аввалига, 1924 йилгача Бухоро халқ Шўролар жумхурияти томонидан. 1925 йилдан 1929 йилгача ҳам Ўзбекистон ССР тарафидан нафақа билан таъминланди. 1930 йилда стипендия тўлаш тўхтатилгандан кейин унга Берлин дорилфунунининг Гумболъд фондидан ажратилган маблағ ҳисобидан ёрдам кўрсатиб турилди. Бу кўмак ҳам осмондан тушганий ўқ: дорилфунун профессори Шлейтит ва Буденштейнлар узоқ Туркистондан келган қорақош қора кўз йигитнинг мусофиричиликнинг ҳамма қийинчиликларига бардош бераётганига тан бериб ёрдам қўлини чўзгандилар. Саттор Жабборнинг ўзи ҳам «олма пиш, оғзимга туш» деб ўтирумай Браур пиво заводининг лабораториясида ишлаб, ойига 200—250 марка ҳақ олиб турди.

Тергов профессорларнинг бу қўллаб-қувватлашини ҳам, лабораториядаги хизматини ҳам Саттор Жабборнинг гуноҳлари қаторига тиркади. Терговчилар уни Олмонияда ўқиб юрган вақтида «Туркистон» деган аксилинқилобий миллатчилик уюшмаси аъзоси бўлганликда айбладилар ва Саттор Жаббордан бу уюшмада Мустафо Чўқаев билан Заки Валидов бошчилигига талабалар ўртасида аксилинқилобий миллатчилик ишлари олиб борганлигини тасдик-

лайсизми, деб суриштирудилар. «Туркистон» уюшмаси таъсис этган «Кўмак» номли аксилинқилобий журналда иштирокини тан олишини талаб қилдилар. Бунга жавобан Саттор Жаббор «Кўмак» журналида атиги бир бор асари чоп этилганини, бу журналда унинг, 1930 йилда Тошкентда ёзилиб, шоир Фитрат таҳрир қилиб берган «Тилак» поэмаси ўзи бехабар ҳолда чоп этилганлигини билдиради. «Бу журнал «Туркистон» уюшмаси томонидан чоп этилишини билмасдим. Бу журналнинг Ўзбекистонда тарқатилиши ҳисобидан Боту менга Сайд Али Жўраев орқали олтин пул билан 20—25 сўм бериб юборган», — дейди Саттор Жаббор 1937 йил 9 январдаги терговда. (Бу чоққа келиб Боту ҳам каторгага ҳукм этилган эди).

Эртаси куни — ўнинчи январда яна бир тергов. Бу гал терговчи, Саттор Жабборнинг уйини тинтув қилғанларида чиққан мактублар ва дафтарлардаги 24 манзилгоҳ бўйича тушунтириш талаб қилади.

Орадан бир ҳафта ўтиб, 17 январда терговчи шу чоққача гумон қилинувчи деб саналиб келган Саттор Жабборни яна сўроққа тутиб ён дафтардаги яна 14 манзилгоҳни суриштиради, профессор Энглиянд ҳақида саволлар беради. Бу ҳол 19 январда ҳам шу янглиғ такрорланади.

1937 йилнинг 23 январидаги қарорда Саттор Жаббор Олмонияда ўқиб юрган йилларида (1922—1931) «Муқаддас Туркистон» аксилинқилобий ташкилотга аъзо бўлишиликда, СССРга қайтиб келгач Советларга қарши бўлган шахслар — профессор Энглиянд, архитектор Г. П. Бауэр билан (улар Олмония фуқаролари эди) алоқада бўлганлиқда, муаллимлар ва талабалар орасида аксилинқилобий фикрларни олға суришда айбланиши кўрсатилади.

1937 йилнинг 23 январидан Саттор Жаббор

айбланувчи сифатида сўроқ қилинабошланган. Ундан 1937 йил 23 январида: «Сизни Ўзбекистон ССР Жиноят Мажмуасининг 67 ва 66—1 моддалари билан айблаш ҳақидаги қарори бўйича ўзингизни айбдор деб ҳисоблайсизми?» — деб сўрайдилар.

Бунга жавобан Саттор Жаббор: «ЎзССР Жиноят Кодексининг 66—1 қисми ва 67-моддалари бўйича менга тақалган айбларда ўзимни гуноҳкор санамайман. Олмонияда ҳам, СССРда ҳам аксилинқилобий фикр юргизмаганман», — дея қатъий жавоб қиласди. Терговчилар тахминида у, Заки Валидий, Мустафо Чўқаев, Аҳмад Наим билан аксилинқилобий алоқада бўлганликда гумон қилинади. 1937 йилнинг 31 январидаги, 9—17 февралдаги терговларда ҳам, ундан кейинги яна саккиз терговда Саттор Жаббор ўзини айбдор деб санамаслигини айтади. Шундан сўнг 1937 йил 2 февралядан бошлаб гувоҳлар сўроқ қилинади. Ўн кишининг гувоҳлиги етмагандай, 1930 йилда ҳибсга олиниб, 1931 йилда отиб юборилган Абду Ваҳоб Муродийнинг ўша йилларнинг 30 декабридаги кўрсатмаларидан Саттор Жабборга тегишли сатрлар ҳам олиниб «иш»га тиркалади.

...Неча-неча терговлар, гувоҳларни сўроқ қилишлари, юзлаштиришлар оқибатида ахийри Саттор Жаббор аввалги терговларда таъкидланган, лекин биронтасини ҳам тан олмаган жиноятларда айбланади ва буларга қўшимча равишда аксилинқилобий «Ёш Туркестон» журналини чоп этишда ва тарқатишида, Олмониядаги буржуа матбуотларида Советларга қарши тухматдан иборат мақолалари билан қатнашишда, «Озод Туркестон» деган жосуслик ташкилоти билан Ўзбекистондаги яширин аксилинқилобий уюшма ўртасида алоқа олиб боришда айбланади. 1938 йилнинг

сентябридаги айлов хулосасида Саттор Жаббор яна Берлинда Олмония яширин полицияси жосуси профессор Ванг-Кауп томонидан Олмон разведкаси фойдасига иш олиб боришига жалб этилгани, Олмон ҳукуматидан мунтазам равишда моддий ёрдам олиб турганлиги кўрсатилади. «Олмония яширин полицияси Саттор Жаббор ҳали Олмониядалик чоғидаёқ ундан ўзбек талабалари ўртасида яширин жосус сифатида фойдаланган» — деб кўрсатилади.

Саттор Жаббор Олмониядан Ўзбекистонга қайтганидан бўён Шўрсув атрофидаги конларда олтингугурт заҳиралари миқдори, Олмалиқ қурилишидаги тоғ жинсининг табиати, бу жинсдан мис олиш муаммоси, унинг заҳираси миқдори ҳақида маълумот тўплаб (1932 йилгача) Энглияндга етказган. Ундан ташқари, 1934 йилда Ленинградда Олмон разведкачиси профессор Шток билан алоқа боғлаган ва унга Чирчиқ қурилишининг бир қатор саноат обьектлари ҳақидаги маълумотларни топширган. 1936 йилнинг июлида Марғилон, Наманган пиллакашлик фабрикаси, Тошкент кислород заводига тегишли маълумотларни Султон Матқул орқали Олмон разведкасига етказган... «Шундай даҳшатли гуноҳлар унга тақалади-да, сўнгида Саттор Жаббор ўзини гуноҳкор деб тан олгани кўрсатилади. (Нима бўлди ўзи? То шу чоққача Саттор Жаббор ўзини айбдор санамай келаётганди-ку...)

Шундай қилиб унга тақалган гуноҳларга яна янгилари қўшилаборади ва унинг жинояти Ўзбекистон Жиноят Мажмуасининг 57—1, 67, 64, 58-моддалари билан айбдор кўрсатилишига сабаб бўлади. Саттор Жабборни СССР Олий Суди ҳарбий ҳайъати судига топшириш кўрсатилади.

1938 йилнинг 8 октябридаги СССР Олий суди ҳарбий коллегияси сайёр сессиясининг тайёрлов мажлиси б protokoliга raис Brig ҳарбий юрист Алексеев, аъзолар: ҳарбий юрист Зайцев, 1 ранг ҳарбий юрист Батнерлар имзо чекишган. Прокурор ёрдамчиси Шульц Анн қатнашган бу тайёрлов мажлиси Саттор Жабборни Ўз ССР Жиноят Мажмусининг юқорида қайд этилган моддалари билан айблаб ишни судга оширишни, қораловчи ва оқловчисиз, гувоҳларни суд мажлисига чақирмасдан кўриб чиқишига қарор қиласди.

Шунинг ўзи маҳбуснинг ҳаёт-мамоти олдиндан ҳал қилиб қўйилганининг далили эмасми?! Ҳатто хўжакўрсинга бўлса ҳам оқловчи ва гувоҳлар чақирилмади. Чақиришни лозим кўришмади — зарурат йўқ, деб ҳисоблашди. Инсон хуқуқининг бунчалар поймол этилишига нима дейсиз!

Охирги сўзида судланувчи ўзининг ҳали ёшлигини, ҳибса ётган муддат ичидагу руҳиятида катта ўзгариш бўлганлигини назарда тутиб, унга мурувват қилишларини сўрайди.

Аммо Совет Социалистик Республикалари Иттифоқи номидан СССР Олий Суди Ҳарбий Ҳайъати чиқарган ҳукм даҳшатли эди. Ҳукмда олдинги терговлар давомида тузилган протоколлардаги айбномалар санаб ўтилади-да, Саттор Жаббор олий жазога — отувга ҳукм этилади, унга тегишли мол-мулк мусодара этилиши таъкидланади. Ҳукм сўнгида СССР Марказий Ижроия Кўмитасининг 1934 йил 1 декабридаги қарорига биноан ҳукмни зудлик билан ижро этиш таъкидланади.

Ҳукмга, яна бизга таниш бўлиб қолган Алексеев, Зайцев, Болдирев ва саркотиб Батнерлар имзо чекишган. Мен улар имзосини отишга маҳкум этилган неча-неча зиёлилар ус-

тидан чиқарилган ҳукмларда кўрдим. Саттор Жаббор билан бирга Олмонияга бориб ўқиб қайтганларнинг кўпларининг тақдирини мана шу шахслар худди шундай якунлаганлар. Ўзбекистон Жумхуриятининг ўша чоқдаги раҳбарияти яхши ниятлар билан қилган амалига таомомила ўзгача тус беришганди. Олмониядан олий маълумот олиб қайтган бирқанча ёшларнинг тақдирини мана шундай фожиали якунлашганди.

Қарорлар, ҳукмлар ва ажримларга имзо чеккан бу шахслар неча кишининг ёстигини қуритди экан? Бева-бечоралар, етим-есирлар армиясига яна қанча баҳтиқаро қўшилди экан?..

«Жиноятнома»ни ўрганишда давом этаман.

«Ие, бу қандоқ бўлди!» — деб юбораман ногаҳон. Кўрган кўзларимга ишонмайман. Во ажабо! Бу қўғирчоқ ўйини кимга ва нега керак? Ахир ҳукмга кўра Саттор Жаббор 1938 йилнинг 9 октябрида зудлик билан отилиши керак эдик! Орадан икки йил ўтгач бўлган бу ҳангомаларга нима деса бўлади?!

«Ё парвардигори олам, ўзинг қўлла, юрагим қинидан чиқиб кетмасин» — деб илтижо қиласман яратганга. Юрагим гупури, томирларимнинг уриши шу хонада ишлаётган — мен сингари кимларнингдир қисматини ўрганаётган ҳамкасларим ва олимларга ҳам эшитилаётгандай алантгайман.

Юракни чанглаб, Парвардигорга илтижо қиласдан ҳолатлар шу билан адогига етмайди. «Жиноятнома»ни варақлашга тушаман ва яна бир даҳшатга рўпара келаман. Ҳозир таърифлаганим саҳифадан кейинги 244-саҳифада СССР Олий Суди ҳарбий ҳайъатининг муҳри босилган 1956 йилнинг 4 февралида 38 рақамли форма бўйича ёзилган йўлланма бу.

СССР ИЧКИ ИШЛАР БОШ БОШҚАРМАСИ БОШЛИФИГА

Бош ҳарбий прокурор номига юборилган ушбу йўлланмадаги сатрларни сизларга тўлиқроқ маълумот бериш учун батафсил келтираман.

«Фуқаро М. К. Хўжаеванинг ўғли Саттор Жабборнинг вафоти ҳақида гувоҳнома бериш учун ЗАГСнинг тегишли бўлимига кўрсатма беришингизни сўрайман.

1905 йилда туғилган Саттор Жаббор СССР Олий Суди ҳарбий ҳайъати томонидан **1938 йилнинг 15 октябрида** суд қилинган ва жазони ўтаб юриб, **1940 йилнинг 26 декабрида** вафот этган.

Фуқаро М. К. Хўжаева Тошкент шаҳри, Москва райони, Жаркўчанинг 9 берк кўчасида истиқомат қиласди.

СССР Олий Суди Ҳарбий ҳайъати
Раиси ўринбосари, юстиция
полковники

(В. Борисглебский)

Ана холос!!! Буниси қандоқ бўлди??!

«Жиноятнома»нинг 1 жилди, 243 саҳифасидаги маълумотномада кўрсатилишича, Саттор Жаббор 1938 йилнинг 9 октябрида Тошкент шаҳрида отиб юборилган эмасмиди?

Агар у жазони ўтаб юриб **1940 йилнинг 26 декабрида вафот** этган бўлса, икки йилу, икки ой қаерда бўлди — «Жиноятнома»да бу борада ҳеч қандай маълумот йўқ...

Нима бу? Ёлғончиликми? Кўзбўямачиликми? Адолат қайда қолди? Ҳақиқат ердаю, калити осмондами?

Онаизорнинг казо-казо адлия ходимларига нома йўллашидан умиди уларнинг адолат қили-

шига ишончдан масмиди? Онаизорнинг умид билан битган илтимосномасига собиқ Иттифоқ пойтахти Москвадан, СССР Олий Суди раёсатидан ёлғон жавоб олса — қайси қолипга сиғади бу майнавозчилик?!

Умуман бундай чалкашликлар ёлғиз Саттор Жабборнинг ишидагина эмас, бошқа «иш»ларда ҳам бор. Ахир ёлғонни ёзавериб, ҳали «немисларнинг, ҳали инглизларнинг жосусларини» тергов қиласвериб чалкашсалар ажаб эмас. Сўзимнинг тасдиқи учун халқимизнинг севимли шоири Фитратнинг «иши»даги чалкашликлардан мисол келтирмоқчиман.

Архивдаги «Иш»нинг 133 саҳифасидаги айланувчи Фитратнинг 1938 йилнинг 20—23 майдаги тергов протоколида терговчиларнинг «Жиноятнома»нинг 149 саҳифасида мана бундай саволи бор:

САВОЛ: — 1937 йили сиз Советларга қарши амалий ва жосуслик иши учун **инглиз разведкасидан** пул олгансиз...

Сўнг яна: «— Сиз ўзингизни Англия фойдасига қилган жосуслик фаолиятингиз тўғрисида тўлиқ, батафсил жавоб бермадингиз», — дейилади. Демак Фитрат, инглиз разведкаси жосуси деб саналиб унга қатор саволлар берилади-да, кейин бирдан осмондан тушгандай бошқа холоса чиқарилади. «Иш»нинг 175—177-саҳифаларида олти пунктдан иборат «Айлов хуносаси»нинг тўртинчи «г» пунктида **«Фитрат фашист Германияси разведкаси ташкилотлари билан алоқа боғлади, Совет ҳокимиятини афдариш мақсадида қуролли ҳаракатга эришишга уринди»** каби бирон факт билан тасдиқланмаган холосага келинади.

Даҳшат шундаки, 1938 йилнинг 20—23 май кунларидағи савол-жавобда инглиз жосуси саналган Фитрат худди шу йилнинг 5 октябрида

(олти ой қамоқда ётгандан кейин) немис фашизми жосуси деб қоралана япти. Собиқ Совет Иттифоқи адлиясининг казо-казолари чала муллалармиди? Ёки бу ёпиқли қозон абадий ёпиқ бўлади деган ишончда атай қилинган ноҳақликлармиди?

Бир соф виждонли одамни гуноҳкор қилиш учун хоҳлаган айбларини тақаш мумкин эканда! Буниси қандоқ бўлди? Ким жавоб беради бу саволларга? Сталин даврининг қатли оми туғайли ўттизинчи ва эллигинчи йилларда зиёлилар, ҳалқ орасидан етишиб чиқсан бўлакча фикрловчилар биттадан териб олинди, уларга «халқ душмани» деган тавқи лаънат тамғаси босилди, қамалди, бадарға қилинди, отиб юборилди. Ҳамма бирдай фикр юритиши керак бўлди у ҷоқларда. Ўз мустақил фикрига эга бўлганларга қарши курашилди. Бу тенгсиз кураш эди...

Турли оммавий ахборот воситаларида Сталин даврининг қатағонига гирифтор бўлганлар сони турлича келтирилади. Баъзилар бу рақамини йигирма миллион деса, бошқа бирлари 60—70 миллионга етганини ёзадилар. Лекин аслида бу рақам қанчага етган?

Собиқ ССРДавлат хавфсизлик қўмитасининг раиси В. А. Крюковскийнинг ёзишича: «30—40 ва 50-йиллар бошида 3 миллион 778 минг 234 нафар одам суд қилиниб, улардан 786 минг тўқсон саккиз нафари отиб юборилган. Бинобарин, шуниси ҳам борки, уларнинг аксарияти бегуноҳ кишилар эди...» Яна унинг сўзига қараганда: «Ички ишлар ҳалқ комиссарлиги — Давлат Хавфсизлик министрлигининг бир ярим минг ходими қонунчиликни бузгалиги учун суд қилинган...»

Бу чекинишлардан сўнг Саттор Жаббор ҳақидаги хужжатномага қайтаман. Зоро, у ҳали

адоғига етгани йўқ. Орадан неча-нечада йиллар ўтди. 1958 йилнинг 21 майи куни СССР Олий судининг 08/288 С-58 рақамли қарори чиқди. Бу қарорда Саттор Жабборнинг аксилинишибий уюшмага аъзо бўлганлиги ҳам, фашистлар Германияси фойдасига жосуслик қилганлиги ҳам тасдиқланмаганлиги кўрсатилиб, унинг УзЖМнинг 57—1, 58, 64 ва 67-моддалари билан айбланиши нотўғри бўлганлиги тасдиқланади.

Шундай қилиб СССР Олий Суди Пленумининг 1959 йил 26 мартағи қарори билан Саттор Жаббор устидан 1937 йилда қўзғатилган жиноий иш бекор қилинади ва Саттор Жаббор оқланади...

Ҳаётда ҳеч нарса беиз кетмайди. Орадан ўтган неча-нечада йиллар давомида онаизори фарзанди доғида куя-куя адо бўлди. Саттор Жабборнинг рафиқаси Маҳбуба фарзандларини оёққа қўйиш учун ҳам ота, ҳам она бўлиб, толикуб ҳаётдан кўз юмди.

Лекин ҳаёт ҳаёт-да. Ёшлиар ўсиб улғайди, от босмаган жойларни той босадиган пайтлар етиб, Саттор Жаббор фарзандлари ҳаётдан ўз ўринларини эгалладилар, улар ҳам ўз фарзандларини катта қилаяптилар. Демак, ҳаёт давом этади...

Саттор Жабборнинг ҳаёт боғи ҳувиллаб қолмаслигига ишонч билан ёдномага нуқта қўярканман, чех ҳалқининг суюкли фарзанди Юлиус Фучикнинг сўзларини такрорлагим келади: «Одамлар, Ҳушёр бўлинглар!» Зоро бошимиздан кечган бу даҳшатлар бизни огоҳ бўлишга ундаши керак. Собиқ СССР ҳудудида диктатурини байроқ қилишга, қора булутдек бошимиз узра соя ташлашга ҳаракат қилганларга, собиқ СССРни тикилашга уринаётганларга ўз вақтида жавоб бермоғимиз лозим...

Ҳушёр бўлинг, ҳушёр бўлинг, азиз Одамлар!

МАҲКУМА

Неча-неча тунларни бедор ўтказдим. Кўзим энди уйқуга илингандай рўпарамда Мариям пайдо бўлади. Узун қора соchlарини силлиқ тараған. Иккита қилиб ўриб орқасига ташланган сочи пўстини ёқасига қисилиб қолган. Бу Мариям устидан қўзғотилган «Жиноятнома»га тиркалган сурати.

То 1990 йилнинг декабригача мен уни танимасдим ҳам, у тўғрида эшитмаган ҳам эдим. Ҳужжатгоҳда Мариям Султонмуродовани УзССР Жиноят Мажмуасининг 57—1 ва 67-моддалари билан уни айбловчи «Жиноятнома»ни қўлимга олгачгина танишдим.



Мариям Султонмуродова.

Бу танишув менинг учун жуда оғир кечди. Мариям эртаю кеч кўз олдимда қолди. Мен у

тўғрида одамларга сўзлаб бермасдан бу азобдан қутилолмаслигимга ишонч ҳосил қилдим. Замонанинг зайди билан баҳтиқаро бўлган — Сталин даврининг қатли омига гирифтор бўлиб, умрининг ўн беш йилини турмада ва узоқ ўлкаларда бадарғада саргардон ўтказган аёл қисматидан бир заррани ҳикоя қиласман... Бу зарранинг ўзини кўтариш оғир. Бу зил юк тўлалигича зиммасига тушган аёлга қанчалар қийин бўлган экан-а! Ёраб, ўзинг қўлла бу баҳтиқарони!

Мана, уни ҳибсга олиш учун 1937 йилнинг 15 сентябрь куни ёзилган фармон — ордер. «Жиноятнома»нинг иккинчи саҳифасига тиркаланган бу ордерда Ўзбекистон ССР Ички Ишлар Ҳалқ Комиссарлиги хизматчисига Тошкент шаҳридаги Уездная қўчаси 13 уйда истиқомат қилувчи Мариям Султонмуродовани ҳибсга олиш топширилганлиги қайд этилган.

Бир сўмлик пулдек келадиган бир парча қофоз қанчалар қудратли: шу қофозни кўрсатиш билан куни кечагина кўзи ёриган аёлни қўлидаги норасида гўдаги билан ҳибсга тиқиш мумкин бўлса-я??

Бу «Жиноятнома»нинг учинчи саҳифасида ҳибсга олинувчининг анкетаси бор. Унда кўрсатилишича Мариям Султонмуродова 1905 йилнинг 13 февраляда туғилган. Ихтисоси журналист, ижтимоий келиб чиқиши хизматчилардан, 52 ёшли онаси Дуржон Султонмуродова Хоразм округининг Хива шаҳрида истиқомат қиласди. Мариямнинг ўзи даҳшатли 1937 йилнинг 15 сентябрида ҳибсга олинган. Тошкент турмасига қамалган.

Мариям Султонмуродованинг қисмати менни жуда қизиқтириб қолди. Негаки у — менинг ҳамкасабам — журналист. Боз устига, биз у билан бир таҳририятда хизмат қилган бўлиб чи-

қаяпмиз. Мариям мендан атиги ўн уч йилгина муқаддам «Ёрқин турмуш» журнали редакциясида хизмат қилган экан. Мен хизмат қилган «Саодат» журнали 1937 йилларгача «Ёрқин турмуш» номида чоп этилган ва Мариям бу редакцияда адабий ходим бўлиб хизмат қилган. Мариям ҳибсга олинган чоғида 32 ёшда бўлган, икки фарзанди — етти ёшли ўғли Пўлат ва Анор исмли эмизикли қизи бўлган.

«Жиноятнома»нинг еттинчи саҳифасидаги тергов протоколи билан танишаман. Бунда кўрсатилишича, ҳозирча Мариямни Ўзбекистон ССР Ички Ишлар Халқ Комиссарлиги ДҲБси гувоҳ тариқасида сўрайапти. Гувоҳ тариқасида сўралар экан, элдан бурун ҳибсга тиқишига бунча шошилмасалар-а?!» — деган саволлар гужон ўйнайди дилимда.

Юзаки қарабанда терговчининг саволлари жўнгина кўринади. Лекин бу саволлар диққат билан ўрганилса терговчининг ўз олдига олдиндан қўйган мақсади шу саволданоқ намоён бўлади-қолади.

«Савол: — Айтинг-чи, Олмонияда неча йил ва қачон ўқидингиз?»

«Жавоб: — Мен Олмонияда 1922 йилдан 1928 йилгача ўқидим. 1923 йилдан 1924 йилгача Берлинда, 1924 йилдан 1926 йилгача Дармштадт шаҳрида педагогика мактабда таҳсил олдим, 1926 йилдан 1928 йилнинг май ойигача, яъни СССРга қайтиб келгунимгача Берлинда хизмат қилдим».

Бундан кейинги саволларга Туркистондан ўқиши учун Олмонияга борган талабалардан кимларни яхши таниши сўралади ва табиий Мариям кимларни танишини очиқ кўнгиллик билан санаб беради. Улар Саттор Жаббор, Абдуваҳоб Муродий, Олимжон Қодирий, Аҳмад Наим, Аҳмаджон Иброҳимов, Абдуваҳоб Исҳо-

қов, Афзал, Саида Шермуҳамедова, Темурбек Казбеков, Тўлаган Мўмин, Султон Матқул, Саид Али Хўжаев...

Соддадил жувон — кимни таниса санаб ўтади, номини атаганларнинг бирқанчаси ҳисбадалигини, шу ондан бошлабоқ терговчи унинг устидан ҳам «Жиноятнома» очиш ҳаракатига тушганини билмайди...

...Орадан бир ҳафта ўтади. Мариям энди шу кундан бошлаб айбланувчи сифатида сўроқ қилинабошлайди. Бунда терговчи Мариямнинг Олмонияда Дармштадт шаҳрида 1928 йилда олий мактаблар учун педагогика семинарияси-ни тамомлаганлигини, Олмонияга Хоразм Ҳалқ Шўролар Жумҳурияти Марказий қўмитаси йўлланмаси билан кетганлигини қайд қиласди. Ўқишига кетганлардан кимлар қайтиб келганлигини суриштиради.

Уч кундан кейин яна тергов. Буниси — даҳшатли. Бу терговда Мариямга тақалган гуноҳ ниҳоятда даҳшатли. Ўзимни Мариямни ўрнига қўйиб кўриб, бирдан гунг ва кардек караҳт бўлиб қолдим. Ахир уни Олмониядан СССРга жосуслик иши олиб бориш учун келганликда айблашаяпти-я...

Терговчи савол бераяпти: «Сизга ЎзССР Жиноят Мажмуасининг 62 ва 67-моддаларига асосан қўйилган Берлиндаги «Озод Туркистон» деган жосуслик ташкилоти ишида иштирокингиз ҳақидаги айбларни тан оласизми?»

Бунга жавобан Мариям: «Менга Ўзбекистон ССР Жиноят Мажмуасининг 62 ва 67-моддадари бўйича тақаётган айбларни тан олмайман — ўзимни айбдор ҳисобламайман», — дейди.

Аммо терговчи ҳам анойи эмас. У: «Тергов сизнинг «Озод Туркистон» деган советларга қарши жосуслик уюшмаси аъзоси эканлигинизни, СССРга жосуслик топшириғи билан

келганлигинги жуда яхши билади», — каби сўзлар билан Мариямни караҳт қиласди...

Кўз олдимда қуролланган ҳарбийнинг терговдан ҳолсизланиб чиқсан аёлни олдига солиб камерага бошлаб кетаётгани гавдаланади. Яна у — эмизикли аёл... Даҳшат!!! Даҳшат!!! Даҳшат!!!

Шундай пайтларда нималар ҳақида ўйладинг, Мариям? Балким сен қишлоқда яшаб, ерсизликдан қийналиб, тириклик дардида шаҳарга кетиб, Урганчда Черников деган заводчи бойнинг пахта тозалаш заводида қора ишчи бўлиб хизмат қилган отангни эслагандирсан! Меҳнат билан суяги қотган отанг Мулла Жуманиёз заводда торозибонлик қилибди, пахта қабул қилувчи бўлибди, ахийри бошқарувчилик ҳам қилибди. 1916 йилдан бошлаб унинг сиёсий фаолияти бошланган — Хоразм хонига қарши кўтарилиган қўзғолонларнинг фаол иштирокчиси бўлган. Мариям, эҳтимол отангни эслаганингда хон тарафидан қатл этилган тўрт амакинг ёдингга тушгандир...

Ҳечкимнинг бошига солмасин қамоқ азобини — солганга эса Аллоҳнинг ўзи тўзим берсин. Аёл киши учун қанчалар оғир бу азоб. Мариямжон, ўй-хаёллардан бошинг ғовлаб кетгандир роса... Шу ёшгача кечирганларингни қайта бошдан ўтказгансан, ёру дўст, ота-онанг, жигарларинг кўз олдингдан ўтган албатта... Отанг кейинроқ Хоразм Ҳалқ Шўролар Жумҳурияти Ижроия Кўмитасида раислик қилди. Сен эса унинг таъсирида 1919 йилда комсомол сафига ўтдинг. 1921—22 йилларда Хоразм Округ коммунистик партияси марказий қўмитасида маданият ишларини бошқардинг, кейинчалик хотин-қизлар бўлими мудири вазифасида ишладинг. Кейин... Кейин Олмония...

Урганчнинг Чандир Қиёт қишлоғидан чиқсан қизнинг — на рус тилини, на олмон тили-

ни билмагани ҳолда Олмонияга ўқишига боришга розилик беришнинг ўзи қаҳрамонлик эмасмиди?!

Ўшанда Хоразм музофотидан ёлғиз уни йўлладилар Олмонияга. Қамоқда ўтиаркан шуларни ўйларди Мариям. Ўшанда Олмониянинг Штерн шаҳригача пароходда боришиганди. Кейин уч йил давомида — 1924 йилдан 1926 йилгача Дармштадт шаҳрида ўқитувчилар тайёрлаш семинариясида ўқиганини эслайди. 1926 йилдан 1927 йилга ўтар қишида Потсдам шаҳрида «Фрауншулла» мактабига қатнади. Ёш эди. Мусофирикликнинг барча машаққатларига бардош берди. Муаллимлар тайёрлаш семинариясини тугаллагач, шафқат ҳамшираси тайёрлаш курсида ўқиди. Муаллим ҳам, шафқат ҳамшираси ҳам Хоразм музофотига зарур. Аммо афсус... минг афсус... Орзу-умидлари пучга чиқди... Ҳаммаси кунпаякун бўлди... Ўшанда унинг ҳар бир қўйган қадами ўзига қарши айбнома бўлиб тақалиши етти ухлаб тушига кирмаган эди. Мана, Мустафо Чўқаев билан Парижда тасодифан учрашув... (Кўқон мухториятининг президенти бўлмиш Мустафо Чўқайни мафкурамиз яқин-яқингача «Ватан хоини» деган тамға билан таҳқирлаб келган).

Ўшанда таътил чоғи дугонаси Ҳайринисо Мажидхонова билан Парижга сафар қилдилар. Бу сафардан мурод — Парижни кўриш, музейларда бўлиб, жаҳон маданияти дурданалари билан танишиш эди.

Мусофири бўлганликларидан икки дугона энг арzon пансион топиб жойлашдилар. Кунларнинг бирида улар операга борадиган бўлдилар. Ўша чоқларда Парижда таҳсил олаётган Аҳмад Наим билан Мустафо Чўқаевга дуч келдилар. Ҳозир ўша тасодифий учрашув Мариямга яна бир айбнома бўлиб тақалаяпти...

Терговчиларнинг ҳаммаси бир: айбланувчининг илтимоси, талаби улар учун бир пул. «Ички Ишлар Халқ Комиссарлиги ходими савол беради, айбланувчи ё «ҳа» ёки «йўқ» дейди» — деб Мариямни сўзлагани қўймайди... Қилмаган ишини қилдим деб тан олишини талаб қиласди.

Хўпам шўри қайнаган аёл экансан-да, бахтиқарогинам!

Мариямнинг шўри қайнамаган бўлса, бари умидлари рўё бўлиб чиқармиди?! Ахир у не-не орзулар билан кетмаганмиди Олмонияга. Унинг: «Илм оламан, олам танийман, халқимнинг корига ярайман, билимимни она юртим хизматига бахшида этаман» — деган орзулари поймол бўлди. Мариямни ва унга ўхшашиб олтмиш йигит-қизни Олмонияга ўқишига жўнатган Жумҳурият раҳбарларининг ҳам нияти катта эди. Ақлли, идрокли, билимдон, йирик вазифаларни бажаришга қодир ёшларни тарбиялашни мақсад қилган эдилар улар.

Орадан олтмиш йилдан ортиқ вақт ўтиб, айни чоқда жумҳуриятимизнинг ҳозирги раҳбарияти ҳам худди шу масалаларни режалаштираётibiди-ку! Яхши ниятлар билан қилинаётган ишлар бу.

Лекин... Минг афсус... Ўттизинчи йилларга келиб собиқ Иттифоқ ғарбий сарҳадларидан шарқий сарҳадларигача, шимолдан жанубгача бўлган диёрнинг энг билимдон, сара фарзандлари таъқибга гирифтор бўлди, хаёлларига келмаган айблар тақалиб ҳибсга олинганди, кўпларига «халқ душмани», «миллатчи» деган тавқи лаънат осилиб отиб юборилди, ўн йиллаб каторгага маҳкум этилдилар.

Мариям Султонмуродованинг ҳам қисмати шунга яқин.

1937 йил сентябрь охири ва октябрь ойи

давомида Олмонияда ўқиб қайтган талабалардан Султон Матқул, Саттор Жаббор, Фузаил Шераҳмедов, Олимжон Қодирий ва Аъзам Аюблардан Мариям ҳақида кўрсатма талаб қилинади. Буларнинг бари олдинма кейин ҳибсга олинган бўлиб, уларнинг асосий айблари Олмонияда ўқиб қайтгандари эди.

1937 йилнинг 21 декабрь куни бўлиб ўтган терговда Мариямга: «Туркистон талабаларининг Олмонияда бўлиб ўтган Советларга қарши йиғилишларида шахсан иштирок этганимиз?» — қабилида савол берадилар. Мариям бу йиғинларнинг бир нечасида иштирок этганини айтади. Лекин у шу ўринда рост гапирмаган эди. Мариям Султонмуродованинг бўлмаган ишни бўлди деб кўрсатишининг сабаби сўнгроқ очилади. Орадан ўн тўққиз йил ўтгач, 1956 йилнинг 13 сентябридаги терговда Мариям: «1937 йилнинг 21 сентябрида бўлган терговдаги кўрсатмаларимни тасдиқламайман. Шахсан ўзим бундай кўрсатма бермаганман. Мени тергов қилган чоқларида протоколга имзо чекишига мажбур қилдилар. Лекин унда нима ёзилганлигини ўқимаганман, ўқишга беришмаган ҳам. Бу хужжатларнинг мазмuni билан танишишга ихтиёр билдирганимда, боламни олиб қўямиз деб кўрқитишиди, (эсингизда бўлса, у эмизикли боласи билан ҳибсга олинганди), шу сабабли мазмунидан бехабар бўлсам ҳам тергов протоколига имзо чекканман», — дейди.

Шу кунги тергов сўнгига у яна: «Шахсан мен, ҳеч қачон Совет давлати зиёнига хизмат қилган эмасман, ҳеч қандай уюшмага аъзо бўлмаганман. Шу сабабдан ҳам ўзимни 1938 йилда ҳам, 1949 йилда ҳам ноҳақ маҳкум этилганман, деб ҳисоблайман», — деган.

«Сизнинг туркистонлик бошқа талабалар каби СССРга жосуслик иши олиб бориш учун

қайтганлигингиз терговга маълум. Шуни тан оласизми?» — деб уни қистоққа оладилар. Мариям Султонмуродова аксил инқилобий жосуслик топшириги билан СССРга қайтганини инкор этади. Бу галги терговда Мариям Султонмуродовага яна икки айб тақайдилар.

Терговчи: «Сизнинг «Ёрқин турмуш» ва «Гулистан» журналларида аксилинқилобий миллатчилик ишларини олиб борганлигингиз терговга маълум. Шу ҳақда кўрсатма беринг». (Ажабо, «Терговга маълум» дейдилару, у маълум гуноҳлар нималардан иборатлигини айтмайдилар).

Мариямнинг жавоби қатъий. У ҳеч қандай аксилинқилобий иш олиб бормаганлигини айтади.

Терговчи бўш келмайди: «Ўрта Осиё Табобат институтининг профессори, химик Энглянд билан Тошкентда тез-тез учрашиб турганмисиз?» — деб суриштираверади. Мариямни Олмония фуқароси Энглянд билан жосуслик алоқасида, Олмон разведкаси тарафидан тузилган жосуслик уюшмасига аъзоликда ва Ўзбекистон ССР ҳудудида жосуслик иши олиб борадиган «Озод Туркистон» деган ташкилотга дахлдорликда айблайдилар.

Шундай қилиб 1937 йил декабрининг 20 куни айблов ҳақида қарор чиқарилади. ЎзССР Жиноий Процессуал Мажмуасининг 62 ва 67 моддаларига кўра жавобгарликка тортилган Мариям Султонмуродова энди шу мажмуанинг 57—1 ва 67 моддалари билан айбланади.

Орадан икки кун ўтгач Мариямга тергов тугаганини хабар қиласидилар. Мариям профессор Энглянд билан танишлиги масаласига аниқлик киритиш учун, худонинг зорини қилиб, терговчилардан гувоҳлар билан юзлаштиришни талаб этади. Лекин унинг талаби қондирилмайди.

Мариямга доир «Жиноятнома»нинг 28-са-
хифасида 1938 йилнинг 4 сентябридан яна бир
терговга доир сатрлар бор. Бу терговда икки
саволга икки жавоб бор холос. Жавобда Ма-
риям Олмонияда «Озод Туркистон» деган Со-
ветларга қарши яширин миллий ташкилот бор-
лигидан бехабарлигини ва унинг ишида ишти-
рок этмаганини таъкидлайди. Профессор Энг-
лянд билан алоқада бўлганини бўйнига ол-
майди. Энглянд деган кимсани умуман танимас-
лигини айтади.

Лекин Мариямнинг тақдири аллақачон ҳал
қилиб қўйилган эди. Негаки, Олмонияда ўқиб
қайтган ёшларнинг ҳаммаси жосусликда айбла-
ниб қамалаётган чоқлар эди. Уларнинг кўплари
отиб ҳам юборилди. Мариямнинг дугонаси,
Олмонияда ўқиб врач бўлиб қайтган Ҳайрини-
со Мажидхонова, Тошкент Табобат институти
доценти, химик олим Саттор Жаббор, муҳандис
Омонулла Нусратуллаевлар отиб юборилди,
бошқалари узоқ муддатларга қамоқ жазосига
маҳкум этилди, бадарга қилинди. Олмонияда
ўқиган ёшларнинг бир гурухи, қайтиб келгач
қисматлари нима бўлажагини олдиндан ҳис эт-
ган бўлсалар керакки, Ватанга қайтиб келиш-
маган — Олмонияда қолиб кетишган эди. Буни
эшитганда ўша чоқдаги Ўзбекистон Коммунистик
Партияси Марказий Кўмитаси котиби Ак-
мал Икромов: «Биз мутахассисларни марказдан
чақириб юрсак-ку, ўз кишиларимиз ўзга юрт-
ларда қолиб кетишса», деб хафа бўлган дейиша-
ди.

Хулласи калом, орадан беш кун ўтиб, 1938
йилнинг 9 октябри куни Тошкент шаҳрида
СССР Олий судининг ҳарбий ҳайъати сайёр
сессияси ёпиқ суд мажлисида Мариям Султон-
муродованинг Ўз ССР Жиноят процессуал
мажмуасининг 14—54 ва 67-моддаси билан айб-

лаш бўйича иши кўрилиб, мазкур мажмуанинг 128 ва 131-моддаларига биноан ўн йил муддатга қамоқ жазосига, беш йил муддатга сиёсий ҳуқуқлардан маҳрум этишга маҳкум этилди ва унга тегишли мол-мулки мусодара этиш кўрсатилди. Мариямнинг мол-мулки бўлса экан — тўқиз йил мусофирчиликда ўқиб қайтган, совет идораларида хизмат қилган аёlda мол-мулк нима қилсин.

«Ҳукм қатъий, норозилик билдириш ижозат этилмайди», — дейилади ҳукм сўнгида.

Осмон узоқ, ер қаттиқ. Қайга борсин, кимга дод десин маҳкума — ҳамма йўллар унинг учун берк.

Бояқиши аёл! Қўлидаги гўдагини кекса қайнонаси Ҳосият Иброҳимовага қолдириб, 1939 йилнинг ўнинчи марта куни Қозон турмасига жўнатилади.

Шу ўринда бир нарсани эсламай ўтолмайман, Мариям Олмония фуқароси профессор Энглянд билан то у СССРдан чиқариб юборилгунга қадар, яъни 1932 йилгача жосуслик алоқасида бўлишда айбланади. Аммо бу жосуслик алоқаси нимадан иборат бўлганлиги фактлар билан исботланмайди. Мариям яна «Озод Туркистон» ўюшмаси раҳбарияти топшириғига кўра СССРда аксилинқилобий миллатчи шахслар билан алоқа боғлаб, «Гулистон» ва «Ёрқин турмуш» журналларида Советларга қарши иш олиб боришда айбланади. Аммо бу ишлар қандай кўринишда бўлган, қай мақола ёки лавҳада Советларга қарши ташвиқот олиб борганлиги кўрсатилмайди, исботланмайди.

Исботлашнинг имкони йўқ эди. Зеро, бундай факт ҳеч қачон бўлмаган-да. Мариям Сultonmurodovанинг журналистик фаолияти эндиғина бошланган бўлиб, олмон тилидан қилган таржималари ва бир қатор лавҳалари билан эн-

дигина кўзга кўриниб, умид уйғотган чоқлар эди. Шунинг учун бўлса керак СССР Олий суди ҳарбий суди ҳарбий ҳайъатининг 1938 йил декабрида Тошкент шаҳрида бўлиб ўтган ёпиқ суд мажлиси қарорида кўрсатилишича: «Саркотиб, маҳбус суд залига келтирилганлигини, гувоҳлар судга чақирилмаганини хабар қилди», — дейилади. Бир одамнинг ҳаёт-мамоти ҳал этилсаю, судга гувоҳлар чақирилмаса... Инсон хуқуқининг бунчалар поймол этилишига нима деса бўлади... Яна бу «адолат посбони» деб жар солганимиз Совет Социалистик Жумҳуриятлар Иттифоқида бўлиб турса...

Бояқиш Мариям ёлғиз ўзи қора курсида. Унинг на оқловчиси бор ва на залда бирор қариндоши ёки ёри-дўсти... Уни айловчилар, судловчилар кўпчилик: Судга раислик қилувчи Бриг Ҳарбий юрист Алекссеев, суд аъзолари, ҳарбий юрист Зайцев ва I ранг ҳарбий юрист Болдирев. Суд саркотиби I ранг ҳарбий юрист Батнер. Шунча олий насаб юристлар бир тараф — Мариям ёлғиз ўзи бир тараф, унинг фойдасига бир оғиз айтгучи кимса йўқ. Яна ҳарбий коллегиянинг судида-я... Адолатли Совет судининг ишими шу!

Протоколда кўрсатилишича, суд мажлиси соат 11.35 да бошланади ва 11.55 дақиқада, яъни йигирма дақиқа ичидаги тугаб, хукм чиқарилади-да, суд мажлиси ёпиқ деб эълон қилинади. Суд мажлисига гувоҳлар чақирилмагандан кейин, ашёвий далиллар бўлмагандан кейин, СССР Олий Судига доир протоколларнинг босмахонада чоп этилган тайёр бланкаларини тўлдиришнинг қийинчилиги йўқ-да...

Мен юрист эмасман. Лекин бу жиноий иш билан танишиб чиққач, унда социалистик қонунчилик кўпол равишда бузилганлигини англаб етдим. Онгим, қалбим, шуурим билан анг-

лаб етдим. Аввало, Мариям Султонмуродованинг жосуслигини тасдиқловчи бирон бир ашёвий далил ёки гувоҳларнинг аниқ кўрсатмалари йўқ. Олмония разведкасига Мариям қандай маълумотларни, қай йўл билан етказиб турди? «Гулистон» ва «Ёрқин турмуш» журналларининг қайси сонида, қай мақола ёки лавҳада аксилиңқилобий foяларни олға сурган? Боз устига на тергов жараёнида, ва на суд давомида Мариямнинг неча-неча талабларига қарамай уни гувоҳлар билан юзлаштирамадилар. Нега?

Менимча, Мариям Султонмуродованинг тақдири ҳали жиноий иш очилмасиданоқ ҳал қилинган. Унинг айби — Олмонияда ўқиб келиши эди. Терговчилар ҳам, Москвадан маҳсус келган Олий суд ҳайъати ҳам, менимча, ана шу топшириқни адо этаётган эдилар. Мариям Султонмуродовага ўхшаш ноҳақлик қурбонлари сонсиз-саноқсиз эди у йилларда. Бу маҳкумларни тергаганлар ҳам, улар устидан ҳукм чиқарганлар ҳам ўша давр талабларини ижро этишга маҳкум кимсалар эди.

Мариям Султонмуродованинг ҳаётига шу йўсин чизиқ тортилганди — уни тириклайн кўмган эдилар. Ахир аёл киши учун фарзандидан жудо бўлишлик ўлим билан teng эмасми? Табиат инъом этган оналик баҳтидан мосуво бўлишдек баҳтиқаролик борми?..

«Жиноятнома» 45-саҳифасининг «Айблов хulosаси» сўнгидаги маълумотноманинг иккинчи бетида: «Ашёвий далиллар йўқ» деб ёзилганлиги ҳам Мариямнинг бегуноҳлигини кўрсатувчи далил эмасмиди?! 1939 йилда УСВИГЛ Дальстрой лагерига жўнатилган Мариям ўн йил жазо муддатини ўтаб, 1947 йилда Урганчга қайтди. Лекин қисмат унга бу кўргиликларни ҳам кам кўрди чоғи, Мариям озодлик нашъасини суриб улгармасидан...

1949 йилнинг 29 март куни Мариям Султонмуродова устидан, ўша аввалги иши юзасидан, яна жиноий иш қўзғотилди. Лекин асл моҳият битта. Мариям Султонмуродова ўша аввалги иш бўйича иккинчи бор төргов қилина бошлади. Аввал қораланиб ўн йил давомида жазосини ўтаб келган иш юзасидан қайтадан жиноий иш қўзғашнинг ўзи жиноят эмасми? — деган хаёллар ўртайди мени.

Жиноий иш қўзғалса бас, уни озодликда қолдирмайдилар. Мариямни дарҳол Урганчдаги Ўзбекистон ССР Ички Ишлар вазирлигига қарашли 6-турмага қамадилар.

Ўн йил ҳибсда бўлиш беиз кетмаганди. Бу йиллар ичида Мариям сарсон-саргардон юравериб, фарзандлари доғида куя-куя дардманд бўлиб қолган эди.

Бу янги «Жиноятнома»нинг 37-саҳифасида медицина хulosаси чиқарилган. 1949 йилнинг 12 апрелида берилган маълумотномада маҳкуманинг юрак ҳасталигига, пневмосклерозга гирифтор бўлганлиги қайд этилиб, жисмоний меҳнатга яроқсизлиги тасдиқланади. Лекин ўша пайтларда ўз меҳнати билан давлат қудратига қудрат қўшаётган ишчи, колхозчи ва зиёлиларга шафқат бўлмаган бир мамлакатда маҳкумага шафқат ҳақида гап бўлиши мумкинмиди??

Не кунларни кўрмади Мариямнинг азиз боши, не жафолар чекмади унинг ширин жони. Ўн йил маҳкумлик камлик қилгандай яна беш йил Красноярск ўлкасига бадарға қилинишдек жаҳаннам азоби. Аёл киши учун фарзандидан бир кун, бир ой жудо бўлиш азобини онаизорлар яхши биладилар. Унинг бетоблиги билан ҳам, фарзандлари она дийдорига тўймаганлиги билан ҳам ҳеч кимнинг иши йўқ. У — маҳкума.

«Жиноятнома»нинг сўнгги саҳифасидаги

конвертда унинг СССР Давлат Хавфсизлиги вазирига 1949 йилнинг 30 августида ёзган аризаси. Аризанинг ярмидан кўпи дўконда буюм ўраладиган дағал қофозга, қолган қисми хитой қофозга қора қалам билан ёзилган. Вақт ўтганидан ёзуви хиралашган. Адолат қилишларига умид билан ёзилган бу аризада у ўзининг бегуноҳлигини, дардман бўлиб қолганини баён этади. Ҳеч қачон ҳеч қандай аксилинқилобий уюшмага аъзо бўлмаганлигини, «Озод Туркистон» деган уюшманинг мавжудлигидан тамомимла бехабарлигини айтади. Энглянд деган кимсани танимаслигини, эндиликда Ватан уруши тугаб, Олмония разведкаси ҳужжатгоҳларидан текшириб кўриш имкони борлигини назарда тутиб, бу тахминни текшириб кўришни талаб қиласди. Олмон разведкасига алоқаси йўқлигини, жосуслик билан ҳеч қачон шуғулланмаганини айтади. «Шуниси қизиқки, мени жосусликда айблайдилару, на тергов чофида ва на тергов давомида менинг жосуслик фаолиятим нимадан иборат бўлганини, менга қандай топшириқлар берилганини тилга олмадилар. Жосусни тутсаларда, унинг фаолиятини тафсилоти билан қизиқмасалар...» деб нола чекади. Мариям Султонмуродова ҳеч қачон Совет ҳокимиятига қарши ҳаракат қилмаганлигини ва қилмаслигини таъкидлаб ўзининг вазият қурбони бўлганлигини ёzáди. 1949 йилнинг 30 августида ёзилган ушбу аризадан кўчирма (асли «Жиноятнома»га илова қилинган). Хоразм вилоят Ички ишлар бошқармаси тарафидан 2373 рақамли қўшимча мактуб тиркаб 1949 йилнинг 7 сентябрида Москвага жўнатилган.

Бу мактубга маҳкума жавоб олган-олмаганини бизга қоронғу... Ўзинг учун ўл, етим, деганларидай Мариям яна ўзи ёнди, ўзи куйди, ўз ёғига ўзи қоврилди...

Ҳақиқат ўтда ёнмайди, сувда чўкмайди, дейди доно ҳалқимиз. Яна, қирқ йилдан кейин бўлса ҳам ҳақиқат юзага чиқади — деганларини эшитганман. Сўнгги йиллардаги ошкоралик сиёсати шарофати билан шахсга сифинишнинг оғир оқибатларини бартараф этиш борасида катта ишларга қўл урилди. Сталин даврининг қатли омига дучор бўлган миллионлаб кишиларнинг «Жиноятнома»си қайта кўрилабошлиди. Мариям Султонмуродова СССР Бош Прокурори номига 1957 йилнинг 10 майда йўллаган аризасида тергов ташкилотлари ўзига нисбатан катта адолатсизлик қилганликларини, Совет Конунларига хилоф иш тутганликларини, Олмонияга бориб ўқишига розилик берганидан ўзга гуноҳи йўқлигини баён этади: «Уйдирмадангина иборат мана шу «Жиноятнома» туфайли йигирма йил давомида азоб чекдим, ёлғиз менгина эмас, менинг фарзандларимдан тортиб иниларим, сингилларим, онамгача азобуқубатларга гирифтор бўлишди. Шунинг учун ҳам ишимни қайта кўриб чиқишингизни, ҳақиқат тантана қилишини истайман. «Жиноятнома»даги менинг шаънимга айтилган гаплар, кўрсатмалар ҳеч қандай фактга асосланмаган уйдурма ва тухматлардир. Шу сабабли менинг ишимни қайта кўриб, бу шармандалиқдан халос қилишингизни сўрайман».

...Ойнинг ёруғ кунларидан унга ҳам насиб этди чоғи. Москвага йўллаган аризасидан бир наф чиқишидан умиди узилиб юрган кунларнинг бирида уни Хоразм область Давлат Ҳавфсизлиги қўмитасига чақирдилар. 1956 йилнинг 13 сентябри куни Мариям гувоҳ тариқасида сўроқ қилинди.

Яна ўша аввалги таниш саволлар. Лекин шу

савол-жавоб чоғидаёқ Мариям даврнинг ўзгарганини ҳис қилди. Энди илгаригидек фақат пўписа қилиб гапириш йўқ. Олмонияга қачон кетди, нега кетди, ким билан кетди, қаерда ва қанча ўқиди, кимлар билан ўқиди, кимлар билан танишди, қандай йигинларда қатнашди, қандай уюшмага аъзо бўлди, «Туркистон талабалари» уюшмасини ким бошқаради?.. ва ҳоказо...

Мариям тергов давом этган кунлар мобайнида Олмонияда ўқиб юрган ёшлик вақтини қайта бошидан кечирди ва тергов сўнгида ҳеч қачон Советларга қарши ҳеч қандай ҳаракатда бўлмаганлигини, 1938 йилда ҳам, 1949 йилда ҳам ноҳақ қамалганлигини айтади.

Орадан бир ой ўтади. Мариямни бир ҳужжат билан таниширадилар. Ҳужжатни ўқиб охирига етганда Мариямнинг кўз ўнги қорон-филасида, юраги қинидан чиққудай бўлиб гуппиллаб уриб кетди. «Жиноятнома»нинг 91-саҳифасидаги бу ҳужжат СССР Олий Суди ҳарбий ҳайъатининг ажрими эди. Саҳифа тепасида «махфий» деган ёзув. Юстиция полковниги Лихачев раислигида 1957 йилнинг 2 августида олиб борилган суд мажлисида шундай дейилади:

«Янги маълум бўлган ҳолатларга биноан СССР Олий Суди ҳарбий ҳайъатининг 1933 йилнинг 9 октябридаги ҳукми ва СССР Давлат Хавфсизлиги вазирлиги ҳузуридаги Алоҳида Мажлиснинг 1943 йилнинг 3 августидаги Мариям Султонмуродовага доир қарори бекор қилинсин ва унинг ҳаракатида жиноят йўқлиги учун тўхтатилсин».

Мариям бу ажрим билан икки ойдан кейингина, 1957 йилнинг 14 октябрида таниширилади. Озод этилганидан кейин яна икки ой тутқунликда юради шўрлиқ.

Ҳақиқат қарор топади. Лекин бунинг учун ўн тўққиз йил муддат ўтиши керак бўлади. Эсиз ёшлиқ... Эссиз хайф кетган умр...

Ажрим сўнгидаги Мариямнинг уйини тинтув қилиш чоғида олиб кетилган Дармштадт шаҳрида муаллимлар тайёрлаш семинариясини тамомлаганлиги ҳақидаги дипломи ва 1928 йилда Берлинда профессор Финкельштейннинг болалар шифохонасида олти ойлик ҳамширалик курсини тугаллагани ҳақидаги маълумотномани қайтариб сўраганлиги қайд этилади... ва шу кундан бошлаб Мариям Султонмуродова ўзини эмин-эркин ҳис қиласди...

Лекин Мариямнинг сарсон-саргардонлиги бу билан поёнига етмади. Ишга жойлашиш учун ҳужжат керак. Ҳужжатлар эса тинтув пайтида олиб кетилган. Мариям ариза кўтариб Хоразм вилоят Давлат хавфсизлиги қўмитаси раҳбарига мурожаат этади. Бу аризасида у ажрим чоғида таъкидлаган ҳужжатларини ва меҳнат дафтарчасини қайтариб беришларини сўрайди. Аммо ҳужжатлар унга қайтарилемайди. Ҳужжатлар қайтарилемайди, лекин ундан тилхат олинади. Бу тилхатда у 1956 йилнинг 3 деқабри куни менга 1937 йилнинг 13 сентябрини куни ҳибсга олинган чоғимда олиб кетилган ҳужжатларни орадан узоқ муддат ўтганлиги учун сақланиб қолмаганини эълон қилишди, дея имзо чекади.

Шу билан Мариямнинг Давлат хавфсизлик қўмитаси билан борди-кељдиси ниҳоясига етган бўлса керак, деб ўйласангиз адашасиз. Мариям кейинчалик бу маҳкамага яна ариза йўллашга мажбур бўлади. Юқорида айтиб ўтилганлардан биласиз, уни журнал редакциясида ишлаб юрган чоғида — 1937 йилда ҳибсга олишган. Үн йил қамоқ муддатини ўтаб қайтгач у, Янгибозор медицина пунктида ҳамшира бўлиб ишла-

ган. Эндиликда иш стажини тиклаш учун унинг 1949 йилда иккинчи бор ҳибсга олингунга қадар ҳамшира бўлиб хизмат қилганлиги тасдиқланиши керак эди.

Ахийри, 1958 йилнинг 21 марта куни Давлат хавфсизлик қўмитаси тарафидан маълумотнома юборилиб, унда 1949 йилнинг 30 мартада ҳибсга олингунга қадар Мариям Султонмуродова Урганч районидаги Янги бозор медицина участкасида ҳамшира бўлиб ишлаганлиги тасдиқланади. Мариям бу маълумотномани ҳам 1958 йилнинг 3 апрели куни тилхат бериб қўлга олди.

Бир инсонни ёмон отлиқ қилиш бунчалар осону, унинг номини поклаш, ҳаётга қайтариш қанчалар қийин...

Шунча машаққатлардан кейин ҳам Мариямнинг иши тўғри бўлмади — яна бир ишқаллик чиқди. 1958 йилнинг 31 августида Давлат хавфсизлик қўмитасига яна мурожаат қилишга зарурат туғилди. Бу гал у, 1928 йилдан 1937 йилгача ҳамма ҳужжатларда фамилияси Султонова деб ёзилиб келганлигини, ҳибсга олиниб озод этилгунгача Султонмуродова деб ёзганларини, эндиликда шу икки фамилия бир одамга тегишли эканлигини тасдиқлашларини илтимос қиласди. Маълумотнома Хоразм вилоят Давлат хавфсизлиги қўмитаси раҳбарига ёзилган мактубга илова қилиниб, Султонмуродовага тилхат билан топшириш кўрсатилган.

* * *

Оналаримизнинг ҳикоясига қулоқ тутсам, қадимда Туркистон тупроғида турма бўлмаган экан. Чор Россияси Тошкентни истило этгач, биринчи турма Олой Бозори яқинида, ҳозирги тикувчилик фабрикаси ўрнида қурилган экан ва халқ уни Москва турмаси деб атар экан...

Менинг билишимча, тарихимизда то 1916 йилга қадар аёл киши ҳибсга олинмаган. Биринчи бор аёлларни Чор ҳокимияти ҳибсга олиб, Сибирга бадарға қилган. Уларнинг гуноҳи: фарзандларини, эрлари ва ака-укаларини марди-корликка беришни исташмаганлиги бўлган. Бадарға қилинган аёллар сувратини Ўзбекистон халқлари тарихи музейида кўрганман. Ўшанда 184 ўзбек ўлимга, 130 киши каторгага ҳукм қилинган. Улар орасида бадарға қилинган 18 ёшдаги Ойпарча Темирбоева билан Савринисо Аширбоева суврати кўз ўнгимда муҳрланиб қолган. Аммо, минг афсуски, Совет ҳокимиияти ҳам ўзи афдарган Чор ҳукумати изидан бориб, аёлларни қамоққа ташлаб, азоблади.

Мен ўзим кўрган «Жиноятнома» асосида Мариям Султонмуродованинг кечмишларини сизларга баён қилдим. Минг афсуски, бу ёлғиз Мариям Султонмуродова бошига тушган кўргиликлар эмас. Даҳшатли 1937 йилда «Ҳалқ душмани» деган тавқи лаънатга тақалган онахонларимиз, опаларимиз қанчалигини аниқ билмасам-да; бир рақам келтираман, Ҳозирги «Саодат» ойномаси 1925 йилда «Янги йўл» номи билан чиқабошлаган ва 1937 йилларга келиб «Ёрқин турмуш» номида чоп этилган. Шу ойноманинг биринчи муҳаррири Тоҷиҳон Шодиева ва ундан кейинги муҳаррирларидан Собира Холдорова ҳамда адабий ҳодим Мариям Султонмуродовалар ҳалқ душмани деган даҳшатли ном тақалиб турли муддатларга қамоқ жазосига маҳкум этилиб, Сибирнинг турли лагерларида қамоқ муддатларини ўтаб қайтдилар. Мариям билан Олмонияда бирга ўқиб, врач бўлиб қайтган дутонаси тошкентлик Ҳайринисо Мажидхонова СССР Олий Суди ҳарбий ҳайъати тарафидан отишга ҳукм этилиб, отиб юборилган...

Бу сўнгги сатрларни ёзаяпману, бу маҳкум-

ларнинг хайф кетган ёшлигига, ҳазон бўлган умрига аза тутган қалбимнинг дуди кўкка ўрлайди, ўзимни қўярга жой тополмайман. Аламли дилимда пайдо бўлган саволларга жавоб излайман: «Бундай кемтик тақдирли аёллар қанча бўлди экан?» Балким биладиганлар бордир? Улар ҳақида ёзмоқ керак... Ҳақиқатни ҳамма билмоғи керак...

Мариям Султонмуродованинг аччиқ тақдирли, алданган умидлари ҳақидағи лавҳага ҳали нуқта қўйилгани йўқ. Унинг Урганчга қайтиб борганидан кейинги кечинмаларидан биз бехабармиз. Бу бўшлиқни унинг қариндош-уруғлари, фарзандлари, ёр-дўстлари, қўни-қўшнилари, ёнма-ён ишлаган ҳамкаслари тўлдиришига умидвормиз.

Ёзинглар, азизлар, тортинмай, билганингизча ёзинг. Бу билан бир аламдийда юртдошимиз хотирасини тиклашда катта хизмат қилган бўласиз....

* * *

Орадан кўп ўтмади. Урганчдан Мариямнинг ўғли Омон Султонмуродовдан мактуб олдим. Омон ўз хатида онаси, у оғир даврлар ҳақида ҳеч нима гапирмаганлигини, шу сабабли ўзи шоҳиди бўлган нарсалар ҳақидағина ҳикоя қилажагини ёзади. Омоннинг мактубидан билишмича, Мариям 1954 йилда оқланиб қайтгач Тошкентда ишга таклиф этганлар, аммо у ўзи туғилиб ўсган Чандир Қиёт қишлоғида онаси Дуржон Кўчиева бағрида яшай бошлаган. У даврларда ҳаёти жуда оғир бўлган: ҳеч ерда иш беришмаган. Неча-неча ташкилотлар остонасидаги сарсон-саргардонликдан кейин Урганч туманидаги Қораман қишлоғидаги табобат бўлимига ишга жойлашишга муваффақ бўлган. Ўша чоқлар Мариям дала шийпонидаги совуқ хона-

да ўғилчаси билан икки йил яшаган. Қатағон йиллари одамлар шу қадар юрак олдириб қўйганларки, унга ёрдам кўрсатишга ҳам айғоқ кўзлардан чўчиганлар.

Юқорида айтганимдек, унинг Олмонияда ўқиб олган ҳужжати ҳам, сургундалик чоғида ўқиб келтирилган дипломи ҳам тергов ташкилотларида қолиб кетган. Бу ерда эса дипломинг йўқ деб ишдан бўшатишга ҳам уринганлар. Шунинг олдини олиш учун Мариям кундузи ишлаб, кечаси ўғилчасини опичиб пиёда кечки ҳамширалик курсини битирган. Саккиз соатлик иш вақти тугагач ҳам, унинг ёрдамига муҳтож бўлиб ёлвориб келганларни ноумид қайтармаган, гўдак болам бор, ёлғиз қолиб кетади, деб важ-корсон кўрсатмаган. Айтадилар-ку ахир, қайси бандасини Аллоҳ сўйса, унга одамларнинг ишини тушуриб қўяди, — деб. Шундай экан, Аллоҳ таоло ўзи сўйган бандасини нега бунчалар қийнайди-я, деган ўйлардан қалбим ёнади.

Ҳа, Мариям кечани кеча демай, кундузни кундуз демай қўлидан келган хизматини ҳеч кимдан аямаган: «Кечалари ёрдам сўраб келишса, ухлаб ётган бўлсан, бир ўзимни ташлаб, уйғоқ бўлсан бирга илтижо қилиб келган кимса ўйига пиёда кетаверардилар. Зим-зиё қоронфидагой пойу пиёда қайтаётганимизда қўрқиб йигланларим ҳамон ёдимда. Аммо онам ботир эдилар, ҳеч нимадан қўрқмас эдилар, қийналганларини ҳам ҳеч кимга билдирамасдилар...»

Икки йилдан сўнг Мариям ўзи туғилиб ўсан Чандир Қиёт қишлоғида очилган табобат бўлимига ишга ўтди. Аввалига бу ерда мудира бўлди, кейинчалик то нафақага чиққунига қадар фельдшер бўлиб ишлади. Омонжон онаси ҳақида эслаб яна шундай дейди: «Ҳеч қачон ўзларини ўйламасдилар, бундай фидойиликни мен баъзан тушунмасдим. Онажон, зўрга юриб-

сиз, сал ўзингизни аянг, тинчгина ўтириңг, ахир ёшингиз ўтиб қолди, соғлигингиз ҳам яхши эмас, десам кулардилар. Рўзгор ишларини ўринлатиб қўйсан, дарҳол меҳрларини изҳор қиласардилар. «Жонгинам болам! Сен адолатлисан, ҳамма ишни ақл кўзи билан қилишингга, қўлингдан келгунча инсонларга яхшилик қила жагингга ишонаман. Чунки сен менинг юрак меҳрим билан сугорилган гулсан. Гуллаб яшнайвер. Одамлар сени ўстирган онангга раҳмат десинлар!» — деб насиҳат қиласардилар. Онам шундай бағри кенг инсон эдилар.

Мариям дардини тишида тишлади, ҳарқандай шароитда одамлардан яхшилигини аямади. Буни бирор билди, бирор билмади. Баъзи ўзини билмаган кимсалар унга надомат тошларини отди ҳам. Мана шундай юраги куйган чоқларда Мариям дардини қофозга тўқди. Унинг ўғли Омон онасининг ёзганларини менга йўллаган эди. Мариямнинг ёлғизликда битган дил изҳорини қисқартириб ҳавола қиласман. Бу Мариям Султонмуродованинг сўнгги дил изҳори:

«Жоним азобда қолди. Юрагимни очиб сўзлайдиган кимсан йўқ. Қалбимни қофозга тўкиб солмоқчиман. Шу ниятда қўлимга қалам олдим.

Илгарилари мен давлат хавфсизлиги идораларида ҳаётни яхши билган, совет ҳокимиятига садоқатли одамлар ишлайди, деб ўйлар эдим. Шунинг учун бўлса керак, назорат қилиб туриш ҳолларига рўпара келганимда, бунда ҳеч қандай ёмонлик кўрмасдим. Ҳаётда шундай бўлиши керак, деб ўйлардим, буни тўғри деб тушунардим.

Менинг эса эҳтиёт бўлишга заруратим йўқ эди. Менинг виждоним пок эди. Мен берилиб, виждон билан меҳнат қиласардим. Аммо, ҳеч қачон жиноят қилмаган эсамда, мени яна қамоқ-

қа ташладилар. О, қанчалар азобда қолганимни билсалар эди...

1954 йилда яна юртимга қайтиб келдим ва Қорамонда ишлай бошладим. Бу ерда ҳам атрофимни ўшандай одамлар қуршади ва менга аввалгидай азоб бериб, мазах қиласлошаши. Уларнинг баъзилари менинг тақдирим уларнинг қўлида эканини англатиб қўйишга уринса, бошқалари мен билан яқинлашишга, дўстлашишга ҳаракат қилишарди. Ўзларини яқин кўрсатиш учун ҳар хил гаплар қилишарди.

Масалан, бир киши 1958 йили, яқинда Ички ишлар министрлигига бўлганини, у ерда мен тўғримда суриштирганларини, ким билан яқинлигимни, нима дейишимни, сиёsat билан қизиқиши, қизиқмаслигим, газета ўқиш-ўқимаслигимни суриштирганларини сўзлади.

Суриштиrsa суриштираверишсин, менинг ҳеч қандай ёмон одамлар билан ошначилигим йўқ... Совет ҳокимиятига қарши бирор ёмонлик қилиш хаёлимтга ҳам келмайди. Мен билан қизиқиша — қизиқаверишсин. Бу уларнинг иши.

Аммо, барибир, алам қиларкан кишига. Одамлардан уяларкансан. Бу алпозда яшамоқ қанчалар оғир!

Менга болалиқдан, виждонли инсон ҳалқи ва давлати дардига малҳам бўлмоғи керак, деб ўргатишарди. У ўз ватанининг ижтимоий ҳаёти билан қизиқмоғи, партия ва ҳукуматнинг мақсади ва вазифалари нимадан иборатлигини билмоғи керак, дейишарди. Акс ҳолда, у юртинг ҳақиқий граждани бўлолмайди.

Матбуот — ижтимоий ҳаёт мактабидир!

Матбуот — совет кишиси учун энг яхши мактаб.

Матбуот — кишиларни олға ундовчи байроқ!

Шундай экан, менинг нега газета ўқишим мумкин эмаслигини тушунолмайман. Она юртида нима бўлаётганидан бехабар киши унга қандай хизмат қила олади, ўз халқига қандай фойда келтира олади?!

Лекин шундай деб суриштираётган бўлишса, демак, ҳақиқатдан ҳам газета ўқимаслигим керакдур, дедим-да, уч йил мобайнида қўлимга газета ва журнал ушламадим. Лекин бундан сўнг ҳам менга ўша-ўша муносабатда бўлишгач, хато қилаётганимни, мени барибир ўз ҳолимга қўймасликларини англашим, бўлганча бўлар, деб қўл силтадим. Келаси 1960 йил учун кўпгина газета ва журналларга обуна бўлдим.

1957 йили мени оқлашган. Мендан баҳтли одам йўқ эди. Ахийри орзуим ушалди! О, менинг хурсанд бўлганларим...

Ҳаётимда катта бир ўзгариш кутабошладим ва ахийри тўла хуқуқли совет граждани бўламан, деб ўйладим! Лекин афсус, кўп ўтмай ихлосим қайтди. Мен ҳамон назорат остида эканлигимни, шармисорлик тамғасининг юки ҳамон босиб ётганини англашим.

Мени Давлат хавфсизлик министрлигига чақирдилар. Ижтимоий чиқишимни, қариндошларимнинг, бирга хизмат қилганларнинг исмини ва манзилгоҳини ёзиб беришни буюрдилар. Мен итоат қилдим ва бунинг натижаси тезда ўзини намоён этди. Менинг шахсимга қизиқиш янада ортгани сезилиб турарди. Ўша кунларда мен ўзимни яна терговда ҳис этдим. Яна тинчлигимни йўқотдим, ўзимга ишончим қолмади.

Мен билан бирга хизмат қиладиганлардан бирини чақиришиди. Шундан кейин у менга менсимай қарайдиган бўлди...

Ўзлигингни пастга уришларини ҳис этиш-

дан ортиқ алам йўқ оламда. О, бу қанчалар оғир!

Агарда менга юқоридан, масхаромуз қараётган мана шу кимсалар мендан яхшироқ ва мендан покроқ бўлишганда-ку, балки бу ҳолга чидардим. Лекин асло ундаи эмас эди. Аксинча, уларнинг бири чайқовчилик, ички-ликбозлик, бузуқлик қиласарди. Иккинчиси, бироннинг эрини тортиб олган, фарзандини отасиз қолдирган эди. Ўз юрти қонунларини ҳурмат қилмаган кимсани виждонли киши деб бўладими, унга ишониб бўладими? Виждон қонунини писанд қилмаган, бошқаларнинг кўз ёшларини оқизган кимсани инсон деб бўладими?

Ҳақиқий инсон ҳамма ерда: ҳаётда ҳам, ишда ҳам соғ виждонлик бўлмоғи даркор.

Ўзлари аслида чиркин табиатли, пасткаш одамлар мени кўрқитишар, осуда ҳаётимни заҳарлашга уринишарди. Бир куни ўша аёл гўё менга ачинган бўлиб, ўғлимни ишончлироқ жойга жойлаштиришни маслаҳат берди, «ким билади, ҳали бошингизга не савдолар тушади», — деди. Мен унга ўғлим ҳали ёш бола, менга бирор кори ҳол бўлишига ақлим бовар қилмайди, дедим-да, хотиржам ишлай бошладим. Шунда у менга: истеҳзоли тиржайиб: «Жуда иродангиз кучли экан» — деди.

Ҳеч бўлмаса мана шу кимсалар мени тинч қўйишса эди, кўнглимга ғулу солишимаса эди. Йўқ, улар менга сира тинчлик беришмас, оловга мой қўйишарди. Менга ўзларини яқин кўрсатиб, ҳар нималарни очиқ гапирган бўлиб қандай мақсадни кўзлашяпти экан?

Яна бири менга уни тергов қилиб мен тўғримда суриштирганларини, менинг француз тилини ҳам билишимни, лекин буни яширишимни айтганларини сўзлади. Нима

учун менга ишонмайдилар? Унинг ёлғон гапирмаганини мен Хавфсизлик идораси офицери билан сўзлашганимда англадим. У менга, унда француз тилида ёзилган хат борлигини, ўқиб беришимни сўради. Майнавозчиликни қаранг! Тавба!

Мендан, бирга ишлаганлар ҳақида суристиришганида бир аёлнинг номини тилга олгандим. Орадан бир мунча вақт ўтгач у менга:

— Афсус. Улар сизни тинч қўймайдиган кўринади, — деди.

Яқинда эса, орамиз бузилиб қолганда:

— Шуни билиб қўйингки, тақдирингиз менга жудаям боғлиқ! — деди у зарда билан.

Ҳар кимса кайфиятига қараб мен билан хоҳлаганича гаплашиши мумкин экану мен тилимни тийиб индамаслигим керак...

Ҳамма вақт шундай. Ҳатто ҳамширалик мактабида ҳам бир айғоқчи бўлгучи эди. Қаерга борсам рўпарамдан чиқаверарди. Наҳотки мен шунчалар хавфли жиноятчи бўлсан, наинки мени назорат қилиш учун бутун бошли штат белгиланса? Наҳотки шундай қилишга улар ҳақли бўлсалар?

Давлат манфаати мени назорат остида тутишни талаб қилди дейлик, нега улар буни на мойиш қиласидилар? Нега энди мен буни билиб туришим керак? Ёки мени қўрқитишмоқчими? Нега? Агар менинг поклигимга заррача бўлсада ишончсизлик бўлса, мени оқламасликлари мумкин эди-ку?!

Мана шундай хаёллар мени қийнайди — жоним азобда қолди.

Мен бутун умр виждан билан яшадим ва меҳнат қилдим. Ҳаётимда бир бор беихтиёр қоқилган бўлсан, наҳотки қайта-қайта йикитиш, қайтиб қад ростлайолмайдиган қилиб

ташлаш керак? Наҳотки менга қўл чўзиб тўғри йўлга бошлаш мумкин эмас? Наҳотки мени ҳам халқимизга хизмат қилиш учун барча қатори тўғри йўлга бошлаш мумкин эмас? Нега энди менинг дилдираган қалбимни илиқ сўз билан, дўстона эътибор билан иситиш мумкин эмас?..»

* * *

Бу сатрларни ўқиганимда Мариямнинг аччиқ қисмати қиймалаган дилимга таскин бераман, унинг сабри, бардоши, қаноатига таҳсин ўқийман. Яхшиямки Мариямлар бор дунёда, бундан кейин ҳам бўлади. Ҳаёт давом этади. От босмаган жойларни той босади деганларидаи, Мариямга насиб этмаган яхши кунларни унинг қизи Анор, ўғли Омон ва уларнинг фарзандлари кўради...

КЎЗЛАРИДА КЎРДИМ СЎНГСИЗ МУНГ

Унинг кўзларига сира қарай олмайман. Кўзларига кўзим тушса, юрагим увишиб кетади — қандайдир бир оғриқ юриб кетади томиримда. Негаки, унинг боқишлирида сўнгсиз мунг кўраман. Назаримда у, кўзларини кўзимга тикканча: «Қай гуноҳим учун мени бу азобларга солдилар?» — дея сўроқقا тутаётгандек кўринади. Ҳар гал суратига кўзим тушганда юрагим бир орзиқиб кетадиган бу аёл Собира Холдорова — менинг ҳамкасабам, мен хизмат қилган «Саодат» журналнинг собиқ муҳаррирларидан бири («Саодат» журнали 1925 йилда «Янги йўл» номида ҳафталик газета тарзида чоп этилган). Собира Холдорова



Собира Холдорова.

1928—1930 йилларда ана шу «Янги йўл» журналида муҳаррирлик қилган.

Собира Холдорова ҳақида мен илк бор 1975 йилда «Саодат» журналининг 50 йиллик юбилейига ҳозирлик кўраётган чоғимизда, тарихимизга доир материалларни ўрганиш жараёнида эшигтанман. Айни ўша чоқлар мен бу аёлнинг бошига тушган савдолардан хабар топдим.

Ҳали ўзим ҳеч қачон кўрмаган ва танимаганим бу аёл қисмати юрагимни ўртади, қалбимни сирқиратди. Журналимиз тарихига доир тайёрлаётган рисоламиз учун барча со-биқ муҳаррирларимиз суратини қатор териб қўйган чоғимизда Собира Холдорованинг суратдан туриб мунгли боқиши мени ҳайратга солди. Наздимда бу мунг абадул-абад чўккан эди унинг кўзларига... Кўзларигагина эмас, унинг қалби тубига ҳам чўккан эди бу мунг...

Аввал қалбига чўккану, сўнг кўзларида на-
моён бўлган...

Мана бугун мен яна унинг кўзларига ти-
киляпману, у билан унсиз суҳбатлашаман. Тўғ-
рироғи, саволга тутивчи ҳам, жавоб қайтарувчи
ҳам менинг ўзим (жавобларимнинг ҳақиқатли-
ги ҳужжатлар билан тасдиқланади).

Қўлимда Собира Холдоровани Ўзбекистон
ССР Жиноят Мажмуасининг 63 ва 67-моддала-
ри билан айлаш бўйича тўпланган ҳужжатлар. Бу иш 1937 йилнинг 22 сентябридан бошланиб,
1939 йилнинг 29 марта тутагилган. «Бир
ярим йил тергов берипти-я», — деган нидо янг-
райди дилимда. Юқорида айтганларимни ҳуж-
жатлар тилига кўчирадиган бўлсақ, «Жиноят-
нома»нинг 41-саҳифасидаги айблов холосасида
қўйидагиларни ўқиш мумкин: «1907 йилда Чуст
районининг Чуст қишлоғида туғилган, СССР
граждани, партиясиз, 1927 йилдан 1937 йилгача
ВКП(б) аъзоси бўлган ва синфий хушёrlигини
йўқотгани ҳамда аксилинқилобий унсур билан
алоқа боғлағани учун (бу ерда гап унинг эри
Мўмин Усмонов ҳақида кетаяпти), партиядан
ўчирилган, қамалгунга қадар Тошкент шаҳар,
Киров район партия қўмитаси котиби бўлган
Собира Холдорова Ўзбекистон ССР Жиноят
мажмуасининг 63 ва 67-моддалари бўйича айб-
дор саналади.

Ушбу иш кўриш учун СССР ИИХК хузури-
даги Алоҳида Мажлисга йўллансан». Мазкур
ҳужжатга шу соҳанинг казо-казолари имзо че-
кишган. Саҳифанинг сўнгидаги яна шундай ёзув
бор:

МАЪЛУМОТНОМА

*Айбланувчи Холдорова (1937 йилнинг 22 сен-
тябрридан бошлаб қамоқда. Ички ишлар халқ*

комиссарлигининг ЎЗСАЗ ЛАГи ЦИЗОсига сақланмоқда. Иш бүйича ашёвий даиллар йўқ.

ИИХК ДҲБ оператив вакили

Кўриб турибмизки, ҳеч қандай ашёвий даилларсиз ҳам, гуноҳини исбот қилиб ҳам ултурмасданоқ бир инсонни қамаб юборилса бўлаверар экан. Собира Холдоровага доир иш билан танишган чоғимда аллақанча саволлар қалбимни ўртади. Тергов материаллари қалбимни қанчалар алғов-далғов қилган бўлса, дилимда жўш урган ҳис-туйғулар, бошимни ғовлатган фикр-ўйлар шунчалар айқаш-уйқаш...

Жумхуриятимизнинг, наинки жумхуриятимиз, балки собиқ СССР халқининг ёшию қариси учун бирдай даҳшатли 1937 йил! Неча-неча зиёлиларимиз, маданият арбобларимизнинг ёстити қуриган бу йилларда. Уларнинг кўплари Чита, Омск, Соловки, Қозон, Туман, Красноярск ва Ёкутистон турмалари, лагерларида азоб чекканлар.

Азиз ўкувчи, сиз ҳозир айблов хulosаси билан танишдингиз. Энди Сизга «Жиноятнома»нинг биринчи саҳифасини очаман. Унда 1937 йилнинг 20 сентябри куни шўроларга қарши ташкилот аъзоси бўлган Собира Холдоровани эри Мўмин Усмонов билан бирга аксил шўровий иш олиб боргани учун ҳибсга олиш ва Тошкент турмасига қамаш ҳақида қарор бор.

Жумхуриятимизда хотин-қизлар матбуотининг вужудга келишида ўз ҳиссасини қўшган биринчи журналист аёл Собира Холдорова босиб ўтган ҳаёт йўли, унинг аччиқ қисмати ҳар саҳифани варақлаганим сайин бутун чалкашликлари билан кўз ўнгимдан бир-бир ўта бошлиди...

Мана унинг тергов анкетаси. Мен ундан Собира Холдорованинг 1907 йилда Чустда камбағал деҳқон оиласида дунёга келганини, 1921 йилгача яъни ўн тўрт ёшга тўлгунча интернатда тарбияланганини, ўқигани, ўрта маълумот олгани, коммунистик партия сафига кирганини биламан. Оиласида 12 ёшли ўғли Пўлат ва беш яшар қизи Манзура, қари онаси Комила бор. Эри Мўмин Усмонов аксил инқилобчи саналиб ундан хиёл олдинроқ қамоққа олинган...

Бир хонадондан ҳам ота, ҳам она ҳибсга олинса, болаларнинг ҳоли нима кечади?!

1937 йил шундай даҳшатли йил эдики етим қолаётган болалар тақдирни нима бўлиши ҳеч кимни қизиқтирмасди — етим учун етимхона бор, деб қаралган у пайтларда: икки болани етимхонага жўнатдилар, Эр-хотинга тегишли мулк, ҳар бириники алоҳида-алоҳида хатга олиниб, онаси билан болаларининг кийим-боши, кўрпа-ёстифию, гўшт қиймалагичдан тортиб қошиққача мусодара қилинди ва ИИХ Комиссарлигининг тегишли омборхоналарига ташиб кетилди... Бўлаётган бу қонунсизликларнинг бари наинки жумҳурият, балки Совет Иттифоқиnomidan, гўё ҳалқ саодатини кўзлаб қилинган...

Азиз ўқувчи, бу ёзаётганларим балки, сизга икир-чикир бўлиб кўринар, лекин буни атай таъкидлаб ўтмоқчиман, зеро уйда кекса она, норасида икки гўдак қолаяпти-ю, лекин ИИХ Комиссарлигининг «Ҳушёр»ходимлари болалар дўпписидан тортиб велосипедгача, самовардан тортиб чит кўйлаккача хатлагандилар. Собира Холдорованинг хатланган рўзгор буюмлари рўйхатига қараганимда, ўша чоқларда Жумҳуриятимиз зиёлиларининг ўрта ҳолгина яшаганларига амин бўлдим, ҳеч қайси бирининг молмулкка ҳирс қўйганини сезмадим. Уларнинг деярли ҳаммалари мамлакатда рўй берәётган

ўзгаришлар халқа фаровонлик олиб келишига катта ишонч билан яшар, яхши кунларга тезроқ етмоқ учун бор кучини сарф қилиб, кечани кече, кундузни кундуз демай ишлардилар.

Аммо давр тақозосига кўра ҳибсга олинган Собира Холдоровани советларга қарши ташкилотга аъзоликда, ғоявий фронтда зааркунандалик қилишда айбладилар.

Унинг айби нимадан иборат эди?!

ЎзССР Ички ишлар халқ комиссарлиги Холдоровага эълон қилган 1939 йилнинг 26 марта даги қарорида шундай дейилганди: «Тергов Собира Холдорованинг Узбекистонда барбод этилган аксил шўровий ўнг троцкистлик ташкилот аъзоси бўлганини аниқлади. У Ўзбекистон КП(б) Марказий Қўмитасининг собиқ саркотиби, ҳозирга келиб отиб юборилган халқ душмани Акмал Икромов раҳбарлигидаги аксил шўровий миллатчи, ўнг троцкист ташкилотга аъзо бўлган. Шу уюшма топшириғига кўра ғоявий фронтда зааркунандалик қилган. Марксизм-ленинизм классиклари асарларини ўзбек тилига нашр этиш ишига заар етказиш ниятида Холдорова 1932—34 йилларда эри Усмонов билан биргаликда ўртоқ Сталиннинг «Ленинизм масалалари» асарини бузиб таржима қилган ва 30000 нусхада чоп этган. Ахир оқибатда сиёсий хатолари туфайли бу китоб савдо ташкилотларидан йифиштириб олинган ва натижада давлатга 144,782 сўм 82 тийин зиён етказган»...

Худди шу куни, яъни 1939 йилнинг 16 марта Собирани терговга чақирадилар.

Терговчи савол беради: «Сизга ЎзССР Жиноят Мажмуасининг 63 ва 67-моддаларига кўра: аксил шўровий миллатчилик ташкилоти аъзоси сифатида, шу ташкилот топшириғи билан ғоявий фронтда зааркунандалик иши олиб бо-

ришда айбланасиз. Ўзингизни айбдор ҳисоблайсизми?

Жавоб: Аксил шўровий миллатчилик ташкилотига алоқадорликда ўзимни айбдор ҳисобламайман. Аксил шўровий миллий ташкилотга алоқам йўқ...»

Холдоровага доир «Жиноятнома»ни ўрганганимда қонунларимизнинг шавфқатсизлиги ларзага солди мени. Гап шундаки, тергов давомида руҳий дардга чалинган Собировани шифохонага йўллайдилар. Бу табиий ҳол албатта. Лекин негадир унинг онаси билан учрашувга ижозат сўраб берган аризаси қондирilmайди. Нега? Ахир руҳий дардга чалинган кишини даволаш учун энг аввал унга руҳий хотиржамлик қўл келмайдими?

Жумхурият руҳий шифохонаси директори Матюхиннинг 1939 йилнинг 4 июни куни 38 рақами билан ЎзССР ИИХКга йўллаган хатида, шифохонага текшириш учун йўлланган маҳкума С. Холдорова онаси ва болалари билан учрашиш истагини билдириб, буни сизга етказишини талаб қиласкан. У 12 июндан бошлаб, учрашувга ижозат берилганга қадар очлик эълон қилди, — деб ёзади.

Бояқиши аёл! Фарзандлари тақдири, кексонаси тақдири бу дардман аёлни қанчалар ташвишлантирган... Ахийри, ўн еттинчи июнга келиб Холдоровага оиласи билан учрашувга ижозат берадилар.

Яна бир «Иш» бор. «Холдорованинг мулкига доир» деб юритилади. Шу «Иш»нинг 22—23-саҳифасида, (1939 июлида бўлса керак) Собира Холдорованинг ўғли Пўлат Усмоновнинг Сталинга ёзилган мактуби тиркалган. Халқлар отасига умид ва ишонч билан ёзилган бу аризани бирор кимса раҳми келиб айтиб туриб ёздирган бўлса керак) олти ёшли синглиси билан «Ўртоқ»

фабрикасида 120 сўм маош олиб ишлайдиган бувиси қарамоғида қолишганини, мол-мулклари мусодара қилиниб, қийналиб қолганликларини айтиб, онасининг қисматини енгиллаштиришни сўрайди. Бечора бола халқлар отасининг шафқат қилишига ишонган бўлса керак. Аммо унинг хоти онасининг «Жиноятномаси»га тиркаб қўйилишини у қаёқдан билсин.

1938 йилнинг 26 декабря маҳкумнинг онаси Комила Қўзибоева Йчки ишлар халқ комиссарлигига ариза йўллаб, моддий аҳволи оғирлигини, 115 сўм ойлик билан икки норасидани боқиши мушкуллигини, қизи тарафидан содир қилинган гуноҳга болаларнинг алоқаси йўқлигини айтиб, ўзига ва болаларга тегишли буюмларни қайтариб беришни сўрайди.

Унинг аризаси оқибатсиз қолдирилмади. 1939 йилнинг 13 январи куни ИИХ Комиссарлиги қарор чиқарди. Бу қарорга кўра:

1) Комила Қўзибоева сўраган буюмлар қайтариб берилиши кўрсатилади.

2) Собира Холдорова ва эри Мўмин Усмоновга тегишли буюмлар (иккинчи рўйхат билан) давлат фондига топширилиши таъкидланган.

3) Собира Холдорованинг шахсий буюмлари ИИХК АҲОсининг маҳсус омборида вақтинча сақлашга топширилсин, дейилади.

Маҳкуманинг онасига қайтариб бериладиган буюмлар рўйхатини ўқиб юрагим уюшиб кетди. Ахир ота-она ҳибсга олинган бўлса, норасида фарзандлари ва кекса онада нима гуноҳ? Оналари қамалгач, болаларининг ҳаёти тугаши керакми? Тирик жоннинг яشاши учун кундаклик ҳаётда зарур бўлган оддий буюмларни ҳам тортиб олиш керакми? Қуйида эътиборингизга Холдорованинг онасига қайтарилган

буюмлар рўйхатини келтираман — ўзингиз ху-
лосага келақолинг.

1. Кулранг чит — 10 м.
2. Кўк сатин — 7 м.
3. Ўзбекча чит кўйлак — 2 дона.
4. Камзул — 1 дона.
5. Жигар ранг пальто — 1 дона.
6. Кўрпа — 4 дона.
7. Сўтилган кўрпа — 1 дона.
8. Калиш — 1 дона.
9. Велосипед — 1 дона.
10. Болалар каравоти — 2 дона.
11. Болалар кўрпаси — 2 дона.
12. Одеял — 1 дона.
13. Болалар ич кийими.
14. Дўппи — 1 дона.
15. Қизил Бахмал — 2,5 м.
16. Самовар — 1 дона.
17. Сандиқ — 1 дона.
18. Фотоаппарат — 2 дона.
19. Штатив — 1 дона.
20. Биллиард — 1 дона.

Кундалик ҳаётда ҳар бир тирик жон учун зарур бўлган шу буюмларни аввало, ўйламайнетмай қандай қилиб хатладилар экан! Қайта-риб бериш учун эса қанча асъаса-ю васваса керак... «Астагфирулло!» деб ёқа ушлайсан киши. Бу сатрларни ўқиб муаллиф намунча икирчикирга ўралашиб қолмаса дегувчилар ҳам бўлиши мумкин. Бугун бизга икир-чикир бўлиб кўринган нарсалар ўша узоқ 1937 йилларда тирикликтининг мазмани эди. 1933 йиллардаги бутун мамлакатда неча миллион аҳолини қирғин барот қилиб олиб кетган қаҳатчилик ва очарчилик йилларидан сўнг ҳалқ эндиғина қаддини тиклаб келаётган чоқлар. У қаҳатчилик ва очарчиликларни биз кўрганмиз, бошқа ҳеч кимга раво кўрмаймиз. Ана шундай оғир пайтларда,

«фарзандлар оталар учун жавоб бермайди» деб турилсада, кекса аёл ва икки норасиданинг бoshiga кийишга дўпписини, устига ёпишга кўрпасини қолдирмай шип-шийдам қилиб чиқиб кетишса... Шундай қилишларига сира ақдим бовар қилмайди-ю, лекин Ички ишлар халқ комиссарлиги маъмурӣ хўжалик бўлими катта инспектори имзо чеккан рўйхат қўлимда турибди.

Қизи билан куёви советларга қарши ҳаракатларда айбланиб қамалган Комила опанинг икки етимни едириб-ичириб, тарбиялашдан ташқари ҳам ташвишлари кўп. Бу югур-югурлар орасида тинтуб пайтида олиб кетилган 1560 сўм пул ва беш минг сўмлик давлат заёмини қайтариб олиш йўлидаги саби ҳаракатлари ҳам тинка мадорини қуритади. Бу орада 1939 йилнинг 9 октябрида Пўлат Ички ишлар халқ комиссари Саджайга ариза ёзиб, ўша хатланган пул ва заёмни қайтаришларини сўрайди. Ариза неча қўллардан ўтади, унинг орқасига кимdir қора қалам билан (кв. 574, 1937 йилнинг 10 октябри 5205 сўм, «Мозер» сериясидаги қўл соат N 702470 деб ёзиб кўйибди).

Бу аризага жавобан 1939 йилнинг ноябрида тайёрланган хulosада:

«Собира Холдорованинг ишонч хатига биноан унинг онаси Қўзибоевага болалари таъминоти учун бир минг юз сўм пул берилсин» деб «марҳамат» қилинади-да «5000 сўмлик облигациялар ва 702470 рақамли кумуш «Мозер» соат иш кўрилиш мобайнинда сақлаш учун ЎзССР ИИХК Молия бўлими кассасида сақланишга кўйилади.

Ҳа, ҳаммаси рисоладагидай — рўйхатсиз игна ҳам эгасига қайтарилмайди.

Бу орада Собира Холдоровага алоқадор «жиноий иш» кўрилмай у турмада азоб чекиб

ётади. Комила опанинг Ички ишлар халқ Комиссари Саджайга 1939 йилнинг 15 декабрида ўйллаган аризасида, қизи Тошкент турмасида ётганини, икки йилдан ортиқ тергов кетаётгани — қачон тугаши ноаниқлигини, қизи айбдор бўлса, терговни тезлатиб суд қилишларини сўрайди ва ариза сўнгида тергов қизининг бегуноҳлигини аниқлашига ишонч билдиради.

Бечора маҳкуманинг зиммасига қўйилган гуноҳ нимадан иборат эди? Бу ҳақда ҳужжатларга мурожаат этамиз.

1937 йилнинг 20 сентябри куни Собира Холдорова ҳибсга олинишидан икки кун бурун, Ички ишлар халқ Комиссарлиги Давлат хавфсизлиги қарорида шундай дейилади: «Мен, Ўзбекистон ССР Ички ишлар халқ комиссарлиги Давлат хавфсизлиги бошқармаси 1907 йилда туғилган, партиясиз — ёт унсур билан алоқаси учун партия сафидан чиқарилган, Фрунзе кўчасидаги 35 уйда истиқомат қилган Собира Холдорова ҳақидаги материални ўрганиб чиқдим.

Аксил инқилобий миллатчилик ташкилоти аъзоси Мўмин Усмоновнинг рафиқаси бўлмиш Собира Холдорова у билан бирга аксил инқилобий ҳаракат олиб борган. Шунга кўра қарор қиласиз: Собира Холдорова ҳибсга олиниб, Тошкент турмасига қамалсин». Қамаш учун чиқарилган қарорда Собира Холдованинг аксил инқилобий ҳаракатлари нималарда кўрилганлиги ҳақида эса лом-мим дейилмайди.

Шу билан бир инсоннинг ҳаётига чизиқ тортилди. Собира Холдорова 1940 йилда ССР Ички ишлар халқ комиссарлиги алоҳида мажлиси қарори билан 5 йил муддатга Ёқутистонга бадарға қилинади. Бизда шундай бўлган: бир одамнинг номи ёмонга чиқдими — тамом, суроби тўғри бўлгунча кетига тушилади. Собира ни 1942 йилда қайтиб келганидан кейин ҳам

тинч қўймаганлар. 1949 йилнинг майида уни яна Тошкентдан бадарға қилдилар. Бу орада у яна руҳий шифохонага тушиб қолди ва уч ой даволанди. Лекин ҳали шифо топиб ултурмасидан Тошкентдан 50 километр нарига жўнатилди. Шу кетганича амнистиядан кейингина қайтиб келди. Собира Холдорова ўзининг ноҳақ маҳкум этилганини, оқлашларини сўраб 1943 йилдан то 1949 йилгача ССР Олий Совети ва СССР Ички ишлар вазирлигига бир неча бор ариза ёзди. Лекин аризалари оқибатсиз қолиб кетаверди...

Орадан яна етти-сақкиз йил ўтиб кетди. Ахийри, ҳақиқат қарор топди, 1956 йилнинг 22 июнида Туркистон Ҳарбий округининг ҳарбий трибунали Собира Холдорованинг ишини қайта кўриб чиқди. Подполковник Гуськов раислигига, Адлия подполковниги Шербаков, адлия полковниги Иванов аъзолигига ажрим чиқарди. Ажримда шундай кўрсатилади:

«...Холдорова иши бўйича тергов холис олиб борилмаган, қонунга хилоф равишда айблашга уринилган. Холдорова ҳибсга олингандан кейин орадан ўн етти ой ўтгачгина унга айбнома эълон қилинган.

Бу гал тергаётганлар аввалги терговчилар ва суд ҳайъати кўзини кўр, қулоғини кар қилиб эътибор қилмаган кўрсатмаларни инобатга оладилар. «Бўлар экан-ку!» — деб юборасан беихтиёр.

Яна ажримга мурожаат этаман:

«Дастлабки терговда Холдорова ўзининг советларга қарши миллий ташкилотга аъзолигини қатъян инкор этиб, ўзини фақат Сталиннинг «Ленинизм масалалари» китобини ўзбек тилида хатолар билан чоп этишда айбдорлигини тан олади. КПСС Марказий Қўмитаси котибига ёзган шикоятида ҳам, 1956 йилнинг мартаидаги

терговда ҳам Холдорова аксилинқилобий фаолиятидаги айбини қатъяян инкор этган...»

Яна: экспертизанинг хуросасига қараганда Холдорова таржима қилган китобда дарҳақиқат кўпгина терминлар нотўғри таржима қилинган, бир қатор ҳатоларга йўл қўйилган. Бу ҳол таржимонларнинг рус ва ўзбек тилини яхши билмаганликлари, етарли назарий тайёргарликлари бўлмаганлиги, шунингдек иш олиб борган соҳаларини яхши билмаганликларидан келиб чиққан», — дея кўрсатилади. Мана бу гал ҳақиқатни гапирдилар. Дарҳақиқат, китоб таржимасидаги ҳатолар атайлаб қилинган зааркунандалик бўлмай, юқорида санаб ўтилган сабаблар оқибати эди. Бу хато учун дунёга атиги бир бор келадиган инсоннинг жонига бунчалар жафо қилиш, инсофдан, одамгарчилиқдан эмас.

Ана шу юқорида санаб ўтилган ва яна бошқа қатор ҳолатлардан келиб чиқиб, СССР ИИХ Комиссарлиги ҳузуридаги алоҳида мажлиснинг 1940 йил 5 декабридаги Собира Холдоровага доир қарори бекор қилинади. Бу ажримга иш бўйича раис, адлия подполковники Гуськов имзо чекади.

Ҳақиқатнинг қарор топиши ўн тўққиз йилга кечиккан эди. Собиранинг ўн тўққиз йиллик ҳаёти ҳасрат-надоматда азоб-уқубатда ўтиб кетди. Бу кунларни бошқаларга кўрсатмасин, бoshqiga tushganlarni esa tuzim berсин xudoyim.

Бу азоб-уқубатлар ўз асоратини қолдирди, албатта, 1940 йил 5 декабридаги қарор бекор қилингани ҳақидаги маълумотномани Собирага йўллаганларида у бетоб эди. 1956 йилнинг 30 июнь куни бу ҳужжатни унинг ўғли Пўлат имзо чекиб бир нусхасини олиб қолади, иккинчи нусхаси орқасига катта лейтенант: «Холдорованинг ўғлининг айтишига кўра С. Холдорова 1956 йилнинг 20 майдан шу кунга қадар Тош-

кентдаги руҳий шифохонада даволанаяпти», — деб ёзиб қўяди. Маълумотноманинг ён томонида бошқа ёзув: «Холдоровага унинг иши тўхтатилганини хабар қилишга ижозат бўладими, деб сўраш лозим. 1956 йил 5 декабрь, Собира Холдорованинг ўғлига маълумотномани топширганлардан бери ҳам тўрт ой ўтиби-я! Шум хабарни етказишлари осон экан-ку, хуш хабарни етказишни бунчалар орқага сурмасалар...

Бошга тушганни кўз кўрап экан. Бошига не-не кўргиликлар тушса ҳам Собира ҳаётда умид билан яшади. Унинг ҳаётнинг аёвсиз бўронларидан ҳам кўксини фоз тутиб юришининг сири бор эди. У бутун орзу-умидларини фарзандлари Пўлат ва Манзура билан боғлаган эди. Яратганга шукур, фарзандлари инсофли, тавфиқли, илмли ва меҳрибон чиқишиди. Ўғли Пўлат кўнгилли бўлиб фронтга кетди, жанг қилди, жароҳатланиб қайтди, уч фарзандни камолга етказди. Унинг Темур, Саида ва Комил исмли уч фарзанди бор — уччови ҳам олий маълумотли. Қизи Манзура ядро физикаси бўйича йирик мутахассис — жумҳуриятимизда аёллар ичida ягона физика-математика фанлари доктори. Манзуранинг қизи Лайло — рассом. Аммо афуски, Собира га болаларининг роҳатини кўриш насиб этмади, у ҳаётдан кўз юмди. Бироқ от босмаган ерларни той босади деганларидек, Собира кўрмаган яхши кунлар унинг фарзандлари ва набираларига насиб этсин...

Шу ерга келганда куни кечагина бўлиб ўтган бир воқеани эслайман. Қатл этилган сиёсий маҳбусларни ёд этиш куни — 1991 йилнинг 30 октябрида ёшлари саксон атрофида бўлган бир гурӯҳ собиқ сиёсий маҳбуслар ва отиб юборилган маҳбусларнинг ёши олтмишдан ошган фарзандлари собиқ Москва турмасида бўлдик. (Олой бозори ёнбошидаги ҳозирги «Юлдуз»

фирмаси). Бу фабрика ҳовлиси тўри томон юрсангиз, собиқ турма биносининг бир қисми сақланиб қолганини кўрасиз. Ҳозир омборхона вазифасини ўтаётган бу бино ичидаги авваллари «ўлим камераси» ва энг катта «биринчи камера» ва яна қатор камералар ҳамон бор. Собиқ маҳкумларнинг ҳикояларига кўра худди шу бинонинг ертёласида якка сақланадиган камералар бўлган экан. (Биз бу ертёлага ҳам тушдик — ҳозир у ерда ишдан чиқсан мебеллар ва яроқсиз асбоб-анжом тиқишириб ташланган). Собиқ сиёсий маҳбуслар бизга яна шу бинонинг ўнг ёнбошидаги эни бир метр келадиган баланд деворни кўрсатиши ва отувга ҳукм этилган маҳбуслар шу девор тагида тун қоронгусида отилганини, ўқ овози ва маҳкумларнинг фарёди эшитилмаслиги учун айни пайт тракторларни тариллатиб қўйиб ҳукмни ижро этганликларини, сўнг шланг билан қонни ювганликларини сўзлаб беришди.

Шу куни биз, собиқ сиёсий маҳбусларнинг бир гурӯҳ фарзандлари шу девор тагида шамлар ёқиб, гулчамбарлар қўйдик. Менимча, собиқ турманинг омборхона қилиб қўйилган бу биноси фабрика тасарруфидан чиқарилмоғи, ўша 1930 йилларда қай ҳолатда бўлса, шундайлиги-ча тикланиши ва мустақиллик учун кураш йўлида берган қурбонларимиз ёдномасининг кўзлардан пинҳон тутилган бир саҳифаси бўлиб тарихимизга кирмоғи керак. Бу ерда маҳсус музей ташкил этилиши ва у жумҳуриятимиз фуқароларига ҳаёт сабоқларини эслатиб турувчи бир зиёратгоҳга айланмоғи даркор. Халқимизнинг неча-неча сара фарзандлари қони билан бўялган турма деворларига мармар ёдномалар ўрнатилиб, теварак-атрофида гулзор барпо этилмоғи, мустақил давлат деб эълон этилган жумҳуриятимиз фуқароларининг қалбida сиёсий маҳ-

буслар ёди абадул-абад муҳрланмоғи керак. Зеро, у маҳқумлар ва маҳқумалар шу элнинг онгли, зийрак, уйғоқ фарзандлари эдилар. Биз, уларнинг зурриётлари уларга муносиб авлодлар эканлигимизни амалда кўрсатмоғимиз жоиз. Олдда мустақиллик учун меҳнат ва кураш кутади ҳар биримизни. Мустақилликни мустаҳкамлашда ҳар биримизнинг ҳиссамиз бўлмоғи керак.

Шулар ҳақида ўйларканман бирдан хаёлимда шеъриятимиз кўкида юлдуздай чараклаб сўнган — аламдийда шоиримиз Чўлпоннинг сатрларила мустақил жумҳурият фуқароларига ҳайқиргим келади:

Тириксан, ўлмагансан,
Сен-да одам, сен-да инсонсан,
Киshan кийма,
Бўйин эгма,
Ки сен ҳам ҳур туғулғонсан!

МУНДАРИЖА

Бедарак йўқолган	3
Маърифат ва эзгуликка бахшида умр	71
Салимхон Тиллахонов — сиз кимсиз?	95
Ҳаётдан умиди катта эди	105
Кўклам ҳазони	117
Маҳкума	137
Кўзларида кўрдим сўнгсиз мунг	159

ХОЛИДА АҲРОРОВА

ИЗЛАРИНИ ИЗЛАЙМАН

**«Шарқ» нашриёт-матбаа концерни
Бош таҳририяти
Тошкент — 1998**

Муҳаррир *Ҳ. Султонова*
Безакловчи рассом *Ҳ. Зиёхонов*
Бадиий муҳаррир *Ф. Башарова*
Техник муҳаррир *Л. Хижова*
Мусаҳҳидлар *Н. Мұхаммадиева, Ю. Бизаатова*

Теришга берилди 25.05.98 й. Босишга рухсат этилди 13.07.98й.
Бичими 70x90 $\frac{1}{32}$. Таймс UZ гарнитураси. Офсет босма. Шартли босма табоби 6,43. Нашриёт ҳисоб табоби 6,55. Адади 5000. Буюртма № 2565. Баҳоси келишилган нархда.

**«Шарқ» нашриёт-матбаа концернининг босмахонаси,
700083, Тошкент шаҳри, «Буюк Турон» кўчаси, 41-уй.**